


164.1.5,

SCS #1274

Thomas F. Towne

3025

SCS #1274



Thomas R. Horner
PHILOSOPHIA THEOLOGICÆ ANCILLANS;

hoc est

Pia & sobria explicatio Questionum PHILOSOPHICARUM in
Disputationibus THEOLOGICIS subinde occurrentium,

AUCTORE

ROB: BARONIO,

PHILOSOPHIÆ PROFESSORE,
in illustri Collegio S. SALVATORIS.

OXONIÆ,

Excudit *Leonardus Lichfield*, Impensis
Guliel: Davis, & Tho: Robinson,
Ann: Dom: 1641. A

CHM PRIVILEGIO.

PHILLOSOPHY

AND

SCIENCE

OF

THE HUMAN MIND

AND ITS RELATIONS

TO THE UNIVERSE

BY

JOHN

DEWEY

OF THE UNIVERSITY OF CHICAGO

AND

NEW YORK

1908

THE CENTRAL BOOK CONCERN, INC.

NEW YORK, N. Y.

100 N. 3RD ST.

NEW YORK, N. Y.



CANDIDO LE- CTORI S.

Cum ante quadriennium, eruditi aliquot, & honesto loco nati adolescentes, qui ex inferiori Germaniâ, ad uberiores ingenii cultum capessendum, huc appulerant, à me magnopere contendissent, ut Philosophiæ usum in S. Theologiâ iis ostenderem, & ex singulis Philosophiæ partibus, imprimis autem ex Metaphysicâ ea exciperem & seligerem quæ in controversiis Theologicis discutiendis præcipuum usum habere viderentur: placuit hoc honestæ & laudabili eorum petitioni concedere, & ejusmodi laborem suscipere, qui illis mihiq; ipsi in S. Theologiâ adjumento foret & emolumento. Quia enim me totum dicaveram sacris illis studiis, quibus, ut par est, nihil antiquius habeo, nec habebō unquam, idcirco omnes meas Philosophicas lucubratiunculas, ad S. Theologiam, velut ultimum finem referebam & ipsam Philosophiam, Domina suæ Theologiæ imperium agnoscere, illiq; demissè ancillari volebam. Quâ-

obrem ut pio istorum adolescentum desiderio aliqua ex parte satisfacerem, Metaphysicorum & Sententiariorum volumina evolvere cœpi & pro modulo meo explicare, ea problemata Philosophica quæ subinde occurrunt in hujus sæculi controversiis, & quibus Heretici simplicioribus fucum facere solent. Quod cum præstitissem & optimi isti Belgæ in Patriam remeassent, rudem & impolitam mearum disputationum congeriem, in tenebris æternæ noctis jacere volebam, neq; unquam de illis evulgandis aut prelo committendis, vel levissima cogitatio animum subibat. Verùm quia docti nonnulli, & graves viri cum quibus mihi summa familiaritas intercedit, qualescunq; exercitationes illas approbarunt, easq; S. Theologiæ Candidatis in Controversiarum studio nonnihil incrementi, afferre posse existimarunt; cœpi de istius opusculi publicatione cogitare, & in formem ingenio mei factum, paulò operosius lambere, non quidem ut ex illis vigiliis & laboribus famam colligerem, sed ut eorum studia promoverem qui posito Philosophicarum disciplinarum Tyrocinio in celebritate Academiæ, publicum sui progressus testimonium consecuti, jam primùm considerare aggrediuntur, argumentosas illas, spinisq; obsitas & horrentes controversias, quas Emissarii Satana, hoc est, Sophistæ hujus sæculi fidelibus & piis Jesu Christi servis subinde moverunt. Quia enim ultima hæc Mundi ætate, sinuosus & insidi-

osus

osus ille Serpens, effusis omnibus furorum habe-
nis, ministros suos Tartareo afflatu correptos, &
concitados emisit, ut hominum aē & intētia falsarū
opinionum sordibus obstruant, & atrum illud ac
tabificum Antichristianorum dogmatum virus,
sub specie lactis Philosophici, incante juventuti
instillent; ideò in studio controversiarum Theolo-
gicarum apprimè utile est, seriò in iis Philosophia
partibus desudare, ex quibus Sophistæ suas rati-
unculas depromunt: nam hoc pacto simplices
præmunientur, & os obturabitur veteratoribus
illis, qui vera Philosophia & Theologia obtentu,
in Ecclesiæ sinu grassantes, cam obliquè & quasi
per cuniculos evertere conantur: hac cura & co-
gitatione adductus, molestum hunc laborem sus-
cepi, qui si Reipub. & Ecclesiæ salutaris, si candi-
dis rerum æstimatoribus gratus, & acceptus fue-
rit, non operam lusisse, sed ex eā magnum fructum
retulisse, & messem optimam messuisse videbor.
Præstiti in hoc opusculo, quod pro gratia mihi à
Domino concessæ modulo, in tanta occupationum
undiq; se accumulantium mole præstare potui:
præstiti inquam non ut limitatissimis gravium &
doctorum virorum iudiciis usquequaq; satisfacere-
m, sed ut infirmis ingeniis succurrerem, quibus
Philosophicæ Hereticorum ratiuncula magnam
molestiam creant. Hic meus conatus est; hoc pro-
positum, hic labor, cui ut benedicat Dominus, glo-
riosissimam ejus Majestatem vehementer etiam
atq; etiam rogo.



D N. R. B A R O N I O,
Quondam Discipulo suo.

Pumice tersa levi, limâq; polita recenti
Scripta ede, eximia dexteritatis opus.
Dogmata quæ Graia pariter Latiaq; Minerva
Et vera & sancta simplicitate madent.
Quæ non convincent hostes, licet ilia rumpant,
Et grato accipiet pectore posteritas:
Præforibus stantem, cessas admittere famam?
Et dubitas opera præmia ferre tue?
Post te victura, te vivo, vivere charta
Incipiant cineri gloria sera nimis.
Non est quod caricem metuas, neq; vulnera lenta
Cimicis; aut Cynica classica vana tuba.
Cum Mausolaum, scindet caprificus, & alta
Magnorum Regum in armora pulvis erunt.
Doctorem vivus volitabis in ore virorum
Et meliore tui parte superstes eris.
Sperne Theoninos morsus, humilesq; susurros,
Negligere est satius, cum nequeas regere.
Zoilus Idalia carpit sandalia Diva,
Cum nihil in Divâ, quod reprehendat, habet.


Avia

*Avia Musarum lustras loca, nullius ante
Trita solo, primum sed pede pressa tuo.
Iliacum rapuit puerum Jovis armiger alos:
Euches ingenium te super astra tuum.*

Amoris & gratulati-
onis ergô F.

H. DANKINUS amœniorum
literarum Professor

ANDREAP.



AMICISSIMO SVO
DN. R. BARONIO.

Nulla ars alterius non est opis indiga; amico
Fœdere quæq; alii consociata manet.
Sic tamen ut sacris subserviat omnis: & illis
Obstrictam famulâ se fateatur ope.
Hic Sophia imprimis labor cminet: oblita nullo
Si fucò, propria simplicitate micet.
Quippe ubi cœlestis retegenda oracula veri,
Hac facit ut niteant lumine quæq; suo.
Vincla Sophistarum si dissolvenda, latentes
Detegit insidias hac, aperitq; dolos.
Si solidâ firmanda fides ratione, necanda
Hæresis, hac operâ præstat utrumq; suâ.
At bona quæ pravos non detorquentur in usus,
Si furor, aut error suadet, amorve sui?
Sic Sophia in rectos usus adhibenda, Sophistæ
Dum facta ingeniis Lesbia norma, nocet.
Hinc sacra tot tantisq; scatent erroribus: inq;
Æde DEI hæreseon putida lerna viget.
Vera involvuntur tenebris oracula: Phœbo
Non sua fulgenti lumina pulchra micant.
Vis Sophia in sacris usum spectare tenendum?
Vis nôsse ut Domine serviat illa sua?

Hac

*Hac Lege. Tractari Sophia problemata cernes,
Iudicio ingenti perfaciliq, viâ,
Divinis aptata, citra fucosq, dolosq.
Candore ingenuo, dexteritate novâ.
Vtere: sic temnes Ubiquistæ imbellia tela:
Arminii mole s ingeniosa ruet:
Que vaser obtrusit vasto Bellarminus orbi
Romuleo fastu turgida scita cadent.
Utiliore potest quisquam prodesse labore?
Quisquam ornat Spartam nobiliore suam?
Eia age Baroni: pergas, quò vota bonorum;
Quò virtus, quò te mens generosa vocat.
Ad meritas laudes, ad honores vera tuarum
Premia virtutum, jam tibi strata via est.*

Honoris & amoris

ergô F.

IACOBUS GLEGIIUS,

humaniorum literarum

Professor TAODUNI.



ELENCHUS EXERCITATIONVM QVÆ IN HOC opere continentur.

1. **D**E Ente & Essentia.
2. **D**E origine animæ, & propagatione peccati.
3. De Fide, Scientia, & Opinione.
4. De Spe & Charitate.
5. De natura & facultatibus animæ rationalis
6. De libero hominis arbitrio.
7. De Lege in genere, & in specie de Lege naturæ.
8. De natura mali.
9. De tribus operationibus primæ causæ; hoc est, creatione, conservatione, & cooperatione cum causis secundis.
10. De Deo, quatenus est unus: deq; ejus attributis incommunicabilibus, contra *Vorstium*.
11. De attributis Dei communicabilibus.
12. De triplici Dei subsistentia personali, contra *Antitrinitarios*.
13. De Deo incarnato, & unione duarum naturarum in ejus hypostasi.
14. De

14. De Angelis.

15. De Prædicationibus Theologicis.

IN his Quaestionibus disponendis non nature, sed facilioris cognitionis ordinem secutus sum: in iisdem vero proponendis & explicandis sermonis perspicuitatem & brevitatem, non verò laetitias & vneres vocum affectavi, idcoq; in distinctionibus & accuratis rerum explanationibus assignandis illa barbara, aspera, horrida, sed perspicua, & rebus ipsis quasi cognata nomina, quibus utantur Scholastici Doctores, & Metaphysice interpretes Ciceronianis vocabulis præferenda censui: Adieci etiam disputationibus Philosophicis quædam purè Theologicas; sed eas Philosophico more tractavi: idq; ut sciant Ecclesiæ hostes, nostræ fidei dogmata ita humana rationis captum superare, ut tamen veræ & rectæ rationi nequaquam adversentur.

Si scire cupias (candide Lector) quanam problemata tractentur in his exercitationibus, ego eorum summam tibi breviter proponam.

In prima exercitatione, primò propono aliquot divisiones Entis realis ut ex iis colligam explanationem istarum vocum, Ens, Essentia, Existentia, Suppositum, & Persona. Secundò istas voces explico. Tertiò hanc doctrinam personis Trinitatis applico.

In secunda Disputatione, primò propono & explico

plico communem sententiam de Origine animæ, & Propagatione peccati. Secundo, aliorum sententias de Origine animæ, & Propagatione peccati confuto.

In tertia, primò confero Fidem cum Scientia, & Opinione. Secundo, varias quæstiones de natura Fidei discutio. Tertio, ostendo Charitatem non esse formam fidei; Religionem vero ac Theologiam à Fide, non differre realiter.

In priorè parte Disputationis quarta, has quæstiones de natura Spei dissolvo: Vtrum Spes subjectivè existat in intellectu? Quomodo differat Spes à Fide, quam habemus de rebus futuris? Vtrum fiducia sit actus Spei? In posteriore, considero naturam, obiectum, subiectum, unitatem numericam Charitatis, & ordinem in Charitate servandum.

In quinta, primò explico Facultates animæ, & earum actus. Secundo, aliquot quæstiones discutio, de natura, & subiecto Conscientiæ, de ratione superiori & inferiori, de verbo mentis, de rebellionè appetitus sensitivi contra rationem, &c.

In sexta, explicatur natura Liberi arbitrii, eiusq; concordia cum præscientia & providentia Dei, & efficacia gratiæ divinæ.

In septima, primò propono divisiones Legum, deinde varias quæstiones discutio, de Iure naturali, quales sunt illæ: An secundum & quartum præceptum decalogi sint de iure naturæ? An præcepta

præcepta iuris naturæ sint dispensabilia? An Polygamia patrum fuerit contra ius naturæ? An licuerit per ius naturæ, filiis primorum ducere sorores suas? Et, an licuerit Iacobo ducere duas sorores? &c.

In octava, agitur de privativa natura mali, de causa primi mali, de divisionibus mali, de summo malo, deinde doctrina de molo culpa, & poena homini applicatur.

In nona, hæ quæstiones tractantur: Possitne homo lumine naturæ, scire Deum esse causam efficientem mundi? Possitne etiam scire, Deum produxisse mundum in principio temporis? &c. Quid sit creatio? Et, an primi parentes propriè creati fuerint? An res omnes ita à Deo dependeant, ut non possint operari absq; Dei concursu? Quomodo Deus cum homine cooperetur in malis actionibus, & tamen sit immunis deformitate actionis? Vtrum prima causa, cum cooperatur, determinet secundam ad speciem actionis? Vtrum Deus, cum operatur cum causis secundis, prævia motione eas excitet?

In decima, differitur de Immensitate, immutabilitate, æternitate, & simplicitate Dei, contra detestabilem Hæreticum Conradum Vorstium.

In undecima, afferuntur, & explicantur variae distinctiones Scientiæ, & voluntatis divinæ; item differitur de dominio & potestate Dei.

In duodecima proponuntur, & solvuntur aliquot quæstiones de distinctione personarum, & respondetur ad Antitrinitariorum argumenta ex Metaphysicâ petita.

In decimatertia, solvuntur quedam quæstiones de humiliatione & exaltatione Christi, & diluuntur Philosophica ratiuncula Pontificiorum & ubiquitariorum.

In decimaquarta, explicantur varia quæstiones, de substantiâ & diversitate Angelorum, de eorundem numero, ordinibus, loco, motu, cognitione, virtute motivâ, operationibus, &c.

In decimaquinta, agitur præcipuè de illis prædicationibus, quæ occurrunt in Controversia Sacramentali.



EXERCITATIO

PRIMA,

DE

*Ente , Essentia , Existentia ,
Subsistentia , Supposito ,
& Persona.*

IN QVA

illi termini METAPHYSICI
explicantur.

&

Eorum usus in S. THEOLOGIA
declaratur.

EXERCITATIO

PRIMA

DE

Essentia, Existencia,

Substantia, Proposito,

& Persona.

IN QUA

terminantur Metaphysicae

explicationes.

Edinburgae in S. Theologia

Abbas.



AMPLISSIMO ET REVE-
RENDISSIMO IN CHRIS-
TO PATRI, IOHANNI AR-
chiepiscopo Andreapolitano, Scotiæ
totius Primati, Consiliario
Regio, & Academiæ An-
dreanæ Cancellario.

Viro

De Ecclesiâ, De Republicâ, De Lite-
ris optimè merito:

Qui

O Perosam ac difficilem Provinciam à Do-
mino sibi delegatam, summo labore, vi-
gilantiâ, & assiduitate hætenus administravit,
& in eâ administrandâ suo exemplo ostendit,
quàm suaves & indole suâ dignos fructus pro-
ferat vera pietas, in ijs, in quorum cordibus al-
tè defixa, & radicata est.

Amplitudini

Ipsius devotissimus R. Baronius hæc vigilia-
rum suarum monumentum, hoc chartaceum mu-
B *nusculum;*

*nisculum, hoc officiosi animi testimonium, eâ quâ
par est humilitate & reverentiâ, dedicat, offert: &*

Ex

Sincero amoris affectu, quo ipsius Amplitu-
dinem prosequitur, Dominum nostrum Iesum
Christum, Ecclesiæ suæ præsidem & custodem,
maximâ animi contentione veneratur & ob-
testatur,

Et

*Charum istud Cælo ac terra caput, oculo gra-
tie dirigat, manu potentia defendat, umbraculo
alarum suarum tegat ac refocillet, & tandem
decurso arumnose huius vite curriculo cum san-
ctis Patribus & prisca Ecclesia Episcopis in
caelestia Tabernacula
recipiat.*



INDEX





INDEX
ARTICULORUM
PRIMAE
EXERCITATIONIS.

1. **A**ffertur prima divisio Entis realis, & ostenditur solum Deum esse Ens necessarium.
2. Proponitur secunda divisio Entis realis, & probatur solum Deum esse Ens per essentiam.
3. Affertur tertia divisio, & explicatur quomodo Deus sit actus purus.
4. Affertur quarta divisio Entis realis, quæ est petita à modis existendi.
5. Explicatio istarum vocum, Ens, Essentia, Existentia, Subsistentia, Suppositum, & Persona.
6. An increaturis, suppositum & singularis eius natura re differant.
7. Quæ sit causa cur compositionem ex Essentia & Existentia; item ex Essentia & Subsistentia, creatis substantiis, non autem Deo
B 2 tribuant

tribuant Philosophi.

8. *An hoc posito, quòd omnis perfectio sit de essentia Dei, sequatur subsistentiam personalem esse de eius essentia: & an Deus, quatenus est communicabilis tribus personis Trinitatis, sit persona, ut statuit Cajetanus.*

9. *An Deus, ut est communis tribus personis, sit singularis substantia: &, an tres personae Trinitatis, sint tres singulares substantiae.*

10. *An Christus, quatenus homo, sit persona: item an Christus, quatenus homo sit ubique.*

11. *An Ubiquitariorum argumenta ab unionem personali petita, sint valida.*

12. *An subsistentia personalis τὸ λόγῳ, sit natura eius humanae communicata: &, an rectè sequantur, qui dicunt humanitatem Christi subsistere ubique, per subsistentiam τὸ λόγῳ: item existere ubique secundum Esse suum personale.*






EXERCITATIO PRIMA

De Ente & Essentia.

ART. I.

Affertur prima divisio Entis realis, & ostenditur solum DEUM esse Ens necessarium.



ENS reale, primò dividitur, in *finitum* & *infinitum*; hoc est, in creatorem & creaturam: quæ quidē divisio, multis aliis modis tradi & proponi solet: quidam enim hanc divisionem sic proponunt; Ens aliud est à se, aliud ab alio: alij sic; Entium, alia sunt

seu existunt *per essentiam*, alia *per participationem*: alij sic; *Ens aliud est necessarium, aliud contingens*. D E U S gloriosus est Ens infinitum, ab alio non habens existentiam: item est Ens per essentiam, & summè necessarium: Creaturæ verò sunt entia finita, ab alio existentiam habentia, ideoque non necessaria, sed contingentia.

2. Duo primi modi proponendi hanc divisionem, explicatione non egent: duo verò postremi, non ita perspicui sunt: idcirco longiorem explicationem postulant: ego exordiar à postrema divisione, quæ est in Ens *necessarium*, & Ens *contingens*. Dicitur D E U S gloriosus Ens necessarium; quia necesse est eum semper actu existere; neque enim potest D E U S privare seipsum suo esse, id est, existentia actu, neque aliud quidpiam id potest, cùm ab alio non pendeat. Creaturæ verò sunt entia contingentia; id est, contingenter existunt: pendent enim à conservativa virtute causæ liberè agentis; id est, D E I, qui antequam dedit ijs esse, potuit illud non dare; & postquam dedit, potest auferre.

3. Multa hinc objici solent de necessitate substantiarum separatarum, corporum coelestium, materiæ primæ, naturarum universalium, & propositionum necessariarum, quibus æterna veritas à Philosophis tribuitur: verum quia spino-
sæ

nosæ istæ quæstiones, multos sua difficultate deterrent, & avocant à studijs Philosophicis: ego ijs omissis, ad alia pergam, quæ magis necessaria & jucunda sunt.

ART. II.

Proponitur secunda divisio Entis realis, & probatur solum DEUM esse Ens per essentiam.

ALtera divisio est in Ens per essentiam, & Ens per participationem: Ens per essentiam, est DEUS gloriosus, qui vi suæ essentiæ existit: entia verò per participationem, sunt entia creata, quæ non habent actualem & realem existentiam in mundo, nisi communicatam & participatam ab alio, à quo producta sunt; hoc est, à DEO. Vt autem intelligatur, quo modo DEUS dicatur vi suæ essentiæ existere, teneantur hæc fundamenta: Primò, Existentia DEI est de ejus essentia; hoc est, non est quid superadditum divinæ essentiæ, neque à nobis concipi debet, tanquam quid ei superadditum, sed est aliquid in ipsa DEI essentia inclusum, non minùs, quàm animalitas aut rationalitas in essentia humana clauditur: hoc autem sic ostenditur: omnis perfectio substantialis est de essentia DEI (non enim esset essentia DEI in-

finitæ perfectionis, si daretur aliqua perfectio, quam ejus essentia non claudit in se) sed existentia est substantialis perfectio, ut cuius manifestum est: ergo est de essentia DEI. Sicut igitur est de essentia hominis esse animal, aut corpus, aut substantiam, ita est de essentia DEI esse aliquid actu existens.

2. Contra verò, neque necesse, neque possibile est, existentiam creaturæ esse de eius essentia. Non est necesse, quia essentia creaturæ, non est infinitæ perfectionis. Non est possibile, quia quicquid est de essentia rei, illud necessario rei competit, eiusque affirmatio de ea re est necessaria, & æternæ veritatis. At existentia ita se non habet in creaturis: non enim verè dico, necesse est rosam existere, aut necesse est tonitru existere: possunt enim non existere. At verè dico, necesse est rosam esse florem: aut tonitru esse sonum, etiam rosa & tonitru non existentibus. Vnde patet has esse prædicationes essentielles: non verò illas. Hæc ratio non solum probat existentiam non esse de essentia creaturæ: sed etiam existentiam non necessario essentiam creaturæ consequi, aut ab ea dimanare. Quicquid enim est essenziale promanando, illud necessario de re, cui est essenziale, affirmatur: at existentia actualis (ut dictum est) contingenter creaturis competit. Interim admittimus existentia capacitem seu potentiam, non contingenter,

genter, sed necessario & essentialiter competere omni reali enti, sive creato, sive increato: sed non idem de actuali existentia dicendum est.

3. Secundum fundamentum sit hoc: Si quis quærat undenam sit, quòd DEUS existat, & non possit non existere: nulla potest afferri ratio, præter hanc unam, videlicet quia eius essentia est infinitæ perfectionis; id est, omnem perfectionem in se claudit, atque adeo etiam existentiam. Vnde patet DEUM rectè dici vi suæ essentia existere. At si de creaturis moveatur quæstio, undenam videlicet sit, quòd illæ iam actua existant: non respondendum est illud ideo fieri, quia talis est earum essentia, aut quia ea est essentia ipsarum conditio: earum enim essentia est indifferens ad existere & non existere; id est, potest existere vel non existere pro DEI arbitrio. Sed respondendum est, veram illius rei rationem esse, quia earum essentia, quæ prius erat possibilis & apta ad existendum solummodo, iam ipso existentia actu à DEO & causis secundis donata est. Non ergo possunt creaturæ dici existere vi suæ essentia, sed vi causarum, à quibus productæ sunt, præcipuè autem primæ causæ. Vnde sequitur eas non esse entia per essentiam suam, sed per participationem & receptionem existentia à prima causa. Præterea huius rei ratio reddi potest ex hoc fundamento,

damento, admodum perspicuo: ea est essentia divina conditio, ut non possit non existerre, neque existentiam suam ab alio participare: ea verò est essentia creatæ conditio, ut possit pro arbitrio primæ causæ, existentiam habere aut non habere, & ut non possit existerre, nisi participando existentia actum à prima causa. Vnde patet, primam causam, vi suæ essentia, existerre: causas verò secundas, seu entia creatæ, vi suæ essentia, non existerre, sed per actionem primæ causæ, à qua actualem existentiam accipiunt.

4. Tertium fundamentum. Essentia creaturæ rectè & verè appellatur potentia; existentia verò creaturæ benè dici potest actus superadditus essentia: hoc autem sic declaratur: sicut materia Physica appellatur potentia, & forma Physica actus, quia materia in se, & ex se, nullam habet formam, sed formæ capax est, seu potest recipere formam: sic essentia creaturæ potest dici potentia, quia neque in se claudit existentiam, neque eam à se habet, sed ejus capax est seu potest eam recipere, & participare à prima causa: at contrà, **DEI** essentia longè aliter se habet, in se enim claudit existendi actum: ideoque non se habet ad existentiam, ut potentia ad actum, nulla enim potentia in se claudit actum, sed ad actum tanquam ad quid externum refertur. Atq; hæc de divisione Entis in finitum & infinitum.

ART. III.

Affertur tertia divisio Entis realis, & explicatur quomodo DEUS sit actus purus.

I. **T**ertio dividitur ens reale, in illud quod merè est actuale, illud quod merè est potentiale, & illud quod est partim actuale, partim potentiale, seu ex potentia & actu mixtum. Ens merè potentiale, est illud quod actu non existit, sed existere potest: tale ens est rosa in hyeme. Notandum hìc est, Philosophos passim dicere, ea entia quæ actu non existunt, sed realiter existere possunt, esse *in potentia objectiva*: objectum enim potentix productivæ quæ causis inest, est id quod à causis est producibile, seu id quod à causis existentiam nondum accepit, sed accipere potest. Ens igitur aliquod possibile, quamdiu non actu existit, est objectum potentix productivæ causarum, ideoque dicitur esse *in potentia objectiva*, quia videlicet habet eam potentiam, quæ competit rebus quamdiu sunt objecta potentix alicujus causativæ. Vbi verò illud ens actu productum est, & existentiam accepit à causis, non amplius est objectum potentix productivæ causarum, & ob id dicitur non esse *in potentia objectiva*.

2. Ens

2. Ens merè actuale, seu actus purus, est Deus gloriosus, cui hæc summa & perfecta actualitas tribuitur: primò, ad indicandam ejus simplicitatem: ei enim repugnat omnis compositio ex potentia & actu; id est, ex principio aliquo potentiâli vel imperfecto, & principio actuali; hoc est, actuante & perficiente illud alterum principium, ut postea declarabimus in doctrina de Deo. Secundò, ad removendam & excludendam omnem potentiam, quæ imperfectionem aliquam arguit. Tria autem sunt potentialium genera, quæ ob imperfectionem suam Deo tribui nequeunt: nimirum potentia objectiva, quæ nihil est aliud, quàm rei producibilitas, à causis suis: secundò, potentia passiva, quæ rebus competit quatenus possunt ab agente aliquo pati & transmutari: tertio, potentia ad non esse. Prima potentia est rerum non existentium, ideoque Deo qui necessariò existit, nec unquam potuit non existere, attribui nequit: duæ posteriores sunt rerum existentium quidem, sed mutabilium & passibilium: Deus autem est immutabilis, & impassibilis. At potentia activæ longè alia est ratio, nam potentia activa, ut benè observarunt Metaphysici, potius virtutis vel facultatis nomen meretur, quàm potentia: nam unumquodque agit in quantum est in actu, unde ipsa vis agendi actualitas quædam est. Sed inquit aliquis: omnis potentia est
suo

suo actu imperfectior: quicquid autem est imperfectum, vel absolutè, vel comparativè, à DEO removendum est. Respondetur, potentiam etiam activam in creaturis sæpenumero esse imperfectiorem suo actu, idque quia creaturæ perfectio in operatione & exercitio potentiae est posita, estque perfectior cum agit, quam cum non agit: at DEUS non ita se habet, ejus enim summa & infinita perfectio, ac beatitudo, in eo est posita, quòd sit DEUS, ideoque non melius aut perfectius se habet, cum agit, quam cum non agit.

3. Ens constans ex potentia & actu, est *Ens finitum actu existens in mundo*: dicitur autem ejusmodi ens, constare ex actu & potentia, seu esse partim actuale, partim potentiale, ob duas rationes: Primò, quia in entibus finitis variae reperiuntur compositiones, nimirum ex genere & differentia, ex materia & forma, ex partibus integrantibus, ex essentia & existentia, ex essentia existente & subsistentiâ illi superadditâ, ex subiecto & accidente. In omnibus autem his compositionibus, (eâ solâ exceptâ quæ ex partibus integrantibus) est unum principium potentiale & receptivum, quod ob id appellatur potentia, alterum actuale & perfectivum, quod ob id dicitur actus: prioris generis principium, in omni compositione subternitur, & posterioris generis principium ei superadditur.

additur. Hinc patet entia finita rectè dici composita ex potentia & actu. Secunda ratio est hæc: Entia finita, quamvis actu existant, & sic aliquè actum & perfectionem habeant, non tamen sunt merè actualia & perfecta, sed habent tria illa potentiarum genera imperfectionem arguentium. Primò enim, priusquam existant, habent obiectivam illam potentiam ad existendum. Secundò, cùm existunt, habent potentiam passivam, & receptivam novorum accidentium. Tertiò, habent potentiam ad non esse, possunt enim à prima causa aboleri, & in nihilum redigi.

A R T. IV.

Afferitur quarta divisio Entis realis, quæ est petita à modis existendi.

I. **Q**uarta divisio Entis realis, peti potest à modis existendi; hoc est, modis actuali existentie superadditis: in omni enim Ente, actu existente, hæc tria considerari possunt: Primò, quòd habeat talem essentiam & naturam, per quam constituitur in certo genere Entis, & ab omnibus aliis entibus distinguitur. Secundò, quòd actu existat in mundo, & sic habeat existendi actum, suæ essentie superadditum. Tertiò,

tiò, quòd habeat talem existendi modum, suæ naturæ convenientem: substantiæ enim singulares, & completæ, ita sunt & existunt, ut non in alio sint, sed per se existant: contrà verò accidentia singularia, ut hæc albedo, hæc nigredo, ita sunt & existunt, ut non per se, sed in alio existant: unde patet duos esse generales modos existendi, ipsi existentia superadditos; prior est *perfectas* existendi, seu modus existendi *per se*, & non *in alio*: posterior est, modus existendi *in alio*, & non *per se*.

2. Hispositis, quarta divisio Entis realis, sic concipi potest: omne Ens reale, vel ita existit, ut nullo modo alteri inesse aut communicari possit; vel ita existit, ut actu in alio sit, aut saltem in alio esse possit: exempli gratiâ, hic homo, hic equus, hic lapis, nullo modo alteri insunt, per modum partis, aut formæ essentialis, aut accidentalis, vel quasi formæ: contrà verò horum membra ijs insunt, per modum partium; & accidentia ipsorum ijs insunt, per modum formarum accidentalium: dixi, *aut saltem in alio esse possit*, propter animas humanas à corpore seperatas, quæ quamvis actu non sunt in alio, in alio tamen esse possunt, ad modum partium. Ut autem hæc melius intelligantur, enumeranda sunt earum rerum genera, quæ aliquo modo dici possunt esse in alio, per modum partis, aut formæ.

3. Primò

3. Primò accidentia existunt in subjecto suo: secundò, partes tum essentialia, tum integrales, in toto suo: tertio, ipsa natura rei totalis & singularis, est in eo cuius est natura, per modum formæ: natura enim rei, seu essentia, se habet ad modum formæ: id verò cuius est essentia, se habet ad modum materiæ, ideoque non solum universalis natura inest in singularibus, sed etiam singularis natura inest in eo supposito cuius est natura: sic singularis natura Petri, est in ipso Petro: hoc est, in Petro includitur: Petrus enim non est humanitas Petri, sed est quid constans ex sua humanitate singulari, & subsistentiâ ei superadditâ, ideoque singularis eius humanitas ei inesse dicitur.

4. Quæcunque ad has tres classes referri possunt, ea non *subsistere*, seu *per se existere*, sed *alteri inexistere*, (si ita loqui liceat) dicenda sunt; ea verò quæ ad nullam istarum classium referuntur, subsistere seu per se existere dicuntur: subsistentia enim nihil est aliud, quàm modus quidam existendi, quo Ens aliquod ita existit, ut nullo modo alteri rei insit, sed aliis rebus ei inexistensibus substernatur, & supponatur: unde eiusmodi Ens Latine suppositum, Græcè hypostasis vocatur.

5. Notandum hîc est, hæc vocabula *hypostis* & *subsistentia*, esse valde ambigua, & sex significata habere, quorum tria prima minùs propria

propria sunt , & apud Philosophos non usitata: tria verò postrema magis Philosophica sunt. Primò, accipitur hypostasis seu subsistentia, pro ipsa re subsistente; hoc est, pro supposito, aut persona. Secundò, pro vero *esse*, non pro inani ejus specie, item pro *esse* fixo & permanente. Tertio, pro eo quod quovis modo subest: quo pacto in ædificio fundamentum, in columna basis, in vino fæx, in urina sedimentum, hypostasis & subsistentia dicitur.

6 Apud Philosophos autem *subsistere*, primò, sumitur pro *esse per se*; hoc est, non in subjecto inhæsionis: quo pacto omnis & sola substância, siue ea sit vniversalis, siue particularis, siue item sit completa & totalis, siue incompleta & partialis, verè dicitur Ens subsistens, seu Ens per se, non in alio existens; contrà vero accidentia, hoc modo non subsistunt, sed in alio existunt. Secundò, illud subsistere dicitur, quod nō existit in alio, ita ut ab eo pendeat quoad existendi actum; id est, ita ut propter imperfectum suum existendi modum extra illud, & per se existere nequeat. Hoc significatu non solùm negamus accidentia, sed etiam substantias universales subsistere; idq; quia à primis pendent quoad existentiam actualem, nam in iis & earum beneficio existunt. Secundò, negamus materiam, omnesq; formas substantiales è materiæ potentia educibiles, hoc modo subsistere: ita enim

C

pendent

pendent à supposito in quo insunt, ut per se & extra omne suppositum existerent nequeant. Dixi, formas è *materia potentia educibiles*, ad excludendam animam humanam, cujus alia est ratio, ut statim patebit. Dixi, *extra omne suppositum*, quia materia potest quidem existeret extra hoc vel illud suppositum, ut extra Socratem, aut extra Platonem, potest enim his mortuis alterius suppositi constitutionem ingredi, & ab eo sustentari, non tamen potest existeret extra omne suppositum. Tertio, negamus ipsas substantias singulares, abstractis nominibus significatas; hoc est, singulares essentias substantiarum creaturarum hoc modo subsistere: singularis enim humanitas Petri, ita in ipso Petro existit, ut per se & extra omne suppositum existeret nequeat, singularis item humanitas CHRISTI, ita in CHRISTO existit, ut modo ineffabili ab ejus gloriosissima persona pendeat in suo esse. Quamvis igitur singulares homines, per se & nullo modo in alio existant, singulares tamen naturæ humanæ, non per se, sed in singularibus suis suppositis, hoc est, hominibus existunt. Dicet aliquis: singularis homo, & singularis natura humana, idem sunt. Respondetur, illud esse falsissimum, singularis enim homo, non est singularis humanitas, sed est quid constans ex singulari naturâ humanâ, & subsistentiâ ei superadditâ, ut in progressu patebit. Vnde secunda persona Trinitatis, à Theologis

logis dicitur assumpsisse singularem naturam humanam, non verò singularem hominem.

7 At contrà, hac significatione subsistentiam tribuimus, primò, omnibus singularibus substantiis completis & prædicamentalibus, hoc est, concreto nomine significatis; quales sunt, hic homo, hic equus: item personis adorandæ Trinitatis, idq; quia hæc omnia in nulla re existunt tanquam partes, aut formæ essentielles aut accidentales. Secundò, hoc sensu etiam asserimus essentiam Divinam seu Deitatem, quamvis in tribus personis adorandæ Trinitatis existat, revera subsistere: idem etiam dicimus de anima humana, quamvis ea sit in corpore, ut forma in materiâ; & in composito, ut pars in toto: idque quia neque essentia D E I à personis divinis in suo esse pendet, hoc enim imperfectionem arguit; neque anima rationalis à materia & composito, potest enim existere sine illis, & revera existit, cum à corpore separatur.

8 Tertiò, id subsistere dicitur; quod neque actu neq; potestate existit in alio; hoc est, quod non potest includi in aliquo supposito: hoc significatu is omnibus negatur subsistentia, quæ in aliquo supposito existunt; sive ab eo pendeant quoad existendi actum, sive non; quo pacto animam humanam, & gloriosissimam D E I essentiam subsistere negamus: illa enim est in homine ut pars in toto; hæc verò, ineffabili modo, in

tribus personis Trinitatis existit: ideoque hoc sensu sola & omnia supposita, subsistere & subsistentiam habere dicimus: suppositum enim omne ita existit, ut nullo modo possit in alio supposito existere, tanquam accidens in subiecto, pars in toto, aut natura in eo quod naturam habet. Hinc est quod dicant Philosophi, suppositum esse quid *incommunicabile pluribus*, & omnino ineptum ad existendum in alio. Ex his patet, in quarta hac divisione Entis, subsistentiā ultimo hoc modo accipiendam esse: nam in ea per Ens subsistens, intelligo illud, quod nullo modo alteri inest, tanquam accidens in subiecto, pars in toto, aut natura, sive universalis, sive singularis, in suo supposito. Per Ens vero alteri inexistens, intelligo id, quod aliquo modo est alteri communicabile, h. e. aptum alteri inesse.

A R T. V.

Explicatio istarum vocum, Ens, Essentia, Existentia, Subsistentia, Suppositum, & Persona.

I. **E S S E N T I A** variis modis à Philosophis describi solet. 1. sic; *Essentia rei est id quod definitione explicatur.* 2. sic; *Essentia est id, per quod res constituitur in certo genere Entis,*

tis, & ab omnibus aliis distinguitur. 3. sic; *Essentia est primum ac radicale & intimum principium omnium rei actionum, & proprietatum.* e.g. multarum operationum humanarum principia sunt habitus in animis hominum existentes: habituum principia sunt potentia naturales ab essentia fluentes: potentiarum principium est natura seu essentia humana: ipsa verò essentia humana, ex anima & corpore constans, nullum habet principium sui productivum, & effectivum, in homine existens: h.e. nihil in ipso homine inveniri potest, à quo profluat, aut dimanet ejus essentia. Dixi eam, nullum habere principium *effectivum*, in homine existens, quia certum est, eam habere principia constitutiva, tum Physica, tum Metaphysica. Cùm igitur rerum potentia naturales, potentiarumq; operationes, ab essentia originem suam trahant; essentia verò, nullam habeat causam efficientem se priorem, in ea re, cujus est essentia, meritò ea dicitur primum, ac radicale, & intimum principium omnium rei proprietatum, & actionum.

2 Denique essentia sic non incommodè describi potest; *Essentia est id, quod summè necessario, & omnium primò, rei convenit.* Dico *summè necessario*, ad excludenda accidentia communia, quæ contingenter ad sunt illi rei cujus accidentia sunt. Dico *omnium primò*, ad excludenda propria accidentia, quæ licèt necessario

convenient suo subjecto, non tamen primò ei insunt, sed priùs inest essentia, à qua dimanant. Hæc igitur est generalis regula, *Quicquid summè necessario, omnium primò, & intimè rei inest, illud est rei essentia: quicquid verò aut contingenter inest, aut propter aliud à quo profluit, quicquid item est adventitium, & non intimum, illud est aliquid essentia superadditum, non verò ipsa essentia.*

3 *Existencia* præcipuè ab *essentia* differt munere, & officio: *essentia* enim munus est, rem in certo genere entis constituere, eamq; ab aliis omnibus distinguere. Sic homo per *essentiam* suam, quatenus nimirum est animal rationale, ab omnibus aliis entibus distinguitur. At *existentiæ* munus est, efficere ut res, talem *essentiam* habens, sit extra causas suas (ut loquuntur Metaphysici) aut potius, ut sit extra causarum virtutem, & potentiam productivam: res enim cum non existit, dicitur esse *in potentia causarum suarum*; quia est producibilis à causis suis, & per earum potentiam effectivam existeret potest: at ubi actu producta est, & existendi actum accepit, non ampliùs est in causarum potentia effectiva, sed educta est ex statu potentialitatis, in statum actualitatis; & durante eo statu, non est per causarum potentiam producibilis; oportet enim eam perire, & existendi actum, quem jam habet, amittere, priusquam à causis suis, denuò produci

produci, & existentiam accipere queat.

4 Differt hoc officium existentia, ab officio essentia, quod essentia munus in omnibus rebus sit stabile & perpetuum: contra verò, existentia munus in quibusdam sit variis mutationibus obnoxium, quia ipsa nunc adest, nunc abest: e.g. existentia rosa, aut tonitrus, quibusdam temporibus exercet suum munus, aliis verò temporibus non exercet; ut hyeme, cum rosa & tonitrus sunt in causarum suarum potentia, ut loquuntur. Contra verò, harum & similium rerum essentia, suum munus perpetuò exercet: si enim rosa existat, si non, rosa est flos, naturâ & essentialiter ab omnibus aliis floribus distinctus: & Physici habent scientiam de rosa, etiam cum non existit: quia nôrunt rosam esse florem ab aliis floribus distinctum, non solum naturâ seu essentiâ, sed etiam proprietatibus, virtute, & efficaciam: non enim putandum est, rosam cum non existit, amittere essenziale suum discrimen ab aliis floribus, aut cum iis quoad essentiam confundi. Ex his colligi potest hæc definitio existentia; *Existentia est modus essentia superadditus, efficiens ut res eam essentiam habens, sit extra suas causas in mundo.*

5 Explicatis his vocibus, *Essentia*, & *Existentia*, facile est scire quid sit *Ens*: differt enim *Ens* ab essentiâ, & existentia, ut concretum à

duobus abstractis: item ut id quod habet, ab iis quæ ab eo habentur: nihil enim aliud est Ens, quàm id quod habet essentiam, aut existentiam. Notandum hìc est, Ens duobus modis accipi, *participialiter, & nominaliter*, ut loquuntur. Ens, ut est participium verbi *sum*, significat id, quod est actu existens: Ens verò, quatenus est nomen verbale, significat id, quod habet essentiam, existentia capacem, sive actu existat, sive non: & ut loquitur *Snarez*, significat ipsum *esse*, non ut exercitum actu, sed in potentia, vel aptitudine. Sic vivens, ut est participium, significat actualem usum vitæ: ut verò est nomen, significat id solum, quod habet eam essentiam, quæ potest esse vitalis operationis principium:

6 Subsistentia propriè, & in tertio significato accepta, in hoc convenit cum existentia, quod neque hæc, neque illa, sit ipsum Ens, aut essentia Entis, sed modus Entis: differt tamen ab eâ, primò, quòd existentia latius pateat, quàm subsistentia: illa enim competit omnibus, tum substantiis, tum accidentibus: hæc verò convenit solis substantiis singularibus completis, quatenus cōcretis nominibus significantur: ut huic homini, huic equo, huic leoni: nam ut superiori articulo monui, hæc humanitas singularis aut hæc equinitas singularis, non subsistere, sed alteri inexistere dicitur: nimirum quia illa inest huic homini, hæc vero huic equo. Secundò, differunt existentia, & subsistentia, ratione muneris, seu officii sui;

munus

munus enim existentia, est efficere, ut res aliqua actu sit in mundo, extra causarum virtutem, aut potentiam: munus verò subsistentia est, efficere, ut res nullo modo possit esse in alio, vel ut pars in toto, vel tanquam accidens in subjecto, vel tanquam natura, seu essentia, in eo quod habet essentiam. Tertiò, differunt ut determinans & determinatum: sicut enim essentia est ex se indifferens ad existere, & non existere, ita existentia, est ex se indifferens ad esse in alio, & esse per se, seu subsistere; h. e. existentia est indifferens ad modum existendi innitendo alteri ut sustentanti, & ad modum existendi per se, sine dependentia ab alio recipiente & sustentante. Subsistentia igitur sic describi potest: *Subsistentia, est modus existentia superadditus, à quo res habet, quòd non in alio, sed per se existere possit.* Vnde à quibusdam dicitur omnimoda perfectitas existendi.

7 Ex his, quæ jam dicta sunt, colligere possumus, in qualibet singulari substantia, concreto nomine significata, tres hos actus cerni posse: primò, actum essentia singularis, per quem substantia ea est tale individuum, ab omnibus aliis distinctum: secundò, actum existentia, per quæ substantia talem singularem essentiam habens, est extra causas suas in mundo: tertiò, actum subsistentia, per quem ea ita est extra causas suas, ut non inexistat, aut innitatur alteri, sed aliis ei in-existentibus substat, & supponatur: unde ut supradictum

prà dictum est, *suppositum* appellatur.

8 *Suppositum* facilè explicatur, jam cognitâ naturâ subsistentiæ; nihil enim aliud est *suppositum*, quàm *id quod subsistentiam habet, suæ essentia & existentia superadditam*: seu id, quod in existendi actu nulli alteri innititur, sed aliis rebus ei innitentibus subternitur, & supponitur. Potest etiam sic explicari: *suppositum* est id, *quod nullo modo est communicabile pluribus nullo item modo alteri inesse potest, ad modum partis, aut formæ*. Singularis igitur humanitas Petri non est *suppositum*, quia verè dicitur esse in Petro: item natura humana CHRISTI non est *suppositum*; ob eandem rationem: at ipse Petrus est *suppositum*, quia non inest alteri, tanquã pars in toto, accidens in subiecto, aut natura in eo quod naturam habet. Similiter CHRISTUS, & qualibet alia persona Trinitatis, est *suppositum* ob eandem rationem. Accidentia non sunt *supposita*, sive sint universalia, sive singularia, quia subiectis suis insunt & innituntur. Substantiæ etiam universales non sunt *supposita*, quia singularibus communicantur, & insunt. Denique DEUS gloriosus, quatenus est communis, inefabili modo, tribus personis Trinitatis, non est *suppositum*: idque quia, est de ratione *suppositi*, quòd non possit communicari, aut inesse alteri *supposito*: at DEUS, aut Deitas, communicatur, & inest tribus personis Trinitatis.

9 *Persona* in hoc differt à *supposito*, quòd omnis *persona* sit *suppositum*, sed non omne *suppositum* sit *persona*: *persona* enim nihil est aliud,quàm *suppositum* ratione præditum: unde à *Boëtio* sic describitur; *Est rationalis naturæ individua substantia*. Quare *suppositum* rectè dividitur in *rationale* & *irrationale*. *Suppositū* *rationale*, appellatur *persona*: *suppositum* *irrationale*, ut hic *equus*, hic *lapis*, non habet peculiare nomen sibi impositum. *Persona* dividitur, in *creatam* & *increatam*. *Personæ* *increatæ* sunt tres: *Pater*, *Filius*, & *Spiritus sanctus*. *Persona* *creata*, vel est *Angelica*, ut *Gabriel*, *Michael*: vel *humana*, ut *Petrus*, *Iohannes*.

ART. VI.

An in creaturis, suppositum & singularis eius natura, re differant.

I **N**ON statui, hìc ventilare celebrem illam controversiam, de discrimine & diversitate essentiaè ab existentia: utrum videlicet sit *realis*, an verò solius *rationis*: ea enim quæstio nullam habet utilitatem in *Theologia*, & spinosior est, & difficilior, quàm ut ab iis capi possit, qui in *Metaphysica* rudes, ac tyrones sunt. De discrimine tamen *subsistentiaè*, & *naturæ* seu *essentiaè*,

essentia, pauca dicam: istius enim quaestionis determinatio insignem usum habet in Theologia.

2 Duobus modis proponi solet hæc quaestio: primò, sic; Vtrum in suppositis creatis, subsistentia sit aliquid positivum, & realiter distinctum ab essentia singulari, cui superaddita est; an verò non sit. Secundò, sic; Vtrum suppositum, & singularis ejus natura, re differant: e.g. utrum Petrus, & singularis ejus natura humana, revera idem sint; an verò Petrus, qua Petrus, includat aliquid reale, & realiter diversum à singulari ejus natura. Sive hoc, sive illo modo proponatur quaestio, eadem controversia est; ideoque breviter respondeo, Petrum, & singularem ejus naturam, realiter differre, tanquam includens & inclusum, seu tanquam compositum & principium ejus constitutivum: suppositum enim omne creatum, ut Petrus, includit naturam singularem, & aliquid ei superadditum, subsistentiam nimirum: vel (ut planius dicam) omne suppositum creatum est realiter compositum ex essentia singulari & subsistentia ei superadditâ, quam nonnulli suppositalitatem, alii personalitatem vocant. Si igitur comparemus suppositum ad naturam singularem, distinguuntur ut totum & pars; at si comparisonem instituamus inter naturam ipsam singularem, & subsistentiam, ut inter singularem naturam humanam Petri, & Petri subsistentiam, seu personalitatem, tum inter

ter se contradistinguuntur, tanquam duo extrema componentia suppositum illud creatum, Petrum videlicet. Vt autem hæc sententia stabilatur, primò probandum est, subsistentiam, seu supposititalitatem, non esse meram negationem, ut opinatur *Scotus*, sed esse positivum quid, simul cum natura singulari constituens Petrum, quatenus est suppositum. Secundò, positivum illud, non ratione sola, sed realiter differre à naturâ singulari, cum qua constituit Petrum: inde autem manifestè inferam, Petrum realiter differre à singulari suâ naturâ humanâ, ejusque naturam humanam, verè, & propriè dici in eo esse. Si enim petrus, quatenus est Petrus, seu quatenus est particularis quædam persona humana, hæc duo, i.e. humanitatem singularem, & personalitatem suam, tanquam duo principia constitutiva, re distincta, includat; necesse est ejus humanitatem singularem, re ab ipso differre, & tam vere esse in eo, quàm aut materia, aut forma ipsius in eo esse dicitur.

3 *Scotus, in. 3. Sent. dist. 1. qu. 1.* dicit omne suppositum, præter naturam singularem, includere etiam subsistentiam: sed asserit subsistentiam, esse meram negationem aptitudinis, seu potentiæ essendi in alio supposito: naturæ enim singulares, habent potentiam existendi in supposito: at ipsum suppositum, ut Petrus, in nullo alio supposito esse potest, ideoque ex ejus
sententia

sententia, suppositum, qua tale est, constituitur per negationem hujus potentia existendi in supposito. Hæc sententia merito rejicitur à *Frācisco Suarez, disp: Met: 34. sect. 2.* Primò, quia subsistentia, quam suppositum addit naturæ singulari, est perfectio quædam substantialis: sed mera negatio non potest esse perfectio substantialis; ergo mera negatio non est subsistentia. Secundò, si subsistentia, aut personalitas, sit mera negatio, tres personæ Trinitatis in suo esse personali constituentur, & à se invicem distinguuntur per solam negationem: distinguuntur enim per suas subsistentias, aut personalitates: sed hoc est absurdum, & mysterium Trinitatis planè destruit: Ergo subsistentia non est mera negatio, sed positivum aliquid essentia singulari superadditum, ad constituendum suppositum.

4 Iam probandum est contra *Durandum, in 1. sent. dist. 34.* subsistentiam esse quid realiter diversum ab essentia, seu natura singulari creaturarum substantiarum (nam de Deo longè aliter sentiendum est;) illud autem perspicuè ostenditur hac ratione: *alibi* assumpsit naturam humanam singularem, non autem assumpsit suppositum humanum seu personam humanam; sic enim non esset una simplex persona, sed gemina: Ergo suppositum humanum, & singularis ejus natura sunt re diversa; ideoque revera aliquid includitur in supposito humano, præter ejus naturam singularem:

singularem : hoc autem non potest esse aliud, quàm subsistentia, seu personalitas.

5 Hæc ratio etiam sic proponi solet : quæ possunt separari realiter , ea non sunt realiter idem ; at subsistentia separari potest à singulari natura : Ergo non sunt realiter idem quid. Probatursumptio : *αβι* ⊙ assumpsit singularem naturam humanam ; at non assumpsit personalitatem, aut subsistentiam humanam , ut fatentur omnes Theologi ; Ergo separari possunt. Hæc ratio non solum probat subsistentiam re differre à natura specifica, quæ communis est omnibus individuis ; sed etiam à natura individuali, seu singulari ; ideoque apertè falsam esse eorum sententiam, qui dicunt subsistentiam aut personalitatem Petri esse ejus differentiam individualem : C H R I S T U S enim non assumpsit naturam humanam in communi, sed humanitatem singularem ; at non assumpsit singularem personam : revera igitur , singularis persona differt à singulari natura ; & aliquid includit, quod non includitur in natura singulari ; subsistentiam nimirum, & personalitatem.

6 Duabus his rationibus perspicue probatur, suppositum omne, præter singularem suam naturam, includere positivum aliquid, realiter ab ea natura distinctum, nimirum subsistentiam ; & ob id suppositum omne creatum, esse realiter compositum ex singulari sua natura, & subsistentia,

tia, quam alii supposititalitatem vocant. Dicit aliquis: si subsistentia sit aliquid reale, re distinctum ab essentia, vel est materia, vel forma, vel ipsum compositum, vel aliquod ejus accidens. Resp: illud, quod in constitutione suppositi superadditur naturæ singulari, non esse Ens aliquod propriè, sed modum Entis: ideoque neq; esse materiam, neque formam, neque compositum, neque ejus accidens.

A R T. VII.

Quæ sit causa cur compositionem ex essentia & existentia, item ex essentia & subsistentia; creatis substantiis, non autem DEO tribuant Philosophi.

I. **S**ubstantiæ creatæ singulares tribus modis possunt considerari, ut suprâ dictum est. Primò, quatenus habent talem essentiam. Secundò, quatenus sunt entia actu existentia in mundo. Tertiò, quatenus habent talem existendi modum, seu quatenus sunt supposita. Si primo modo considerentur, habent compositionem ex suæ essentiæ partibus Physicis, & ejusdem gradibus Metaphysicis: e. g. si Socrates consideretur quatenus est homo, Physicè constituitur ex materia & forma sua: item Metaphysicè,

physicè, aut Logicè, ex genere & differentia; h. e. ex animali & rationali. Si singulares substantiæ secundo modo considerentur, duo includunt, videlicet *essentiam* & *existentiam*; hæc autem, saltem secundum nostrum concipiendi modum, se habent ut potentia & actus, ut suprà explicavi: ideoque cum ex potentia & actu semper fiat compositum aliquod unum per se, meritò dicimus singulares substantias sic consideratas, esse compositas ex essentia & existentia; h. e. ex natura & existendi actu. Sic Petrus quatenus est homo actu existens in mundo, hæc duo includit, naturam humanam, & existendi actum, includit (inquam) tanquam duo principia ex quibus constituitur.

2. Si singulares substantiæ creatæ tertio modo considerentur, i. e. si considerentur quatenus sunt supposita, non solum habentia essentiam actu existentem in mundo, sed etiam talem modum existendi, nimirum per se & non in alio; si (inquam) sic considerentur, duo includunt, videlicet essentiam actu existentem, & subsistentiam, seu modum per se existendi, illi essentiæ existenti superadditum: essentia autem seu natura singularis substantiæ creatæ, est potentia respectu subsistentiæ, & subsistentia est ejus actus ei superadditus, eamque perficiens; ideoque ex essentiâ seu naturâ actu existente, & subsistentiâ ei superadditâ, meritò dicimus si-

eri aliquod unum per se; videlicet ipsum suppositum. Sic Petrus, quatenus est talis persona, includit singularem essentiam, per quam est singulare Ens; & singularem subsistentiam, per quam est persona singularis.

3. Quæret aliquis; quæ sit causa, cur istæ tres compositiones, DEO non attribuantur; cum essentia, existentia, & subsistentia, seu personalitas, in omnibus personis Trinitatis inveniantur, non minùs quàm in personis humanis & Angelicis: quælibet enim persona Trinitatis suam habet essentiam, & existentiam, sibi cum reliquis personis Trinitatis communem; habet etiam suam propriam subsistentiam, aut personalitatem, per quam à reliquis personis differt. Respondetur, earum compositionum nullam posse DEO attribui, salvâ ejus simplicitate, salvâ item infinitâ perfectione, & dignitate gloriosissimæ illius naturæ. Hoc autem manifestum evadet, si istas compositiones sigillatim, & seorsim consideremus & perpendamus.

4. Primò igitur, compositio essentialis, tum Physica, tum Metaphysica, à DEO removenda est: illa quidem, quia spirituales naturam evertit; hæc verò, quia DEUS sub nullo genere univoco continetur, ut postea probabitur (DEO favente) in quæstionibus de DEO. Secundò, compositio ex essentia & existentia, à DEO removetur, ob duas rationes: primò, quia
ad

ad omnem compositionem, sive sit realis, sive rationis, requiritur ut unum superaddatur alteri, propter constitutionem alicujus tertii: at existentia, neque revera, neque secundum nostrum concipiendi modum, est aliquid superadditum essentia^e DEI, sed potius est aliquid in ipsa DEI essentia inclusum, ut declaravi *Art. 1.* Ergo existentia DEI non potest cum ejus essentia concurrere ad constituendum aliquod tertium. Secundò, compositio ex essentia & existentia, tribuitur substantijs creatis, quia earum *esse* ita se habet ut potentia, & existentia ut actus illi superadditus: at essentia DEI non potest appellari potentia, respectu existentia^e divina^e, quia in se includit existentiam, ut dictum est loco jam citato: nulla autem potentia in se includit actum suum, sed ad actum tanquam ad aliquid ulterius & externum dirigitur.

5. De tertia compositione, quæ est supposito-
rum ex naturâ singulari & subsistentia, major est dubitatio; ea enim videtur Deo tribuenda, quia quælibet persona Trinitatis, hæc duo includit, essentiam divinam, quæ communis est omnibus tribus personis; & particularem suam personalitatem, per quam à reliquis duabus personis distinguitur; Ergò ex his duabus composita est. Si respondeas, personam aliquam ideo non esse compositam ex natura & subsistentia, quia subsistentia est aliquid in ipsa Dei

essentia inclusum, sicuti iam dictum est de existentia; facile confutaberis, si enim subsistentia aut personalitas Patris esset de essentia eius, esset toti Trinitati communis, sicut & ipsa eius essentia est. At hoc est absurdum: Ergo & illud. De hac controversia meam mentem aliquot assertionibus proponam.

6. Assert. 1. *Subsistentia, aut personalitas Patris (idem de Filii, & Sp. Sancti hypostasi dicatur) non differt ab ejus essentia ullo genere realis diversitatis, neque tanquam res à re, neque tanquam modus rei à re, sed ab ea differt solâ distinctione rationis.* Probatur hæc assert. sic; primò, quicquid est in Deo, est Deus, Ergo nihil est in Deo, quod revera, & à parte rei (ut loquuntur) ab ejus Deitate differt. Secundò, si persona Patris realiter componatur ex ejus essentia, & subsistentia seu personalitate, duo sequentur absurda: primò, Deum Patrem non esse absolutè loquendo & summè simplicem; summa enim simplicitas omnem compositionem tollit, imprimis autem realem: secundò, Deitatem esse alicujus rei partem, omnis autem pars est incompletum aliquid, & minùs perfectum quàm totum illud cujus est pars.

7. Assert. 2. *Deus non componitur ex natura & subsistentia, tali compositione, qualis cernitur in creatis substantiis.* Hæc assert: manifestè sequitur, & infertur ex præcedente: si enim
Deus

Deus non componitur realiter ex natura & subsistentia, non habet talem compositionem ex natura & subsistentia, qualem habent substantiæ creatæ; nam hæ componuntur ex natura & subsistentia, tanquam ex duobus principijs re ipsa distinctis, & ideo earum compositio realis est.

8. Assert: 3. *Quamvis subsistentia Patris de ejus essentia non sit, sed secundum nostrum concipiendi modum, sit aliquid ejus essentia superadditum, non tamen licet dicere, Patris personam esse ex ijs duabus compositam compositione rationis; imò non concipere debemus ista duo in Patre, tanquam duas partes eum componentes: cum enim concipimus Deitatem tanquam alicujus rei partem, formamus de Deo enormem conceptum, & imperfectionem non exiguan Deo affingimus. Quare laudanda, & imitanda videtur eorum modestia, qui piè sentiunt & profitentur, essentiam & personalitatem includi in persona Patris, Filii, & Sp: sancti, non per modum compositionis, sed per modum ineffabilis conjunctionis aut unionis.*

ART. VIII.

An hoc posito, quòd omnis perfectio sit de essentia Dei, sequatur subsistentiam personalem esse de eius essentia: & an Deus, quatenus est communicabilis tribus personis Trinitatis, sit persona, ut statuit Cajetanus.

1. **E**X præcedente doctrina, non levis oritur difficultas, de subsistentia seu personalitate: cùm enim statutum sit, omnem perfectionem esse de essentia Dei, necessario sequi videtur subsistentiam, seu personalitatem in eius essentia includi; ideoque Deum, quatenus est communis tribus personis Trinitatis, esse suppositum aut personam: ratio connexionis est; quia subsistentia est perfectio quædam substantialis, eaque non exigua; suppositum enim omne perfectiorem habet modum existendi, quàm natura quæ in supposito existit. Hic igitur duo discutienda sunt: primò, an subsistentia personalis sit de essentia Dei: secundò, an Deus quâ Deus, sit persona quædam toti Trinitati communis.

2. Ut prior difficultas tollatur, præmissis duabus observationibus, meam sententiam aliquot assertionibus proponam; primò tenendum

dum est subsistentiam tribus modis accipi à Philosophis, ut suprà dictum est: 1. enim ea subsistere dicuntur, quæ non existunt in subiecto inhæsionis: 2. ea quæ non ita insunt, ut ab iis in quibus insunt, quoad existendi actum pendeant: 3. ea quæ nullo modo alteri supposito insunt, aut inesse possunt. Secundò tenendum est, tribus his significationibus huius vocis, addi posse quartam, quæ licèt minùs frequens sit, non minùs tamen propria est. Illud enim Ens dici potest subsistere, quod ita existit ut à nulla causa procreante, aut conservante, in suo esse pendeat: hic modus existendi, *Dei* proprius est, nec ulli enti creato communicari potest; ideoque proculdubiò perfectissimus modus existendi est.

3. His positis, hæc sit Assert. 1. *Subsistentia primo & secundo modo accepta, est DEO essentialis, totique Trinitati communis*: sicut enim essentialiter *Deo* competit actu existere, ita etiam est de essentia *Dei* sic existere, ut neque in aliquo subiecto existat, neque ab aliquo supposito in quo est, quoad actum existendi pendeat.

4. Secunda Assert: *Subsistentia tertio modo accepta, etsi quatenus est in DEO, re non differat ab eius essentia, non tamen verè dici potest esse de essentia DEI*: quicquid enim est de essentia *Dei*, illud *Deo*, quâ *Deus* est, competit.

Si igitur personalitas est de essentia *Dei*, *Deus* quatenus est *Deus*, est persona, & per cōsequens, omnes tres personæ, quatenus sunt unus verus *Deus*, verè dici possunt una persona: quod sanè absurdū est, & nostrę fidei principiis contrarium.

5. Assert: 3. *Subsistentia quarto modo accepta, est de essentia DEI, seu est essenziale ejus attributum*; nam esse primum Ens, à se & non aliunde suum esse habens, est ipsissima natura seu essentia *DEI*.

6. Assert: 4. *Vocabulum hoc [perfectio] distinguendum est*; aliæ enim sunt perfectiones, quarum negatio imperfectionem importat, ut esse seu existere, vivere, esse Spiritum, esse bonum, esse justum: horum enim opposita, nimirum non existere, non vivere, &c. manifestæ imperfectiones sunt. Aliæ sunt perfectiones, quarum negatio nullam imperfectionem importat: sic sapientissima *DEI* decreta de creatione & gubernatione rerum, perfectiones sunt, sed eorum negatio nullam imperfectionem importat: quamvis enim *Deus* nulla talia decreta habuisset, imò quamvis contraria his decreta habuisset, imperfectior non fuisset: sic ambulare, currere, sedere, loqui, sunt perfectiones hōminis; sunt enim actus, omnisque actus est perfectio: at negatio horum actuum nullam imperfectionem involvit; quamvis negatio potentiarum ex quibus oriuntur, imperfectionis notam rei, cui

cui tribuitur, inurat: dico negationem horum actuum nullam imperfectionem involvere; quia homo non est imperfectior, cum non ambulat, quam cum ambulat, aut cum non loquitur, quam cum loquitur.

6. Prioris generis perfectiones omnes sunt de essentia DEI, illique, quâ DEUS est, necessario conveniunt: at de perfectionibus secundi ordinis, aliter sentiendum est; non enim sunt de essentia DEI, nec illi necessario conveniunt, quâ DEUS est: v. g. decreta DEI de hominum æterna salute, & morte, etsi re non differant ab ejus essentiâ, non tamen verè dicuntur esse de essentia DEI: si enim hoc esset verum, ex necessitate naturæ DEO inessent, & sic libertas secretorum divinorum tolleretur. Ad posterius entis perfectionum, subsistentiam personalem referimus; etsi enim ejus negatio, cum essentia finitæ creaturarum tribuitur, imperfectionem involvat; cum tamen Deitati, seu naturæ divinæ attribuitur, nulla imperfectionis labe eam aspergit: ratio imparitatis est hæc; essentia divina in se includit modum quendam existendi, longè perfectiorem subsistentiâ personali, nimirum modum existendi absque dependentia in essendo, ab ulla causa procreante, aut conservante: dico hunc modum existendi esse perfectiorem subsistentiâ personali, quia in eo posita est perfectio primi entis; & ob id creaturis communicari

communicari nequit: subsistentia verò personalis & hominibus, & Angelis communicatur. Contrà verò, essentia finita creaturarum in se neque existendi actum includit, neque ullum existendi modum personalitate perfectiorem: ideoque ea imperfecta est, ob defectum personalitatis, cùm Deitas nullo modo imperfecta sit, ob carentiam talis subsistentiæ.

8. *Franciscus Suarez, lib. 3. de Trinit. cap. 10.* aliam distinctionem perfectionis affert, se magis obscuram, & difficilem, ideoque eam hic non proponam: illud autem diligenter notandum est, quod isti distinctioni addit, videlicet divinitatem, præcis relationibus seu subsistentiis personalibus, non includere formalitates perfectiones earum: includere tamen illas eminenter, tum quia hoc necessarium est ad infinitatem illius entis; tum quia ipsa Deitas est radix, & fundamentum omnium illarum perfectionum.

9. Posterior quæstio facile solvitur, sublatâ priori difficultate: cùm enim DEO, ut est communis tribus personis, ea subsistentia non conveniat, quæ suppositorum est propria; intrepide dicendum est, DEUM sic consideratum non esse personam. At (inquit *Cajetanus*) DEUS quatenus est communis tribus personis, etsi non persona strictè & à seipso loquendo, potest tamen dici persona incompleta. Respondeo cū

Fonsecâ, in rebus divinis non usurpandas esse novas, & inusitatas locutiones, & ab omni Patrum consuetudine abhorrentes : præsertim cum quis decipi possit tali loquendi modo, & existimare tres personas esse unam personam, ut suppositum.

ART. IX.

An DEVS, ut est communis tribus personis, sit singularis substantia : & an tres personæ Trinitatis, sint tres singulares substantiæ.

Substantia apud Latinos à subsistendo (ut volunt nonnulli,) & à substando accidentibus (ut volunt alij) dicta est: juxta posteriorem Etymologiam, DEUS Opt. Max. non est substantia, sed substantiarum omnium principium, & causa: at juxta priorem, verissimè & propriissimè est substantia; non quidem universalis, sed singularis, & individua: substantiæ enim secundæ indigent primis, ut in ijs existant; at DEUS etiam quâ communis est tribus personis, nullâ re indiget, in qua existat. Sed objiciet aliquis: DEVS, ut est communis tribus personis Trinitatis, est prædicabilis de pluribus; Ergo est universalis, & secunda substantia. Respond. definitionem universalis,

universalis, sic concipiendam esse; *universale est id quod prædicari potest de ijs, quæ sunt plura secundum ipsum nomen universalis*: sic homo prædicatur de ijs quæ sunt plura secundum nomen hominis, i. e. de pluribus hominibus: at DEV prædicatur quidem de pluribus personis, non tamen dici potest prædicari de pluribus secundum nomen DEI, i. e. de pluribus DIIS. Alij dicunt illud esse universale, *quod prædicari potest de pluribus, in quibus dividitur, & multiplicatur*: sed eodem res redit.

2. Secundò ob. nulla prima seu singularis substantia sub se continet alias primas, seu singulares substantias: at DEVS sub se continet tres personas; quælibet autem persona est singularis substantia. Resp: nulla singularis substantia, sub se continet alias singulares substantias numero h. e. differentiis individualibus distinctas, potest tamen una singularis substantia sub se continere plures personas unam numero essentialiter habentes, & solis existendi modis distinctas.

3. Altera quæstio, in titulo proposita, est an tres personæ Trinitatis sint tres singulare substantiæ? Hujus quæstionis difficultas in hoc est posita; quòd Orthodoxi Patres statuunt filium esse Patri *ὁμοούσιον*, h. e. ut Ecclesia latinæ vertit, consubstantialem, sive unius & eiusdem substantiæ. ~~et~~ meritò Hieronymus in Epistola ad Damasum dixerit, *quis audeat ore sacrileg*

tres substantias in D E O concedere? Contrâ
verò, cum persona sit substantia singularis, tot
videntur esse singulares substantiæ in Deitate,
quot sunt in eâ personæ.

4. Huius quæstionis determinatio duabus
assertionibus comprehendi potest. Primò, novæ
& insolitæ locutiones in mysteriis fidei non sunt
usurpandæ: vitandi enim sunt omnes modi lo-
quendi, qui Hæreticis vel in speciem favere
videntur. Qui igitur de tribus personis ado-
randæ Trinitatis loquuntur, ii uti non debent
supradicto loquendi modo, dicentes eas esse
tres substantias; ne favere videantur *Arianis*,
Macedonianis, *Valentino Gentili*, & *eius secta-*
toribus. Secundò, nullo modo admitti potest
illa locutio, sed reiicienda est tanquam apertè
illâ, & *Tritheitica*: si enim tres personæ sint
tres substantiæ; vel sunt tres substantiæ finitæ,
vel sunt tres substantiæ infinitæ: non sunt tres
substantiæ finitæ, seu creatæ, ut patet: at neque
sunt tres substantiæ infinitæ, quia non sunt tres
III.

5. Consequentia non est valida argumenti
lati in contrarium: dabo enim similem conse-
quentiam, quæ planè vitiosa & inepta est, om-
ni iudicio: ut si hoc modo argumentetur ali-
quis; Petrus stans, Petrus sedens, & omne ali-
cuiusmodi aggregatum, est substantia singu-
laris accidente quodam vestita; Ergo quot sunt
talìa

talia aggregata, tot sunt singulares substantiæ accidentibus vestitæ. Si (inquam) aliquis sic argumentetur, vitiosa erit illatio; quia Petrus stans, & Petrus sedens sunt duo talia aggregata at non sunt duæ singulares substantiæ, sed unum numero & individua substantia. Quæret aliquis: quid ex antecedente isto, *persona est singularis substantia*, rectè & legitimè possit colligi. Respondetur hanc esse iustam, & licitam consequentiam; *persona est singularis substantia*, Ergo quot sunt personæ, tot sunt ea quibus singulis competit esse singularem substantiam.

A R T. X.

An CHRISTVS, quatenus homo, sit persona: item an CHRISTVS, quatenus homo, sit ubique.

1. **A**ffirmativam quæstionis partem probare videntur hæc argumenta. 1. Sic omnes singulares Boves, Equi, Leones, & sunt supposita irrationalia; ita etiam omnes singulares homines sunt supposita rationalia, & personæ: Ergo CHRISTUS, *quâ est singularis homo*, est persona. 2. Omnis singularis substantia completa, & concreto nomine significata, est suppositum, ut docent omnes Metaphysici.

physici; at C H R I S T U S, *quatenus est singularis homo*, est talis: ergo est suppositum: omne autem suppositum rationale est persona. 3. Homo singularis differt à singulari sua essentia, ut suppositum à natura in supposito existente; ergo C H R I S T U S, *quatenus est homo singularis*, est suppositum, & proinde persona.

2. Deinde si C H R I S T U S, *quatenus est homo*, sit persona, ut jam probatum est, vel est persona immensa, & ubique existens, vel est persona finita, & certo loco comprehensa: posterius admitti non potest, quia sic in C H R I S T O duæ essent personæ, una finita, altera infinita; ergo dicendum est prius, videlicet C H R I S T U M, *quatenus est homo*, esse personam immensam, in omni loco, & extra omnem locum existentem: & proinde non solum attendendum est, illam propositionem, C H R I S T U S *homo est ubique*, esse veram; sed etiam illam, C H R I S T V S *quatenus homo, est ubique*.

3. Ut huic quæstioni satisfiat, dico primò, ambiguum, & proinde distinguendam esse illam propositionem, C H R I S T V S, *quatenus hic homo, est persona*; nam ut loquitur Suarez, in tertiam partem D. Thome, Tom. I. quæst. 16. art. 11. illa particula *quatenus*, vel *reduplicat suppositum*, vel *reduplicat naturam*: hoc est, vel hic est ejus sensus; C H R I S T V S
ratione

ratione naturæ humanæ ab eo assumptæ est persona; & sic propositio est apertè falsa, nam CHRISTVS neque habet à sua humanitate quòd sit persona simpliciter, neque ab ea habet novam aliquam subsistentiam, aut personalitatem; sic enim in eo duplex esset hypostasi neque verum est dicere humanitatem ab eo assumptam, suam propriam subsistentiam, aut personalitatem habere, quia ea alteri inexistit & non subsistit: Idcirco negandum est CHRISTVM ratione naturæ suæ humanæ esse personam: vel hic est ejus sensus; CHRISTVS quatenus est suppositum humanam naturam includens, est persona; & sic propositio est verissima, ut probant tria illa argumenta in limine articuli posita; illud enim suppositum, in quo est humanitas, est persona.

Alii brevius respondent, CHRISTVM quatenus est hic homo, duo includere, videlicet *subsistentiam divinam, & naturam humanam; & dicunt CHRISTVM, quatenus est homo, esse personam respectu subsistentiæ divinæ, quam materialiter includit, non verò respectu naturæ humanæ assumptæ, quam magis formaliter & directè importat illa vox, hic homo.*

5. Dico secundo, illum modum loquendi CHRISTVS, *quatenus homo est, est persona* fugiendum esset: 1. Quia Nestoriano dogma

ti, quo duæ personæ *CHRISTO* tribuuntur, favere videtur. 2. Quia reduplicatio proprie accepta importat propriam rationem, vel causam cur attributum insit subjecto: certum autem est rationem, secundum quam personalitas *CHRISTO* competit, non esse in natura humana, & proinde *CHRISTVM* non satis commodè dici personam, quatenus est hic homo. 3. Quia Theologi, dum differunt de *CHRISTO*, & utantur illis reduplicationibus, *quatenus Deus, quatenus homo, aut quatenus hic homo*, non respiciunt *CHRISTI* subsistentiam personalem, sed naturam: designant enim naturam, secundum quam hæc, vel illa attributa, *CHRISTO* conveniunt: at personalitas non competit *CHRISTO*, secundum naturam humanam, ideoque insolens est illa locutio, *CHRISTVS, quatenus est hic homo, est persona*.

6 Quod ad alteram partem argumenti attingit, respondendum est ut suprà, *CHRISTUM, quatenus est hic homo*, duo includere, videlicet subsistentiam divinam, & naturam humanam ei superadditam: respectu subsistentiæ divinæ, quam materiali quadam ratione includit, dici potest *CHRISTUS, quatenus est hic homo*, esse persona immensa, & nullo loco definita: respectu naturæ humanæ quam magis formaliter, & directè importat illa vox, *hic homo*, recte negatur *CHRISTUM, quatenus est hic homo, esse personam immensam, & ubiq; existentem; idq;*

E

quia

quia ejus natura humana habet suum particulare ubi, & certo loco comprehenditur.

7 Cæterum licet illa propositio aliquo sensu vera sit, ut jam dictum est; quia tamen *Vbiquitariorum* errorem redolet, quia item sensus quem verba istius propositionis evidentius præ se ferunt, est absurdus, videlicet *quòd CHRISTVS ratione naturæ humanæ sit immensus; seu quòd ejus humanitas immensa sit; ideo rejicienda est, & sedulo cavenda.*

ART. XI.

An Vbiquitariorum argumenta ab unionem personali petita sint valida.

I **P**RIMA objectio eorum, qui humanæ CHRISTI naturæ, immensitatem quandam affingunt, sic proponi solet; *Quicquid personaliter conjunctum est cum toto ὅλῳ, illud existit ubicunq; existit ὁ λόγος: at natura humana CHRISTI est talis: Ergo.* Respondetur, propositionem esse apertè falsam: nam ex personali unionem duarum naturarum in CHRISTO, non non magis sequitur, humanitatem esse ubicunq; est Deitas, quàm ex unionem substantiali animæ nostræ cum materia capitis, sequitur capitis materiam esse ubicunq; est anima, h. e. esse in pede

pede, quia anima est in pede : dico eam esse substantialiter conjunctam toti animæ, quia tota anima est in toto corpore, & tota in qualibet ejus parte. Si igitur benè & acutè argumentantur *Ubiquista*, cùm talem syllogismum exstruunt, bona & efficax erit hæc argumentatio; *Quod substantialiter est conjunctum toti animæ, illud existit ubicunq; existit anima: at materia capitis est substantialiter conjuncta toti animæ: Ergo est ubicunq; est anima: anima autem est in materia pedis: Ergo etiam materia capitis est in materia pedis.*

2. Secunda ob. *Unio duarum naturarum in CHRISTO facta est, ἀσχετέως, καὶ ἀσασάτως: Ergo non existit earum una, nisi ubi existit altera: i. e. in omnibus locis coexistunt.* Respond. ad verba inseparabiliter & indistanter; cùm adhibentur ad explicandum modum, quo uniuntur duæ naturæ in personâ τῷ λόγῳ, duplicem usum habere: primò enim adhibentur, ad refellendū *Nestorii* errorem, qui has naturas non tantum distinxit, sed divisit & separavit, utriq; naturæ suam propriam hypostasim affingens; ideoque illas non conjunxit in unam hypostasim. Secundo ut sciamus istam unionem esse indissolubilem, & has naturas, postquam semel conjunctæ sunt, nunquam disjungi aut separari posse. Negamus igitur istam consequentiam, *humana & divina natura, indissolubiliter, & inseparabiliter,*

in una persona conjuncta sunt: Ergo ubicunq; existit earum una, ibi etiam existit altera; ratio est, quia per distinctionem localis præsentiæ duarum naturarum, earum unio non dissolvitur, sed potius naturarum veritas asseritur, & confusio tollitur.

3 Instabit aliquis primò : *Si istarum naturarum una ibi existit, ubi non existit altera, tum earum una, ab altera separatur: at verum est prius: Ergo etiam posterius.* Resp. Negando connexionem: anima enim humana, quæ tota est in materia capitis, est etiam tota in aliis membris, in quibus materia capitis non existit; at unio animæ cum materia capitis, hoc pacto non dissolvitur: nam, ut omnes nôrunt, anima non nisi per mortem hominis, divellitur & separatur à capite, & reliquis membris. Secundò inst. *Anima, quæ tota existit in materia capitis, & tota extra eam, non unitur capiti, unione adequatâ, & completâ; sed ei unitur, tanquam materia partiali & incompleta: contra vero unione adequatâ, & completâ, unitur toti corpori, quia anima ita est tota in toto corpore, ut nullo modo sit extra illud: Ergo, cum ex sententia Calvinistarum, tota Deitas existat in humanitate, & etiam tota extra eam, unio scilicet deitatis cum humanitate, non erit adequata, & completa.* Respond. Imparem esse rationem: unio enim animæ cum materia capitis, dicitur incompleta, quia non est unio totius

cum toto: i. e. totius formæ cum tota materia, sed cum ejus parte: at unio τὸ ἄλογον cum humana natura, est totius cum toto: i. e. totius Deitatis **C H R I S T I**, cum tota ejus humanitate in una hypostasi. Vera igitur ratio cur unio animæ cum materia capitis, sit inadæquata, non est quòd anima existat extra materiam capitis, sed quòd non sit unio totius cum toto: i. e. integræ formæ cum integra materia. Quamobrem non est, quòd *Vbiquitarii* nobis objciant, nos personā **C H R I S T I** solvere, naturas ipsius divellere, & inadæquatam conjunctionem naturarum ei affingere: sed contrà est quòd nos doleamus, & miremur, tam elumbia argumenta, tam pueriles ineptias, viris ab eruditione claris placere, & imponere potuisse.

4 Tert: ob. *Secunda persona Trinitatis, postquam humanam naturam assumpsit, semper & ubiq, est DEUS INCARNATUS: Ergo nusquam est EXCARNATUS*, ut insolenter loquitur *Philippus Nicolai*. Resp. Illud argumentum, nihil concludere contra nos, & proinde totum admitti posse: cùm enim incarnatio **DEI** posita sit, in humanæ naturæ assumptione, ejusq; conjunctione hypostatica cum divina, necesse est excarnationem (ut cum *Philippo Nicolai* loquar) significare humanæ naturæ depositionem, desertionem, & unionis jam factæ dissolutionē: absit autem dicamus, beatissimum ἁλόγον, carnem,

E 3

quam

quam in utero Virginis assumpsit, alicubi depone-
 nere, exuere, aut è suâ hypostasi exterminare.
 Instabit aliquis primò; si λόγος existit extra car-
 nem, λόγος est alicubi excarnatus: at verum est
 prius, ex vestra sententia. Ergo etiam posterius
 admittere tenemini. Resp. Negando illam cō-
 nexionem; sicut enim tota anima humana existit
 extra materiam capitis, salvâ ejus unione cum
 materiâ capitis, ita etiam totus λόγος existit &
 in carne, & extra carnem, salvâ sua personali u-
 nione cum natura humana; & proinde πὲρ esse ex-
 tra carnem non necessariò infert excarnatio-
 nem, seu unionis istius personalis dissolutionē.
Matthias Martinus acutissimus Theologus, ad
 hujusmodi argumentum à *Balthasare Mentze-
 ro* propositum respondens, dicit voculam *extra*
 esse ambiguum; & aliàs idem valere quod *ultra*,
 h. e. negare rei unius inclusionem in alia re: ali-
 às autem, importare separationem, & negare u-
 nionem; priore modo dicit λόγος existere extra
 carnem à se assumptam, non verò posteriore
 modo.

5 Instabit aliquis secundò: Si λόγος, priori
 modo est extra humanitatem, λόγος alicubi non e-
 rit homo: at λόγος nusquam non est homo: Ergo
 nusquam est extra humanitatem: probatur as-
 sumptio: λόγος semper & ubique est homo, nam
 semper & ubique est *θεὸς ἄνθρωπος*. Resp. Quam-
 vis *Sanctus Thomas*, & cum eo ferè omnes
 Scholastici

Scholastici Theologi, putent illam propositionem, λόγος ubiq₃ est homo, simpliciter esse falsam, puto tamen distinctionem esse adhibendam: vel enim hic est ejus sensus, λόγος ubiq₃ est persona, humanam naturam sibi unitam habens: vel hic est ejus sensus, λόγος est persona habens naturam humanam, ubiq₃ sibi unitam, ideoq₃ ubique sibi localiter presentem. In priori sensu propositio est vera, & à nobis admittitur, quia nostræ sententiæ non contradicit: in posteriori verò, planè falsa est, & proinde à nobis nunquam admittetur. Inter hos duos sensus istius propositionis, ingens esse discrimen, ex his exemplis liquet: *Maritus ubiq₃, seu ubicunq₃ existit, est vir uxorem habens*, est propositio vera: at hæc, *maritus est vir, ubiq₃, seu in omnibus locis uxorem habens*, est propositio falsa: Similiter hæc, *Dominus ubiq₃ est vir, servum habens*, propositio est vera: hæc verò, *Dominus est vir, ubiq₃ servum habens*, falsa est.

6 Instabit aliquis tertio: Si λόγος non habet naturam humanam ubiq₃ sibi unitam & localiter coexistentem, totus CHRISTUS non est ubique, sed una tantum ejus natura, videlicet Deitas: at absurdum est posterius: Ergo etiam prius.

Resp: Negando connexionem propositionis: nam ex antecedente istius connexæ propositionis, bene sequitur totum CHRISTI, i.e. omnes partes CHRISTI, non esse ubique; non verò

bene sequitur *totum* CHRISTUM non esse ubique. Hanc distinctionem cur repudiet D. Iacobus Andrea, & cum eo reliqui *Vbiquitarii*, magnopere demiror: *Totus enim* CHRISTUS est homo, sed non *totum* CHRISTI; *totus* CHRISTUS est passus, mortuus, & resurrexit; sed non *totum* CHRISTI: i.e. utraq; ejus natura.

7 Instabit aliquis quartò: CHRISTUS non est totus, sine humanitate: Ergo si totus CHRISTUS est ubiq;, humanitas CHRISTI est ubiq;. Resp. Negando sequelam; istius enim argumenti consequentia, est planè ridicula, & refutatione indigna, ut patet ex his exemplis, quæ similem consequentiam continent: *Totus* CHRISTUS non est sine Deitate: Ergo si totus CHRISTUS est passus & mortuus, Deitas etiam passa est, & mortua: Item, CHRISTUS non est totus, sine pede suo: Ergo si totus CHRISTUS est homo, pes CHRISTI est homo.

ART. XII.

An subsistentia personalis τὸ λόγος, sit natura eius humana communicata: Et an rectè loquantur, qui dicunt, humanitatem CHRISTI subsistere ubiq;, per subsistentiam τὸ λόγος; Item existere ubiq;, secundum esse suum personale.

EX eo quod dici solet hypostasin, aut subsistentiam τὸ λόγος, communicatam esse carni

carni CHRISTI, duo consecraria ducuntur: primò enim Ubiquitarii inde colligunt, omni-præsentiam, imò & proprietates omnes τῷ λόγῳ, esse humanæ naturæ communicatas; ratio consequentiæ est, quia hypostasis τῷ λόγῳ, non differt realiter ab ejus essentia, ideoque nec à proprietatibus ejus essentialibus: Si igitur verum est hypostasin τῷ λόγῳ, esse carni communicatam, etiā proprietates ejus, eodem modo ei communicatas esse fatendum est. Secundò, nonnulli etiam ex nostris Theologis, qui putant CHRISTI carnem posse dici ubiq; subsistere, per subsistentiam τῷ λόγῳ, licèt in uno solo existat, ex eodem fundamento, sic ratiocinantur. Humana natura CHRISTI communicata est subsistentia τῷ λόγῳ; cùm igitur τῷ λόγῳ subsistentia infinita sit, & nullius loci ambitu includatur, caro CHRISTI, per eam subsistentiam sibi communicatam, dici potest ubiq; subsistere: hoc posterius argumentum periculosius est præcedente, quia tantopere placet quibusdam Orthodoxis Theologis, ut profiteantur nos in hac controversia de locali præsentia carnis CHRISTI, λογομαχεῖν, & non nisi verbali dissidio, ab Ubiquitariis discrepare; quod an verum sit, judicent illi qui historiam colloquii Mompelgartensis & Beza ac Iacobi Andreae Polemica scripta super hac materiâ diligentius considerârunt.

2 Vt igitur duo illa argumenta perspicuè diluantur

diluantur, distinguendum est verbum *communi-*
candi, & docendum quo sensu CHRISTI sub-
sistentia sit λόγος communicata: tenendum igitur
est, aliquid tribus modis dici alteri commu-
nicari. Primò, & *inhesivè* & *denominativè*, quo
modo odor pomi communicatur manui: nam &
odor ille, saltem idem specie, inest manui, & de-
nominat manum, i.e. verè prædicatur de manu.
Secundò, communicatur aliquid *denominativè*,
sed non inhesivè: quo pacto Reges & Imperato-
res communicant imperii dignitatem uxoribus
suis, illæ enim denominantur Imperatrices, &
reginæ, non quòd in se habeant potestatem, aut
authoritatem imperialem, sed quòd earum ma-
riti istam authoritatem habeant. Tertiò, com-
municatur aliquid alteri, neque *inhesivè*, neque
denominativè, sed vel *effectivè*, quo modo De-
us dicitur communicare seipsum creatis enti-
bus; illa enim dicuntur entia & bona, participa-
tionè primi entis, & primi boni, ut loquitur
Zanchius; vel *sustentativè*, quo modo acciden-
tibus suis communicatur subjectum, ea videli-
cet sustentando, & recipiendo in se: vel *aliquo*
alio simili modo. Dico hæc neque communicari
denominativè, neq; *inhesivè*, quia DEUS neque
existit in creaturis tanquam forma essentialis,
aut accidentalis in suo subjecto: neque de iis
prædicatur, prædicatione verâ & affirmativâ;
subjectum etiam neq; inest accidentibus suis,
neque

neque ea denominat, sed contrà ab iis denominatur.

3 Hypostasis seu substantia τὸ λόγος, tertio hoc modo communicatur naturæ ejus humanæ: h.e. neq; communicatur ei *inhæsiuè*, neq; *denominatiuè*, sed *sustentatiuè* tantùm. Prior pars hujus assertionis sic declaratur: Humana natura CHRISTI (ut benè notat *Martinus* contra *Mentzerum*) omnis propriæ personalis substantiæ expers est, & nullo modo subsistit: h. e. *neq; per se*, *neq; per accidens*; sive, ut planius loquar, *neq; naturâ suâ*, *neq; ex unione*. Ergo substantia τὸ λόγος, neq; *inhæsiuè*, neq; *denominatiuè* ei communicata est: Probatur antecedens: Si humanitas CHRISTI aliquo modo subsistit, aliquo modo est suppositum aut persona, & proinde aliquo sensu verum erit CHRISTVM assumplisse suppositum aut personam: at absurdū est posterius: Ergo etiam prius. Probatur conexum, quia suppositum & substantia reciprocantur, adeo ut omne suppositum habeat substantiam, & omne substantiam habens sit suppositum. Dicet aliquis: Ergo caro CHRISTI planè destituitur personalitate. Respondetur, eam non destitui personalitate, hoc sensu, quasi non sit personæ alicui unita, est enim unita personæ τὸ λόγος; sed quòd substantia propriè, & formaliter ei neq; insit, neque attribui possit.

4 Idem etiam sic demonstrari potest: Si humana

mana natura CHRISTI subsistit, vel per se subsistit, id est, ex se subsistentiam habet, vel subsistit quatenus existit in persona τὸ λόγος: prius à nullo admittetur: at neq; posterius manifestâ absurditate caret; quod sic probatur: Caro CHRISTI, quatenus existit in persona τὸ λόγος habet modum quendam existendi subsistentiæ contrarium, Ergo non subsistit. Probatur antecedens: *Esse in alio supposito, & subsistere*, seu esse per se, & extra omne aliud suppositum, sunt duo oppositi modi existendi, at caro CHRISTI, quatenus existit in persona τὸ λόγος, habet priorem modum existendi. i. e. existit in supposito: Ergo non potest habere posteriorem, qui ei è diametro opponitur.

5 Posterior pars nostræ assertionis sic declaratur: ὁ λόγος & naturam nostram, ad suam hypostasin gratiosè recepit & assumpsit, ita ut ejus hypostasis carnem sibi intimè præsentem habeat, eamque sibi personaliter unitam gestet; contrà verò caro in illa hypostasi hæreat, & sustentetur. Ex quo fit, ut CHRISTI hypostasis, seu personalis subsistentia, rectè dicatur communicata humanæ naturæ *sustentativè*.

6 Ex hac distinctione communicationis liquet, quid respondendum sit ad utrumque argumentum, in limine hujus articuli propositum: cùm enim hypostasis CHRISTI neq; *inhæsitivè*, neq; *denominativè* communicata sit humanita-
ti

ti ipsius; evidens est *Vbiquitarios*, ex communicatione hypostasicos τῷ λόγῳ, non posse colligere, proprietates ejus essentielles communicatas esse assumptæ carni, aut *inhasivè*, aut *denominativè*, & proinde negandas esse omnes illas illationes, quibus ex eo fundamento concludunt carnem CHRISTI esse omniscientem, omnipræsentem, omnipotentem, &c. Similiter cùm falsæ sint omnes illæ enuntiationes, quibus subsistere aut *esse* aliquod personale carni CHRISTI tribuitur, quia viz. nullam habet subsistentiam sibi convenientem, nullumque *esse* personale, sed modum quendam existendi iis contrarium, consequens est CHRISTI humanitatem, neque posse dici subsistere ubique, per subsistentiam τῷ λόγῳ, neque existere ubiq; secundum *esse* suum personale. Dicet aliquis; natura humana CHRISTI conjuncta est cum personâ τῷ λόγῳ, quæ omnipræsens est, & omnipotens: Ergo natura humana dici potest omnipræsens, & omnipotens *personaliter*. Resp. Si ista consequentia admittatur, pari ratione admittendæ etiam sunt hæ consequentiæ: *Humana natura CHRISTI unita est cum persona infinita, & æterna: Ergo ipsa est infinita & æterna personaliter, seu secundum suum esse personale: Item, est conjuncta cū ea persona, quæ DEUS est & Creator, ac Redemptor Mundi: Ergo hæc ei conveniunt personaliter.*

7 Quæret hic aliquis, an quemadmodum actus subsistendi, ita etiam actus existendi, à CHRISTI carne removendus sit. Resp. Nequaquam: caro enim CHRISTI, licet non subsistat, revera tamen habet propriam existentiam, distinctam ab existentia τ° λόγ κ , sed ab ea dependentem. Dico eam habere existentiam, distinctam ab existentia τ° λόγ κ , quia omne Ens creatum habet & essentiam, & existentiam distinctam ab essentia & existentia creatoris. Dico eam habere existentiam pendente[m] ab existentia τ° λόγ κ , quia per se, & extra personam τ° λόγ κ existere non potest.

FINIS.



EXERCITATIO SECUNDA,

DE

*Origine Animæ, & propaga-
tione Peccati.*

IN QUA

communis sententia explicatur,
ac defenditur.

&

Omnes modi, quibus alii animarum tra-
ductionem, & Peccati propagatio-
nem explicans, confutantur.

EXERCITATIO
SECUNDA

DE

Principiis Mathematicis
et Physicis

LIBER PRIMUS

De Motu et
Equilibrio

&

De Viribus et
Ponderibus
et de Gravitate



REVERENDO CLARIS-
SIMO, ET AMPLISSIMO
DOMINO,

DN. ALEXANDRO
GLADSTONIO, ACADE-
MIÆ RECTORI MAG-
NIFICO, ARCHIDIACONO
ANDREAPOLITANO,

Et Pastori nostro Dignissimo;
VIRO

Acri ingenio, judicio ingenti, & eximiâ mo-
rum indole conspicuo;

Cui

Quod Reip: literaria commodis tantoperè stu-
duerit, & illius negotia tantâ fide procurâ-
rit, Alma Mater Academia multum se debere
fatetur;

F

Hanc

Hanc

Secundam dissertationem, amantis & observantis animi pignus, reverenter consecrat, & dicat,

Magnificentiae ejus
observantissimus

R. BARONIUS,

PHILOSOPHIAE

PROFESSOR.



INDEX



INDEX
ARTICULORUM
SECUNDAE
EXERCITATIONIS.

1. **D**E formarum materialium, & immaterialium diversitate.
2. De duplici materia causalitate, & potentia: item de formarum eductione ex potentia materiae.
3. An anima rationalis sit ex traduce.
4. An & quomodo homo verè generare hominem dicatur.
5. Utrum generatio posita sis in productione formae? an verò in coniunctione formae cum materia.
6. An praecedens doctrina tollat peccati originalis propagationem.
7. Solvuntur argumenta, quae afferri solent contra praecedentem doctrinam de propagatione nativae corruptionis, per semen parentum.

8. *Proponuntur & solvuntur aliquot quaestiones de propagatione peccati originalis.*

9. *Diluuntur leviora argumenta, quae afferri solent contra creationem, & infusionem animae.*

10. *An possit reddi commodior aliqua, aut expeditior ratio translationis concupiscentiae, seu propensionis ad malum, quam diximus esse tertiam partem peccati originalis.*

11. *Considerantur duae aliae sententiae de translatione peccati.*

12. *Ostenditur, eos qui animarum creationem impugnant, multum inter se dissentire; & confutantur tres primae eorum sententiae de origine animae.*

13. *Refellitur quarta sententia, quae est Balthasaris Meisneri.*

14. *Confutatur quinta sententia, quae est Timothei Brighti Cantabrigiensis.*

15. *Confutatas iam esse omnes Adversariorum sententias de Traduce: item neminem ex isto numero, posse tutius aut facilius explicare peccati propagationem, quam nos, qui animarum creationem defendimus.*



EXERCITATIO SECUNDA.

*De origine animæ, & propa-
gatione peccati.*

ART. I.

*De formarum materialium, & immateria-
lium diversitate.*



T Decisio hujus quæstionis, *De origine animæ*, faciliùs intelligatur, quædam præmittam de formarum diversitate, deque varia causalitate, & potentia materiæ, respectu formarum, quæ in eam introducuntur, aut ex ea educuntur.

2. Primò igitur tenendum est, tria esse genera effectorum, quæ propter certum aliquem finem, non verò temerè aut fortuitò producuntur: nam eorum alia omnium quatuor causarum, alia trium, alia duarum tantum concursu producuntur. Omnium quatuor causarum concursu producuntur substantiæ corporeæ, quæ non possunt habere *esse* aliquod reale in mundo, nisi duæ causæ internæ, viz: materia & forma, duæ item externæ, i. e. efficiens & finis concurrant, adtribuendum ijs existendi actum. Trium causarum concursu, videlicet efficientis, materiæ, & finis, producuntur omnes formæ accidentales seu accidentia, omnes item formæ substantiales, solâ animâ rationali exceptâ: duarum causarum concursu, videlicet efficientis, & finis, producuntur Angeli, & animæ humanæ: Angeli enim neque ex materia & forma constant, neque in materia existunt; ideoque duas tantum habere possunt causas, videlicet efficientem & finem. Animæ verò humanæ, licet in materia existant, non tamen ex materia & forma constant, neque producuntur vi materiæ, in qua existunt: cum enim sint spiritus, nullius materiæ vi produci possunt, ut mox probabitur, sed à Deo ex nihilo creantur, & in materiam inducuntur, propter optimum finem, videlicet DEI gloriam, & ipsorum hominum salutem æternam.

3. Dixi formas accidentales, ut albedinem, nigredinem,

nigredinem, &c. trium causarum concursu produci, quia ut albedo habeat *esse reale* in mundo, 1. oportet finem aliquem, seu propositum, excitare, & allicere efficientem ad agendum: 2. Oportet efficientem adhibere suam vim, seu concursum activum: 3. Oportet *materiam in qua*, seu subjectum albedinis, concurrere, & cooperari concursu passivo, adtribuendum illud *esse* albedini: hoc autem præstat, recipiendo actionem causæ efficientis & producentis albedinem, item recipiendo ipsam albedinem, eamque sustentando. Ex trium harum causarum concursu, pendet albedinis aliorumque accidentium existentia, præcipuè verò à materia, in qua recipiuntur, quæque concursu passivo producit & sustentat ipsorum *esse*: idque quia ex efficiente, & fine, pendent tantum quoad *fieri*, ex materia autem seu subjecto pendent, & quoad *fieri*, & quoad *esse*: nam neque possunt fieri sine concursu materiæ in qua existunt, neque possunt in existendi actu perseverare, illâ materiâ sublatâ: at efficiente & finali causâ sublatâ, potest accidens jam productum, in existendi actu perseverare, ut liquet ex infinitis penè exemplis.

4. Dixi omnes formas substantiales, animâ humanâ exceptâ, etiam trium causarum concursu produci: quia ut forma lapidis v. g. actu existat, 1. oportet finem aliquem motione

metaphoricâ movere efficientem, 2. necesse est efficientē activâ suâ virtute disponere materiam lapideam, ad recipiendam illam formam substantialem. 3. Oportet materiam, in genere causæ subiectivæ, concurrere ad producendam, & sustentandam illam formam, idq; quia illa forma pendet à materia, quoad *fieri, esse, & operari*; h. e. neq; potest fieri, neque esse, neq; operari, sine materia in qua existit: ista autem dependentia formarum substantialium à materia, manifestè arguit materiam esse formarum in ea existentium causam, non quidem *activam*, sed *passivam, & subiectivam*, ut vocant: omnis enim dependentia alicujus ab aliquo, tanquam à priori, in *fieri, & esse*, est evidens causalitatis indicium: at longè aliter se habet anima humana; ea enim post mortem hominis & existit, & operatur extra materiam. Ergo à materia non pendet quoad *esse, & operari*: at neque ab eâ pendet quoad *fieri*, idque quia materia non potest vi aliquâ, aut concursu causali tribuere *esse* spiritali substantiæ, qualis est anima rationalis, ut mox probabitur, & proinde nullo modo est ejus causa. Hinc consequitur, animam esse ex earum rerum numero, quæ duarum tantum causarum concursu producuntur, efficientis videlicet & finis: patet item animam rectè appellari formam *imaterialem*, seu *independentem* à materia, cum è contrario omnes aliæ formæ, tum substantiales,

stantiales, tum accidentales, vocentur formæ *materiales*, & à materia *pendentes*. v. c. Forma ignis, sicut existere nequit extra suam materiam, ita etiam sine ea non potest calefacere, & comburere. Forma bruti, sicut existere nequit sine materia sua, i. e. corpore, ita sine eâdem sentire, aut appetere non potest. At anima humana, non solum existit extra materiam post mortem hominis; sed etiam extra eam operatur, exercendo actus intelligendi, volendi, gaudendi, aut dolendi.

A R T. II.

De duplici materie causalitate & potentia, item de formarum eductione ex potentia materie.

I. **I**N hoc articulo notandum est primò, Materiam seu causam materialem, duplicem habere causalitatem, unam respectu compositi, seu materiati: alteram respectu formarum ab ea pendentium. Causalitas ejus respectu compositi, est in eo posita, quòd tanquam pars essentialis constituat compositum: respectu formarum ab ea pendentium, causalitas ejus in eo est posita, quòd concursu passivo concurrat cum agente adtribuendum ijs esse, & ad illud ipsum esse conservandum.

2. Secundo

2. Secundò notandum est, duplicem esse materiæ potentiam, unam *receptivam* tantum & non etiam *causativam*; alteram & *receptivam* & *causativam*; priorem potentiam habet materia respectu solius animæ rationalis, habet enim potentiam naturalem recipiendi animam in se sed non habet potentiam concurrendi in generandæ causæ materialis, adtribuendum *esse* animæ posteriorem habet respectu omnium aliarum formarum, tum essentialium, tum accidentalium: non solum enim potest eas recipere in se sed etiam concursu passivo cooperari cum agente, ad eas producendas.

3. Tertiò notandum est, illos Philosophos malè explicare eductionem formarum ex potentia materiæ, qui dicunt formam actu existerem in materia, ante rei generationem, non tamen apparere, sed quasi sub confusione potentiæ eius latitare, per generationem verò manifestam fieri; ita ut illud *esse actuale*, quod prius erat quasi absconditum, non incipiat simplicitè per generationem, sed per eam incipiat fieri manifestum, & sic è tenebris, ac confusione materiæ, quasi in lucem educatur. Dico hanc explicationem eductionis malam esse, quia si forma existat actu in materia ante compositi generationem, ipsum compositum existit ante suam generationem, quod apertè absurdum est: ratio consequentiæ est, quia ex materia & forma actu existentibus

existentibus, & unitis, resultat compositum, iisque positis necessario ponitur compositum: ideoque si materia & forma existant unitæ, ante generationem compositi, ipsum compositum existit ante suam generationem. Dicit aliquis; si forma non existit in materia ante rerum generationem, non potest dici ex materia educi, seu extrahi; nihil enim potest educi, seu extrahi ex eo, in quo non est. Resp. Formam dici ex materia educi, non quod ex materiæ substantiâ, sed quod ex materiæ potentiâ causativâ educatur, seu extrahatur: quamvis enim forma ante generationem in ipsa materiæ substantia non existat, in eius tamen potentia verè & propriè existere dicitur, quatenus à materia est producibilis; nam esse in materiæ potentia causativa, nihil est aliud, nisi à materia tanquam à principio passivo posse produci.

4. Quartò notandum est, illos etiam toto cœlo errare, qui dicunt formas, ante generationem, secundum *esse* inchoatum & imperfectum, h. e. secundum gradus quosdam suæ entitatis, existere in materia; per generationem verò incipere esse in materia, secundum *esse* completum, & consummatum. Dico huius sententiæ Patronos turpiter errare, quia inde sequitur formam substantialem variari, quoad gradus intensiōis & remissionis, non minùs uàm accidentia; quia item absurdum est, in
una

unâ & eâdem materiâ actu existere omnes formas, quæ ex materiæ potentia educi possunt, si-
ve sint totales, siue partiales; sic enim in unâ &
eâdem re, simul essent penè infinitæ entitates
substantiales re diversæ. Sed obiiciet aliquis; si
forma ante rei generationem planè nihil sit;
sequetur omnes formas *fieri ex nihilo*, & proin-
de creari. Resp: Formas omnes posse dici *fieri*
ex nihilo, si *fieri ex nihilo* accipiatur pro *fieri ex*
nulla sui parte præexistente, non verò si *fieri ex*
nihilo accipiatur propriè, pro eo quod est *fieri ex*
nulla materia præexistente, quo sensu idem va-
let, ac creari; fiunt enim formæ ex materia, h. e.
fiunt materiâ concurrente in genere causa
subjectivæ, adtribuendum ijs *esse*.

5. Quintò notandum est, eos etiam malè
explicare eductionem formarum ex materiæ po-
tentia, qui dicunt formam ideo ex materiæ po-
tentia educi, quòd materia ante adventum
formæ habeat potentiam ad eam recipiendam.
Si enim hæc explicatio esset veritati consenta-
nea, omnes formæ, nullâ exceptâ, essent ex ma-
teriæ potentia educibiles; idque quia materia
habet potentiam ad quamlibet formam recipi-
endam, potentiam (inquam) vel naturalem
vel obedientialem. Potentia autem naturalis est
ea, quæ educibilis est in actum vi alicujus agen-
tis naturalis, ut potentia passiva ligni ad recipi-
endum calorem, dicitur naturalis, quia educi po-
tel

test in actum vi naturalis agentis, ignis videlicet. Potentia materiæ obediens est, quæ in actum educi non potest vi agentis naturalis; sed vi alicujus agentis superioris, atque alterius ordinis, cui ea materia ita subdita est, & subiecta, ut necessario ei obediat: talis est potentia ligni, vel lapidis ad formam statuæ; non enim educitur in actum vi alicujus agentis naturalis, sed vi agentis per artem: talis etiam est potentia animæ ad recipienda dona supernaturalia, ut fidem, spem, charitatem; non enim ullâ vi naturali in actum educi potest, sed infinitâ vi & virtute creatoris.

6. His positis: facile est explicare educationem formarum ex materiæ potentia; cum enim nihil possit educi ex aliquo, nisi illud quod prius fuit in eo; manifestum est eas solas formas ex potentia causativa materiæ educi, quæ antequam existant, sunt in potentia causativa materiæ, i. e. producibiles sunt per concursum passivum materiæ; illæ enim formæ quamdiu actu non existunt, habent potentiam ad accipiendum esse à materia, tanquam à principio passivo, & receptivo; ideoque cum actu existere incipiunt, vi activâ agentis, & passivâ materiæ, rectè dicuntur educi ex potentia causativa materiæ, quia non ampliùs sunt in potentia causativâ materiæ, i. e. non jam sunt à materia producibiles; quod enim semel productum & causatum est, non ampliùs est in potentia

tia causæ, sed eductum est ex statu potentialitatis, in statum actualitatis. Forma igitur bruti verè dicitur educi ex potentia *causativa* materiæ seminis, quia ante generationem bruti, illa forma fuit in potentia causativa materiæ seminis, i. e. producibilis erat vi passivâ istius materiæ; jam verò per actionem generantis, illa forma producta est, & posita extra potentiam causativam materiæ; ita ut non amplius sit producibilis vi passivâ materiæ, nisi amittat eam existentiam, quàm nunc habet. Contrà vero anima humana, licèt producat in materia, non tamen ex ejus potentia causativa educitur, sed in materiam inducitur; idque quia nunquam fuit in materiæ potentia causativa, nec materia unquam habuit potentiam ad tribuendum *esse* animæ, per passivum suum concursum.

A R T. III.

An anima rationalis sit ex traduce.

I. **V**ERUS hujus controversiæ status est, utrum anima rationalis educatur ex potentia materiæ seminis, vi seminalis & prolificæ virtutis, sicut animæ plantarum, & bestiarum: an verò à D E O absque materiæ præexistentis concursu producat, h. e. creetur, & corpori infundatur.

infundatur. Posterior sententia omnibus ferè modernis Philosophis, & Theologis arridet, & meritò; non enim memini me legisse ullum argumentum in contrarium, tanti ponderis, ut possit aliquem, vel mediocriter in hac controversia versatum, in eorum sententiam adducere, qui contendunt animas nostras à parentibus, per carnalem generationem profeminari, non verò à D E O creari, & infundi. Contrà verò, pro ea sententia, quæ asserit animas humanas à D E O immediatè creari, non solum faciunt varia S. Scripturæ testimonia, sed etiam argumenta Philosophica principiis naturæ notis nitentia: ego autem, omissis argumentis ex S. Scriptura petitis, quia ea luculenter proponuntur à Theologis, præcipuè verò à clarissimo D. Junio, in *explicatione* 1. cap. *Genes.* rationes quasdam afferam, partim ex Physica, partim ex Metaphysica depromptas.

2. Prima ratio est hæc: *Si anima est generabilis, est corruptibilis: at absurdum est posterius: Ergo & prius:* ratio majoris est hæc; illa prima, quæ ita dependet à materia, ut per concursum causæ materialis in generatione produatur, ita etiam dependet à materiâ, ut si ab eâ separetur, quæ conferebat & conservabat ejus esse, necessario pereat. Ad hoc argumentum respondere solent Theologi, & Philosophi, qui sunt in contrariâ sententiâ, animas humanas esse

esse ex se corruptibiles, ut probat illud argumentum; quia dependent à materiâ in fieri & esse, duraturas tamen esse in æternum, quia DEUS statuit eas conservare. Quòd si quis eos roget, cur anima, in se spectata, sit corruptibilis: Respondent hanc esse rationem, quia si DEUS cessaret ab actu quo conservat animas, illæ statim in nihilum redirent. Sed hæc responsio non placet, primò quia Theologi, & Philosophi, cum dividunt substantias in æternas & caducas, non volunt aliquas substantias ideo esse æternas, quòd à conservativo DEI influxu non dependant; sed quòd à nulla creaturâ, per actionem Physicam destrui possint: hoc autem modo non solum Angeli, & Cælum, sed etiam animæ rationales incorruptibiles dici possunt. Deinde illi qui ita respondent, non possunt negare animam humanam ita se habere, ut nullâ actione Physicâ, seu materiali destrui possit: unde ego infero, eam nullâ actione Physicâ, vel materiali, posse produci. Quænam enim est ratio, quòd nullâ actione Physicâ destrui possit? Nonne, quia est substantia spiritualis? At ob eandem etiam rationem, nullâ virtute materiali potest produci, idque quia, sicut repugnat spiritui actione Physicâ & materiali destrui, ita etiam repugnat spiritui actione Physicâ & materiali produci, generatio autem est actio Physica & materialis, tum quia fit in materia, tum quia fit per virtutem

virtutem materiale; scilicet per virtutem feminalem.

3 Secunda ratio: *DEUS* voluit animas humanas existere, extra corpora, post hominum mortem; voluit autem animas belluarum perire cum corporibus: Ergo dedit animæ rationali, naturam independentem à materiâ; ut ratione illius naturæ possit existere extra materiam corpoream; unde infero animam quoad naturam suam esse independentem à materiâ corporeâ.

5 Tertiò, *Ea sola forma educitur ex potentiâ causativâ materiæ, quæ sit materiâ passivè cōcurrente, ad tribuendū ei esse: sed materia feminis non potest, concursu passivo, tribuere esse animæ: Ergo non educitur ex potentiâ materiæ, sed à DEO per creationem in materiam infunditur.* Propositio manifesta est ex præcedentibus: assumptio probatur; nulla virtus activa agit ultra suum genus, ut loquuntur; i.e. non potest agendo producere eam rem, quæ est excellentioris naturæ, & superioris ordinis: sed anima excedit totum genus naturæ corporeæ, cum sit substantia spiritualis: nulla igitur virtus corporea potest animam producere. Ad hoc argumentū respondere solent, vim materiale in semine existentem per se non posse producere spirituale substantiam animæ, posse tamen virtute spiritualis illius substantiæ, cujus est instrumentum, i.e. virtute animæ hominis generantis ele-

vari ultra suam speciem, ad producendum spiritum: quemadmodum phantasma, quod est sensibilis & materialis species, yirtute animæ, cujus est instrumentum, species intelligibiles, h. e. spirituales rerum imagines intellectui patienti imprimit. Hoc effugiū planè futile est, & nullius momenti; fieri enim nō potest, ut agens creatum operā instrumenti purè materialis, aliquid immateriale producat: facultas autem prolifica in femine existens, purè materialis est; secūstamen accidit, in productione specierum intelligibilium; anima enim utitur vi intellectūs agentis, ut principalis instrumenti, excitantis & elevantis phantasma, ad producendas illas species: quare universaliter verum est, virtutem materiale non posse esse aut principale, aut solitariū instrumentum, in productione spiritualis substantiæ, licèt esse possit instrumentum secundarium, in productione spiritualis qualitatis.

5 Quartò, *Illi qui sunt in oppositâ sententiâ, coguntur admittere conclusiones admodum duras, & absurdas*; nam ut vitent vim talium argumentorum, coguntur admittere animam non esse substantiam spiritualem; item animam posse actione Physicâ destrui, nisi Deus eam speciali suo auxilio conservet ab interitu: quæ conclusiones admodum derogāt dignitati, & excellentiæ animæ nostræ, & nobis auferunt occasionem

nem

neim confutandi *Atheos*, argumentis petitis ab immortalitate animæ. Si enim anima est forma naturâ suâ dependens à corpore, ita ut extra corpus per se existere non valeat, quomodo persuadebimus iis, animam esse immortalem? derogant etiam hæ conclusiones sapientiæ divinæ; quippe asserere *DEUM* voluisse animas existere extra corpora, & negasse iis naturam ad hoc idoneam, est dicere *DEUM* non satis prudenter produxisse animam.

6 Quintò, Quamvis dicamus animam à *DEO* creari, & in corpus infundi, & proinde parentem non tribuere filio suo animam, satis tamen commodè tueri possumus, hominem tam verè generare hominem, quàm leo leonem, & bos bovem: possumus item tueri naturalem & hereditariam corruptionem, quam *PECCATUM ORIGINALE* vocant, à parentibus ad liberos propagari, & illius propagationis modum explicare: nulla ergo necessitas nos cogit amplecti eam sententiam, quæ animæ naturæ repugnat, & ejus dignitati tantum detrahit.

ART. IV.

*An & quomodo homo verè generare
hominem dicatur.*

Philosophi, & Theologi, quid dicunt animam non traduci per semen, aut ex semine elici, variis modis dissentiunt de generatione hominis, & actione in qua generatio hominis consistit. Primò enim nonnulli, cum iis hoc argumentum objicitur -- *homo generans non tribuit filio animam, per quam est homo: Ergo, homo non generat hominem.* Respondent hominem dici generare hominem, quia suppeditat materiam ex qua fit homo, id est, quia tribuit filio corpus hominis: verùm hæc responsio admodum frigida est & indigna quæ ab ullo Philosopho proferatur: primò enim ex ea sequitur, hominẽ tantum generare corpus hominis, non verò totum hominem; & hoc est ipsum, quod argumentum probat. Secundò, quia nemo Philosophorum dixit, generationem substantialem esse productionem aut suppeditationem materiæ; si enim producere substantiam, est suppeditare materiam ad producendam substantiam; pari ratione, is qui suppeditat artifici materiam ad conficiendam statuam, dicetur conficere statuam, quod admodum

admodum absurdum est. Tertiò, generare hominem, est tribuere *non esse* homini, ut ex ipsis terminis patet: at *esse* hominis seu natura humana, neq; consistit in anima sola, nequè in corpore solo, ut omnes fatentur: si enim natura humana in altero horum consisteret, per separationem animæ à corpore non destrueretur natura humana: consistit ergo natura humana, in unionem corporis & animæ, i. e. consistit in eo, quod homo verè constet animâ & corpore: si ergo generans non efficit, ut filius sit quid constans ex anima & corpore, sed tantum efficit ipsum corpus, homo generans non verè dicitur tribuere homini genito *esse* hominis, atq; adeo non verè dicitur generare hominem.

2 Alii, cum vident se non posse evitare vim hujus argumenti per priorem responsionem, aliam responsionem excogitârunt, sed penè tam invalidam ac est prior: dicunt enim hominem verè generare hominem, quia non solum tribuit ei materiam, i. e. corpus; sed etiam præparat materiam ad recipiendam formam; atque adeo per virtutem prolificam, attingit conjunctionem animæ & corporis, per quam conjunctionem homo constituitur in *esse hominis*, & fit tale compositum Physicum: hi ergo non dicunt patrem conjungere animam filii cum corpore filii, per virtutem seminalem, (hoc enim tribuunt Deo qui animam infundit;) sed præparare materiam

G 3

sem-

feminis ad recipiendam formam humanam, quæ quidem præparationem, postquam completa fuerit, immediatè sequitur conjunctio animæ & corporis: hinc liquet, ex eorum sententia, actionem generandi nihil aliud esse, quàm prævi-
am materiæ alterationem, & præparationem ad recipiendam formam: in hac sententia fuerunt penè omnes antiquiores Philosophi, etiam omnes penè Moderni, plerique etiam Pontificii Theologi; nam *Conimbricenses*, in explicatione *lib. I. de ortu*, testantur seipso olim amplexos fuisse hanc sententiam, quia fuit recepta apud omnes: verùm hæc sententia, ut dictum est, non magis satisfacit argumento, quàm prior. Primò, quia præparatio materiæ est mutatio in qualitate, atque adeo est alteratio. Generatio autem non est alteratio; sunt enim diversi specie motus, in hoc differentes, quòd altera terminetur ad qualitatem, altera ad substantiam: Ergo generatio non est mutatio, vel præparatio materiæ; neque generare, est præparare materiam. Secundo, generatio est una simplex mutatio, vel simplex motus, ut omnes fatentur: at illa præparatio non est posita in una mutatione, sed in variis alterationibus, quæ præcedunt introductionem formæ; nam aliquando dilatatur, aliquando consolidatur illa materia, aliquando humor augetur, aliquando minuitur, ita scilicet postulante naturâ formæ introducendæ: Ergo illa
præparatio

præparatio non est generatio, sed aggregata seu multiplex mutatio, sive alteratio. Tertio, generare est tribuere *esse*; *esse* autem hominis consistit in eo, quod constet ex anima & corpore: si ergo DEUS copulet animam cum corpore, infundendo (ut dicunt Theologi,) DEUS tribuit *esse* homini, non verò generans: solus enim ille qui copulat animam cum corpore, efficit ut homo constet ex anima & corpore. Deniq; homo in instanti gignitur, id est, in instanti fit homo: Ergo non gradatim; ideoque ejus productio, nō est mutatio aliqua successiva, sed instantanea.

3 Tertius modus respondendi est eorum, qui dicunt hominem generare hominem, neque quod ei tribuat materiam, neq; quod materiam præparet; sed quod tribuat ei etiam formam, non quidem specificam, id est, animam rationalem, (hanc enim volunt tribui à solo DEO, qui eam creat, & unit cum corpore;) sed quod ex potentia seminis educat animam vegetativam, & sensitivam: verum hæc sententia minimè omnium placet, quia manifestè ex ea sequitur, hominem non generare hominem, sed hoc vivens, & hoc animal: præterea (ut dicebam) *esse* hominis in eo consistit, quod homo constet ex anima & corpore: Si ergo filius non debeat patri, quod constet ex animâ rationali & corpore, non habet naturam hominis à patre sibi communicatam.

4 Rejēctis his sententiis, nos cum doctissimis Philosophis, *Doct: Sc: Ruvio*, & professoribus *Academiae Conimbricensis*, quartum dicendi modum amplectimur, asserentes hominem verē generare hominem, quamvis anima à Deo creetur; non quod tribuat ei corpus solummodò, neq; quod præparet corpus ad recipiendam animam, neque quod in materia, aut ex materia corporea, efficiat animam vegetativam, aut sensitivam sui filii; sed quod ab homine generante sit ipsa actio, quā anima rationalis substantialiter corpori unitur, ac incipit informare, inhabitare, & implere totam materiam corporis; adeo ut ex nostra sententia, generatio hominis sit posita in illa actione, quā, per virtutem prolificam, anima essentiali vinculo cum corpore copulatur.

ART. V.

Verum generatio posita sit in productione formæ, an verò in conjunctione formæ cum materia.

I **V**T nostræ sententiæ veritas appareat, primò ostendam actionem generantis (loquendo in genere, de omni generatione) esse positam in conjunctione materiæ & formæ: secundò, nonnihil specialius dicam de illa actione

ne, quâ anima corpori unitur. quod ad prius at-
tinet, generatio compositi non est productio
materiæ, idque quia materia prædicta est in-
generabilis, & incorruptibilis, id est, à nullo po-
test fieri, nisi à creatore, si enim creatura aliqua
produceret materiam primam, produceret eam
ex nulla materia præexistente; atq; adeo crearet
eam; nulla autem creatura creat, cùm creatio
requirat infinitam virtutem. Deinde cùm ex
igne fit aer, aer generat alium aerem, mutando
ignem in aerem, non autem per illam generatio-
nem producit materiam novi aeris, sed in mate-
riam præexistentem introducit formam novi
aeris.

2 Generatio substantialis, non est productio
materiæ, ut jam ostensum est: at neq; est produ-
ctio formæ, quod quidem certum est, & evidens
apud eos, qui dicunt animas à DEO creari: at
non minùs evidenter etiam probari potest con-
tra eos, qui dicunt animam esse ex traduce. Pri-
mò enim, natura hominis est in eo posita, quòd
constet ex anima & corpore: at per actionem
quâ animâ unitur corpori, sive anima sit à DEO,
sive à patre, homo fit compositum constans ex
anima & corpore: Ergo per illam actionem, ho-
mo accipit naturam, vel esse hominis; & proinde
per illam actionem producit: quid enim est al-
liud, producere hominem, quàm efficere ut ex-
istat homo, seu Ens constans ex anima & corpo-
re,

re. Secundò, nunquam potest compositum Physicum de novo produci, sive per generationem, sive per aliam mutationem, nisi ejus materia & forma de novo conjungatur, & coeant in unum per se, ut evidens est: potest tamen compositum Physicum de novo produci, & reverà fieri, quòvis ejus forma non producat de novo: Ergo efficere compositum Physicum, potius est materiam & formam conjungere, quàm formam producere: probatur assumptio; primò, ex resurrectione mortuorum in die judicii; tum enim homines de novo producentur, & de novo accipient *esse* hominis, per veram productionem substantialem, licet non ordinariam, sed plane extraordinariam; at tum eorum anima non potest dici de novo produci, quia existerat semper postquam creata est, sed tantùm de novo unita cum materia: Ergo productio compositi Physici, non est productio formæ, sed potius unitio formæ cum materia. Si quis tam impudens sit, ut neget in resurrectione mortuorum futuram veram productionem substantialem, contra eum utar hoc argumento; Producere substantiam corpoream, est tribuere *esse* substantiæ corporeæ: at tum Deus hominibus mortuis, quòqu岸diu mortui erant non habebant verum *esse* substantiæ naturalis, quia non constabant ex materia & forma unitis, verè & propriè dabit integrum & plenum *esse* corporis naturalis, efficiend

do ut verè constent ex corpore & anima : Ergo
D E U S per illam actionem verè producit cor-
pora naturalia. Non negari quidem potest, illam
actionem esse actionem longè diversam à gene-
ratione substantiali, & modo generandi ordina-
rio; certum tamen est eam actionem esse ve-
ram productionem substantialem; quod proba-
mus ex definitione productionis substantialis;
quid enim aliud est producere substantiam, quàm
conferre *esse* illi substantiæ, quæ ante illam acti-
onem non habebat *esse* substantiale. Secundò
probaturn assumptio sic; Deus potest creare ani-
mam infantis per aliquod tempus ante ejus ge-
nerationem, & postea, in ipsa generatione, illam
animam cum corpore ejus conjungere: Ergo
potest esse vera generatio substantialis absque
productione formæ.

3 Quod ad posterius attinet: Theologi &
Philosophi, qui sunt in nostrâ sententiâ *de ori-
gine animæ*, asserunt virtutem seminalem in
belluis duplicem habere operationem; scilicet
educationem formæ ex potentia materiæ, & uni-
tionem ejusdem formæ cum composito; quas
quidem actiones dicunt non realiter, sed ratione
solâ diversas esse: idque quia per unam & ean-
dem actionem re, educitur forma ex poten-
tia materiæ, & unitur substantialiter cum ma-
teria. Contrà, asserunt virtutem seminalem,
quæ in semine hominis existit, habere unam tã-

tū

tum actionem, scilicet unionem formæ, i.e. animæ cum materia corporea; unam (inquam) actionem principalem, nam certum est, ab ea virtute proficisci varias actiones minùs principales, scil. præparationes materiæ corporeæ ad recipiendam animam: quare dicunt in productione hominis, esse duas actiones proficiscentes à diversis agentibus; scilicet creationem animæ, & unionem ejusdem cum materia: creationem animæ aiunt esse operationem solius DEI, quod evidens est; unionem verò animæ cum corpore, volunt esse actionem, non quidem solius hominis, DEUS enim cooperatur cum homine in actione illa; sed hominis & DEI simul: & addunt, in hac unionem, & non in alia actione, positam esse generationem hominis: quod ex eo patet, quia suprà ostensum est, producere compositum neque esse producere materiam, neque producere formam, sed formam cum materia unire, & copulare: ex nostra ergo sententia, eodem instanti, quo DEUS creat animam in corpore, homo generans per virtutem seminalem animam à DEO creatam cum corpore substantialiter unit, & connectit; adeo ut actio DEI terminetur ad animæ *esse simpliciter*; actio verò patris terminetur, non quidem ad animæ *esse simpliciter*, sed ad ejus *esse in corpore*, seu ad unionem animæ cum corpore.

4 Ad illud argumentum, *homo est homo per animam;*

animam; si ergo pater non tribuit filio animam, non tribuit ei esse hominem. Respondent, hominem esse hominem, neque per animam seorsim acceptam, neque per corpus, sed per integram naturam, sive per essentiam humanam; & aiunt patrem uniendo animam cum corpore, per virtutem seminalem, tribuere filio *non constare ex anima & corpore*; & proinde ei tribuere naturam & essentiam per quam est homo: patet autem unamquamque rem, esse talem rem non per alteram essentiae partem, sed per totam essentiam, quia essentia est id, per quod Ens est Ens; atque adeo talis essentia est id, per quod res est talis res: illud autem quod dici solet, unamquamque rem esse talem rem per formam suam, ita concipiendum est, ut intelligamus unamquamque rem esse talem rem per formam, non quidem tanquam adaequatam rationem (ratio enim adaequata cur res sit talis res, est quia habet talem essentiam) sed tanquam principalem partem essentiae; si enim inter se conferamus partes essentiae Physicae, res quaelibet est talis res per formam, potius quam per materiam; interim si conferamus aut formam, aut materiam cum integra essentia, res quaelibet est talis res potius per essentiam, quam aut per materiam, aut formam.

5 Verum, hic oritur magna difficultas; si enim Deus infundat animam, (ut omnes Theologi loquuntur, qui sunt in hac sententia) con-

junctio

junctio animæ cum corpore potius tribuenda
 erit DEO, quàm homini generanti; quid enim
 aliud est animæ infusio in materiam corpoream,
 quàm conjunctio animæ cum materia? Re-
 spondent nonnulli, DEUM dici infundere ani-
 mam, non quòd per se solum copulet animam
 cum corpore; sed quòd per virtutem feminalem
 illud præstet, cujus ministerio utitur tanquam
 instrumento, non quidem necessario (ipse enim
 potest per se connectere animam & corpus) sed
 ordinario, quia scilicet ejus usus est ordinarius
 in omni animalium generatione. Alii probabi-
 liùs respondent, DEVM dici infundere animam
 in corpus, non quòd substantialiter, sed quòd lo-
 caliter jungat animam & corpus: id est,
 quòd creet animam in corpore, & per ejus cre-
 ationem in tali *ubi*, efficiat eam localiter præ-
 sentem corpori: dicunt enim, eodem instanti
 quo DEVS creat animam localiter præsentem
 corpori, eodem (inquam) instanti virtutem fe-
 minalem eas partes connectere, vinculo sub-
 stantiali: docent autem localem præsentiam a-
 nimæ, esse quid longè diversum ab ejus unione
 substantiali cum materia; quia Angelus assump-
 to corpore vestitus, est localiter præsens illi
 corpori, non verò substantialiter ei conjunctus,
 ut forma materiæ suæ.

ART. VI.

An precedens doctrina tollat peccati originalis propagationem.

QVI putant humanam animam à Deo immediate non creari, sed ex potentia seminis educi, obijcere solent, nostram sententiam planè tollere *peccati originalis* propagationem, & nullum modum relinquere quo explicari possit istius peccati derivatio à parentibus ad liberos: ut igitur hoc cavillum ipso facto diluam, partes quasi integrantes istius peccati enumerabo, & quomodo singulæ propagentur docebo.

2. Partes peccati originalis sunt tres: Primò, participatio peccati primorum parentum, illud enim fuit commune peccatum totius generis humani. Secundò, carentia originalis justitiæ, id est, defectus donorum, tum intellectûs tum voluntatis, quibus *Adamus & Eva* ante lapsum ornati sunt. Tertiò, propensio vel inclinatio ad malum; non enim solùm caremus originali justitiâ, quæ nos ad bonum propensos faciebat, sed etiam eâ sublatâ successit contraria qualitas legi adversa, quæ nos ad omnem turpitudinem pronos reddit.

3. Prima pars peccati originalis eodem modo

modo propagatur à parentibus ad liberos, quo propagari solet generis splendor, item jus hæreditarium: nimirum neque per animam, neque per corpus, sed per naturalem generationem; sicut enim *Carolus v. g.* ideo hæres regni est, quia Regis filius est, & ideo filius Regis, quia à Rege genitus est: sicut etiam *Carolus* ideo nobilis est, quia nobilium parentum proles est, & ideo proles, quia à nobilibus parentibus per naturalem generationem descendit: ita etiam *Adæ* peccatum ideo est nostrum, quia nos ejus filij & hæredes sumus: i. e. quia per naturalem generationem descendimus ab *Adamo*. Hæc sententia de propagatione primæ hujus partis peccati originalis, coincidit cum eorum sententia, qui dicunt animam à *Deo* creatam, evadere corruptam & ream per hypostaticam suam unionem cum corpore, quia ex illa unione animæ & corporis, resultat totus homo, qui est successor *Adami*, atque adeo reus inobedientiæ *Adami*.

4. Hic tria diligenter notanda sunt: Primò, ea quæ jam dicta sunt non intelligenda esse de quolibet successore *Adami*, sed de successore per naturalem generationem genito, i. e. de eo, qui per ordinarium modum generandi, videlicet per concursum maris & foeminæ, ab *Adamo* descendit; alioqui enim sequeretur Dominum nostrum *IESUM CHRISTUM* esse reum

um peccati *Adami*, quod absurdum & impium dictum est. Secundò notetur, beatam Virginem necessariò esse ream peccati *Adami*; si enim illud ipsum propter quod nos rei sumus peccati *Adami*, inveniatur in beata Virgine, ipsa non minùs est rea, quàm nos: at verum est prius, illa enim eodem modo descendit ab *Adamo*, quo nos: Ergo etiam verum est posterius.

5. Tertiò notetur, solius primi hominis, non verò posteriorum parentum peccata transire in eorum filios: cujus rei ratio præcipuè est hæc; primus homo justitiam accepit non sibi tantum, sed toti etiam ejus posteritati; ut si permaneret in justitia, eam simul cum natura in posteros transmitteret; sin eam peccando desereret, cum eâdem natura peccatum quoque in omnem posteritatem transfunderet. Cum igitur nemo posteriorum parentum simili lege sit institutus, patet illorum peccata, non magis quàm justitiam propagari in posteros, sed singularia, & (ut loquuntur) *personalia* tantum esse.

6. Secundam partem peccati originalis, viz. carentiam originalis justitiæ, parentes in posteros transmittunt eo modo quo parentes e. geni, inglorij, & ignobiles suam egestatem & generis obscuritatem in liberos transfundunt, viz: modo aliquo negativo, non positivo: sicut enim ignobilium & pauperum filii, ideo ignobiles sunt & pauperes, quia eorum parentes

illis bonis carent, & proinde ea liberis suis conferre nequeunt: ita etiam infans recens natus originali justitiâ caret, quia parentes ipsius justitiâ destituti sunt, & proinde eam proli suæ communicare nequeunt. Dicit aliquis; parentes fideles, per gratiam regenerationis, habent dona justitiæ & sanctitatis aliquatenus sibi restituta, cur non ergo ea dona in posteros transfundunt? Resp: quia nulli proximorum parentum, imò ne ipsi *Adæ*, postquam semel peccavit, concessum est, ut donum aliquod in posteros transmittat, hoc enim concessum est solis primis parentibus ante eorum lapsum.

7. Quod ad tertiam partem peccati originalis attinet, communis sententia est, eam eodem modo propagari & transmitti in liberos, quo lepra transmittitur à parentibus leprosis in eorum liberos; nimirum per semen à parentibus emissum: hoc autem sic declaratur; infectio, quæ est in semine leprosi, non est lepra vel morbus formaliter & actu, sed solum virtualiter; nam est occulta quædam dispositio ad lepram: ita etiam infectio spiritualis, quæ est in semine, non est peccatum formaliter & actu, sed est occulta quædam dispositio ad peccatum; ex quo fit ut anima in corpore à Deo creata, veluti flos in loco foetido, à prima sua origine ex corpore vitium contrahat habituale, atque culpabile; hujus sententiæ fundamentum est, mutua eaque naturalis

naturalis sympathia, i. e. passionum & affectionum communicatio, inter corpus & animam, tanquam inter duas partes substantiales idem compositum naturale constituentes. Vnde fieri videmus, ut corpore malè affecto anima doleat, & vicissim ex animæ hilaritate corpus recreetur; quare sicut anima, si infunderetur corpori vulnerato, vel posito in igne, mox in eo corpore doleret, ita dum infunditur corpori ad peccandum disposito, habitualiter in eo quodammodo peccat.

ART. VII.

Solvuntur argumenta quæ afferri solent contra præcedentem doctrinam de propagatione nativæ corruptionis per semen parentum.

1. **O**bjicitur primò sic; corpus non potest agere in spiritum, vitiosam aliquam qualitatem ei imprimendo: Ergo concupiscentia, seu propensio ad malum, à corpore ad animam non derivatur. Respondet ex *Augustino Pareus, lib: 4. de amissione gratiæ, cap. 12.* non omninò fieri naturaliter, sed occulto **DEI** iudicio, quòd anima à carne vitiata, ob culpam primorum parentum, vitium contrahat, h. e. licèt corpus in spiritum naturaliter agere nequeat,

queat, per occultam tamen iustitiam divinæ legis illud fieri posse. 2. Alij respondent, id non fieri per actionem carnis in animam, sed per quandam naturalem concomitantiam & communicationem, quæ est inter materiam & formam; sicut enim anima corpori communicat suas affectiones, ut vitam, sensum, & alia huiusmodi, ita etiam dispositiones corporis communicantur animæ; nam anima infusa corpori malè disposito, fit stolidi, ut videre est in naturaliter fatuis; ita sentit *Esthivus Theol. Pont. lib. 2. sent. 31. art. 1.*

2. Tertiò, *Hieron: Zanchius, de operibus DEI, parte 3. lib. 2. cap. 5.* Respondet, animam ex coniunctione cum corpore, peccato infici; non per Physicam actionem corporis in animam, sed ex iustissima DEI ordinatione, qui sic initio constituerat, ut sicut si *Adam* non peccasset, tota illius iustitia in liberos propagaretur, sic, illo peccante, tota naturæ corruptio, quæ eius inobedientiam est consecuta, ab illo tanquam à capite in omnes homines fluere & derivaretur, idque per semen, tanquam per vehiculum quo ista labe à patre ad prolem transfertur.

3. Quartò, *Alensis, & Bonaventura, in 2. Sent.* dicunt, animam in corpore immundo vitari, non quòd caro spiritum inficiat verâ & reali actione, sed quòd caro destituta originali reſtitutione,

rectitudine, ac rebellis rationi effecta, animum deorsum trahat, ac per hoc obliquam & distortam efficiat. Hanc sententiam explicans *Pareus*, dicit nos posse sine ulla absurditate asserere temperamentum corporis, licet brutum sit, ad mala prout esse, & non aptum animæ ad bonas actiones organum: animam verò rectitudine & puritate originali orbatam, sequi inclinationem & vitiosum temperamentum corporis: idem etiam innuit *Clariss. Festus Hommius*, in suo *Antibellarmino*, disput. 58. *Thes.* 5.

4. Secundò objicitur: Si *Deus* animam puram in carcerem tam impurum detrudit, crudeliter ac injustè agit: at impium & blasphemum est posterius; Ergò & prius est absurdum. Resp. concedendo totum; nos enim non dicimus *Deum* immittere animam justam & puram, in corpus impurum; inde enim sequitur, animas nostras esse justas ante earum infusionem & conjunctionem cum corporibus, quod postea refutabitur *art.* 8. instabit aliquis; *Deus* infundit animam, ex se peccatum non habentem, corpori impuro & contagioso: Ergò injustè agit: Resp: negando consequentiam; is enim agit injustè, qui illud agit cujus contrarium agere tenetur ex æquo & bono; sed *Deus* non tenetur animas filiorum *Adæ*, qui in *Adamo* peccaverunt, & sic æternam mortem meriti sunt, puris corporibus infundere, h. e. non te-

netur corpora nostra, labe peccati scedata, ante infusionem animarum purgare; sed contrà, tene-
tur ea non purgare, idque vi illius comminati-
onis, *quo die comederis, moriendo morieris.*

5. Tertiò ob. causa causæ est etiam causâ
causati: at Deus est causa unionis animæ cum
corpore: Ergo est etiam causa illius peccati,
quod anima ex conjunctione cum corpore con-
trahit; nam unio est causa illius peccati in anima.
Respondet *Zanchius*, unionem animæ cum cor-
pore non per se, sed per accidens esse causam
peccati, idque quia si *Adam* non peccasset,
Deus copulâset animas cum corporibus sine
ulla peccati consecutione: quare ex accidente
est, quod nunc animæ labe eam conjunctio-
nem consequatur. 2. Respond. DEUM tan-
tùm creare animas in corporibus, parentes ve-
rò per virtutem prolificam animas substantiali-
ter cum corporibus conjungere: quare quod
animas habeamus in corporibus nostris, est à
DEO; quod verò animas habeamus in corpori-
bus impuris & contagiosis creatas, est à lapsu pri-
morum parentum. In summâ, illa regula, *causa
cause est etiam causa causati*, intelligenda est
de causis per se, non per accidens, Deus e-
nim est causa suæ legis, & lex divina est causa
peccati per accidens, ut patet ex *cap. 7. ad Rom.*
à vers. 8. ad 14. nemo tamen inde concludere
potest, DEUM esse peccati causam.

6. Quartò

6. Quartò ob. quod corpus non habet, eo non potest animam inficere: at peccatum, quod animæ est proprium, nimirum ignorantia mentis & averfio voluntatis à bono, non inest corpori: Ergo corpus peccato animam inficere non potest. Resp. sicut semen parentis leprosi producit lepram in corporibus filiorum, licèt actu & formaliter in se non habeat lepram, sed occultam quandam dispositionem ad lepram, ita etiam caro potest inficere animam peccato, licèt actu & formaliter in se non habeat peccatum, sed tantum dispositionem quandam ad peccatum. Resp. igitur ad propositionem; quod corpus in se habet nullo modo, h. e. neque formaliter, neque virtualiter, eo non potest inficere animam, potest tamen inficere animam eo quod in se habet virtualiter, & dispositivè.

7. Quintò ob. in *Adamo* vitium prius fuit in anima, quàm in carne, & ab anima in carnem, non à carne ad animam transiit: Ergo eodem ordine in filiis *Adæ* vitium existit; anima enim, non corpus, est *πρῶτον δεκτικόν* peccati. Respondet *Pareus*, alium fuisse ordinem in vitii operatione quæ à libero arbitrio caput, alium esse in vitii generatione quæ à carne incipit. Responderi etiam potest eundem ordinem adhuc servari, & animam etiam nunc esse *πρῶτον δεκτικόν* peccati, idque quia ignorantia, contumacia, & averfio à bono actu & formaliter primò

insunt animæ, deinde corpori; licèt dispositivè & virtualiter insint corpori priùs quàm animæ. Hic nobis se offert occasio reprehendendi crassam & absurdam eorum sententiam, qui dicunt peccatum originis actu & formaliter in semine inesse, ante adventum animæ. Primò enim habitus & privatio versantur circa idem subiectum: Ergo privatio non potest esse in aliquo subiecto, in quo habitus inesse nequit: at in semine non potest esse iustitia originalis, quæ est habitus: ergo neque in eo existere potest peccatum originale, quod est ejus privatio. Secundò, si semen, actu & formaliter in se peccatum habet, varia sequentur absurda. Primò, semini datam esse legem, *lex enim*, inquit Paulus, *data est peccatoribus*: secundò, semen esse obnoxium æternæ damnationi, quod enim propriè peccatum in se habet, id damnari in æternum potest: tertio, semen posse à CHRISTO redimi, salvari, penitentiam agere, & credere, quæ omnia tam absurda sunt, inquit *Keckermannus*, ut cogitari vix absurdius possit.

ART.

ART. VIII.

*Proponuntur & solvuntur aliquot quæstiones,
de propagatione peccati originalis.*

I. **P**Rima quæstio est, quomodo possit peccatum originale traduci & propagari, cum anima, quæ illius subiectum est, non traducatur; non potest enim accidens traduci sine subiecto. Respondet Doctor *Esthins*, accidentia frequenter traduci, id est, affectione quâdam, vel infectione transire in alterum, non transeunte subiecto; nam hæreses, errores, vitia ab uno in multos propagantur, non transeunte eorum subiecto, hoc est, animâ; quæ quidem responsio vera & solida est, si intelligatur de ea propagatione quâ accidens non idem numero, sed idem specie, transit & traducitur ab uno in aliud; cum enim traducitur idem numero accidens, necesse est etiam ejus subiectum traduci, & transire: Sic, ut putant nonnulli Philosophi, odore transeunte in manum hominis contrectantis, transeunt etiam subtiliores partes pomi, in quibus odor proximè existit. Cum igitur propagatio peccati, non sit transductio accidentis unius numero, de subiecto in subiectum; sed productio accidentis specie ejusdem, non necesse

cesse est eius subiectum, animam videlicet, traduci. Alias responsiones ad hoc argumentum, vide apud *Pareum, lib. 4. de amiss. gratia, cap. 12.*

2. Secunda quaestio est, quomodo anima, quæ à Deo producitur, & proinde ab *Adamo* non trahitur, nec ullo modo in lumbis *Adæ* fuit, quomodo (inquam) ea potest dici in *Adamo* peccasse, aut rea esse peccati ab *Adamo* admissi. Respondet *Zanchius*, & cum eo reliqui Orthodoxi Theologi, animam duobus modis posse considerari, videlicet vel in se, & respectu sui, vel quatenus est pars constitutiva illius hominis, qui est filius *Adæ*: priori modo considerata anima, non potest dici fuisse in lumbis *Adæ*, & per consequens non potest dici peccasse in lumbis *Adæ*; posteriori verò modo considerata, bene dici potest ab *Adamo* trahi, in lumbis eius fuisse, & peccasse; totus enim homo fuit in lumbis *Adæ*, idque quia ab *Adamo* descendit per naturalem generationem, & proinde totus homo est reus peccati ab *Adamo* admissi, totus autem homo ad pœnam obligari nequit, nisi & anima & corpus eius ad pœnam obligentur.

3. Obiicit hic *Balthasar Meisnerus*, acutus quidem Philosophus, sed superbus, & magnorum virorum insignis contemptor; totum hominem non posse dici ab *Adamo* trahi, nisi & corpus & anima ipsius ab *Adamo* trahantur, idque quia

quia totus homo est *ὁ ὅλος ἄνθρωπος* constans ex anima & corpore; egregium profectò, & tanto viro dignum argumentum! An non totus C H R I S-
T U S Mariæ filius esse, & ex ea totus genitus natusque esse dicitur, licèt ex eius substantia De-
itatem non acceperit? omnino: unde & contra *Nestorium* definitum fuit Synodo Ephesina, ut
Maria *θεοτοκος* appellaretur.

4. Tertia quæstio est, utrum animæ à DEO
creentur puræ an impuræ? quam quæstionem
licèt alii centent esse multis difficultatibus in-
volutam, ego tamen puto eam facilè dissolvi &
explicari posse. Respondeo igitur, duplicem ef-
se sensum illius quæstionis; prior est, utrum a-
nimæ eo instanti quo creantur, sint puræ an im-
puræ? posterior est, utrum animæ à DEO cre-
ante accipiant puritatem seu iustitiam, an verò
impuritatem & corruptionem? Si priori modo
concipiatur quæstio, Respondeo animas eo ipso
instanti, quo creantur, esse impuras, simul enim
creantur & uniuntur substantialiter cum corpo-
ribus contagiosis, ex quibus labem contrahunt;
si posteriore modo concipiatur quæstio, Respon-
deo animas nostras à DEO creante neque acci-
pere puritatem seu iustitiam & sanctitatem, ne-
que impuritatem & propensionem ad malum,
sed tantum essentiam spiritualem, & proprie-
tates ab essentia dimanantes: dico DEUM non
inspirare animæ venenum lathale concupis-
centiæ

centiæ, quia mali author esse non vult: dico eti-
am eum non infundere animæ sanctitatem &
justitiam, quia anima creatur ut sit pars consti-
tutivâ filii & successoris *Adami*, cui Deus spi-
ritualia dona conferre non tenetur, Vide claris-
simi *Iunij Comment. in Cap. 2. Genes.*

A R T. IX.

*Diluuntur leviora argumenta, quæ afferri solent contra
creationem, & infusionem anime.*

Objicitur primò, Deus sex primis diebus
totum creationis opus absolvit, postea ve-
rò requievit ab opere suo, *Gen. 2. Exod. 20.* non
igitur novæ animæ nunc creantur. Respond. De-
um post sextum diem cessasse à creatione novarû
specierû, non verò novorum individuorum: ani-
mæ autē, quas jam creat, non specie sed numero
differunt ab anima *Adami*, quam primò creavit.

2. Secundò ob. *Genes. 5.* dicitur *Adam* ge-
nuisse filium ad imaginem suam, est autem filius
imago & similitudo patris secundum animam:
Ergo *Adam* genuit filium secundum animam.
Respond. filium esse imaginem & similitudi-
nem patris, non tam ratione animæ, quàm rati-
one totius suppositi, i. e. quatenus est quid con-
stans ex anima & corpore: *Adam* ergo non so-
lùm genuit filium similem patri, ut vult *Est-*
him; sed etiam genuit id, in quo illa similitudo
potissimùm

potissimum consistit, videlicet ipsam personam filii sui, ex anima & corpore conflatam.

3. Tertiò ob. *Genes. 46.* dicuntur 70. animæ egressæ de femore *Jacobi*, quod non est aliud quàm seminis propagatione traduci. Respond. animas synecdochicè pro hominibus esse positas: addere etiam possumus, ipsas animas egressas fuisse ex femore *Iacobi*, non quòd è femore *Iacobi* traductæ sint quoad earum esse simpliciter, sed quòd ex eo descenderint quoad earum existentiam in corpore, & unionem cum corpore; virtus enim seminis egressi ex femore *Iacobi*, effecit unionem corporis & animæ.

4. Quartò ob. si homo generando non producit animam rationalem, peioris est conditionis quàm bruta & plantæ, quæ producunt animas sibi proprias, videlicet vegetativam & sensitivam. Respondet *Esthins*, hominem esse melioris conditionis etiam in officio generandi, quàm sunt bruta aut plantæ, eo quòd vis ejus generativa pertingat ad unionem nobilissimæ formæ cum materia, ut suprà declaratum est. Adde quòd hoc ipsum ad magnam dignitatem pertinet, talem habere animam, ad quam producendam, propter ipsius excellentiam, nulla vis naturæ possit pertingere; quâ ratione nec Angelis, quorum natura excellentior est quàm hominum, vis ulla generandi competit.

5. Quintò ob. si homo non generat animam

nam filij, sed corpus, non generat totum hominem, sed alteram eius partem, imò ignobiliore ejus partem. Resp: negando sequelam: *Maria* enim non genuit Deitatem CHRISTI, & tamen verè dicitur genuisse totum CHRISTUM: ignis etiam, cum ex ligno generat alium ignem, non generat materiam illius ignis, sed tantum formam, & tamen dicitur generare seu producere totum illum ignem; secundum definitionem Aristotelis *generatio est mutatio totius* &c. Quare hic distinguendum est inter *totum hominem* & *totum hominis*; pater enim generat totum filium, sed non totum filii, id est, omnes partes filii.

6. Sextò ob. si Deus sigillatim creat animas omnium qui quomodo cunq; gignuntur, cooperatur scortatoribus & adulteris: nam fornicariis & adulterinis conceptibus animas creat & largitur, quod videtur absurdum. Resp. Deus cooperatur generationi naturali, quæ est per se bona, & opus naturæ; non autem vitio, quo fornicatores & adulteri contra legem DEI generationem perficiunt.

ART.

ART. X.

An possit reddi commodior aliqua, aut expeditior ratio translationis concupiscentie, seu propensionis ad malum, quam diximus esse tertiam partem peccati originalis.

I QVI communem sententiam, de infectione animæ à corpore ad peccandum disposito, spernunt & rejiciunt, illi ad quatuor classes seu ordines vocari & reduci possunt. Primò enim, *Traduciarii*, qui animarum creationem impugnant, firmissimè asseverant se ex iuxta sententiæ fundamentis, posse reddere longè meliorem & tutiorem rationem translationis peccati; quàm nos, qui animarum creationem defendimus: hanc eorum asseverationem (DEO adjuvante) falsam esse ostendam, Articuli ultimo hujus disputationis.

2 Secundò, Pontificii Theologi, qui cum *Bellarmino lib. 5. de amissione gratie, cap. 15.* damnant sententiam *Lombardi, Henrici, Gregorii Arimin. & Iohannis Driedo*, dicentium concupiscentiam esse adventitiam & positivam quandam qualitatem animæ facultatibus superadditam; illi (inquam) qui hoc dogma rejiciunt, intrepidè asserunt se nullo negotio posse reddere

reddere rationē, cur in animâ infantis à Deo creatâ, sit concupiscentia seu propensio ad malum. Primò enim dicunt, hominē naturaliter constare ex carne & spiritu, & ideo partim cum bestiis, partim cum Angelis communicare naturam: & quidem ratione carnis & communionis cum bestiis, habere propensionem quandam ad bonum corporale & sensibile, in quod fertur per sensum & appetitum: ratione spiritûs & communionis cum Angelis, habere propensionem ad bonum spirituale & intelligibile, in quod fertur per intellectum & voluntatem. Ex his autem diversis vel contrariis propensionibus, in uno eodemq; homine naturaliter seu per necessariam consecutionem ex principiis essentialibus, existere volunt pugnam quandam inter sensum & rationē, & ex eâ pugnâ ingentem benè agendi difficultatem, dum una propensio alteram impedit.

3 Dicunt secundò, divinam providentiam, initio creationis, ut remedium adhiberet huic morbo seu languori naturæ humanæ, qui ex conditione principiorum essentialium oriebatur, addidisse homini donum quoddam insigne, justitiā videlicet originalem, quā veluti aureo quodam fræno appetitus sensitivus contineretur, & rationi subjiceretur.

4 Dicunt tertio, primos parentes, & non omnes in iis amisisse aureum illud frænum originalis justitiæ, quo sensus rationi subjiciebatur;

& aiunt, ex remotione doni istius supernaturalis, statim in nobis ortam esse pugnam inter partem superiorem & inferiorem animæ, h. e. inter sensum et rationem : remoto enim fræno (in-
quiunt) quo continebatur appetitus ex se pro-
nus ad concupiscendum contra ordinem ratio-
nis, per necessariam consecutionem in appetitu
sensitivo sequitur propensio ad resistendum re-
ctæ rationi, & appetendum objecta sensibus iu-
cunda, quæ lege prohibentur. Hi igitur volunt
concupiscentiam seu propensionem ad malum
in infantibus non contrahi ex conjunctione ani-
mæ cum corporibus contagiosis, sed partim di-
manare ex ipsâ animæ constitutione essentiali,
quâ constituitur ex parte sensitivâ & parte rati-
onali; partim ex carentia originalis iustitiæ,
quæ partem sensitivam parti intellectivæ subji-
ciebat.

5 Hæc doctrina meritò rejicitur à nostris
Theologis; Primò, quia est fundamentum absur-
di istius dogmatis *de concupiscentia in renatis*,
quòd videlicet post baptismum non sit pecca-
tum, sed morbus & languor quidam naturæ. Se-
cundò, quia falsò asserit rebellionem appetitûs
sensitivi contra rationem & ejus directionem,
esse naturalem: nam illi qui hoc asserunt, in D E-
U M contumeliosi sunt, dicentes D E U M illum
sanctissimum, qui peccatum odit & execratur,
ipsi naturæ humanæ in primâ creatione indidif-

se impetum tam rebellem & iniquum, videlicet propensionem ad peccandum, & turpia ac inhonesta objecta appetendum. Tertiò, quia (fatente *Bellarmino ipso, lib. 5. de amissione gratiæ*) vitiosa illa concupiscentia, non solum est in appetitu sensitivo, qui rationi resistit, sed etiam in voluntate quæ prona est ad concupiscendos honores, inanem gloriam, & alias vanitates: quæram igitur ex *Bellarmino*, unde sit hæc pronitas voluntatis ad obsequendum desideriis carnis? Respondet *cap. 15. eam provenire ex remotione doni istius supernaturalis, quo Deus hominẽ in primâ creatione ornavit*; sed hæc responsio absurda, & ipsius doctrinæ contraria est: nam *lib. de gratiâ primi hominis cap. 5.* dicit partem superiorem animæ esse ex se & suâ naturâ pronam & propensam ad bonum spirituale, & intelligibile; & per consequens eam naturaliter resistere desideriis carnis; sublato igitur dono supernaturali, voluntas adhuc remanebit prona ad resistendum desideriis carnis, si modo nullo dono naturali careat (quod cõcedit ipse *Bellarmin.*) ideoq; nondum satisfactum est meæ quæstioni, quâ quæro undenam sit quòd voluntas jam sit prona ad obsequendum desideriis carnis, & ad appetendum illa objecta quæ sensui jucunda sunt, & rationi displicent, cum priùs contrario modo se habuerit idq; naturaliter. Hic hæret *Bellarminus*, & æternùm hærebit, donec nostrâ sententiam

sententiam de concupiscentia in renatis amplexus fuerit.

6 Bellarminus ad secundam rationem à nobis jam allatam respondens lib. de gratia primi hominis cap. 7. concupiscentia (inquit) carnis fuit homini in primo statu naturalis, non quidem ut bonum aliquod naturæ, sed ut defectus & quasi morbus quidam naturæ ex materia conditione consequens. Quare rectissime dicitur concupiscentiam non esse ex D E O; odio, non amore dignam; malam, naturæq; contrariam, propter duas causas; primum quia non ex intentione authoris naturæ, sed præter ejus intentionem in homine existisset, si in puris naturalibus homo creatus fuisset. Deinde quia D E V S illam sustulerat, & ex ipsius hominis culpa locum in nobis habet.

7 Hæc doctrina Bellarmini nimis crassa & absurda est: Primò, quia dicit hanc rebellionem carnis contra spiritum ex naturæ principiis dimanare, & tamen esse naturæ contrariam; quod manifestam contradictionem implicat: non enim potest fieri ut aliquid ab ipsâ naturâ proflueat, & tamen naturæ contrarietur; nisi quis dicere velit naturam esse sibi contrariam, & inimicam. Secundò, quia dicit hanc rebellionem ab ipsâ naturâ dimanare, & tamen præter D E I intentionem evenire; si enim ex intentione D E I ipsæ rerum naturæ existunt, proculdubio rerum proprietates, & ea omnia quæ à naturâ rerum

necessariò dimanant, non præter, sed secundùm DEI intentionem eveniunt; is enim qui intendit naturam, intendit etiam ea quæ naturam cōsequuntur. Tertiò, quia quicumque producit naturam, producit ex consequente ea quæ naturam consequuntur: at DEUS producit naturam hominis; Ergo producit etiam rebellem hunc impetum, qui naturam eius consequitur: hoc autem absurdum est; quia inde sequitur DEUM producere aliquid suæ naturæ contrarium; natura enim DEI sicut est ipsa bonitas, ita est ipsa propensio ad bonum, & proinde contrariatur propensioni ad malum. Quartò, quia dicere rebellionem carnis contra spiritum esse à naturâ, & tamen non esse à DEO qui fons est & causa naturæ, manifestam contradictionem implicat. Quintò, donnm illud supernaturale iustitiæ, ex sententiâ *Bellarmini*, non sustulit naturalem propensionem appetitûs sensitivi ad concupiscendum contra ordinem rationis, sic enim ipsam naturam appetitûs sensitivi evertisset; sed tantùm eum cohibuit ne actu resisteret rationi, & aliquid appeteret contra rationis directionē: Ergo *Adamus* in statu integritatis habuit in appetitu suo propensionem ad malum, quamvis nondum expertus esset actus & exercitia istius propensionis, & per consequens originali peccato inquinatus fuit; quid enim aliud est peccatum originale, quàm propensio ad malum?

ART.

ART. XI.

*Considerantur due alie sententie de
translatione peccati.*

I Sequuntur in hoc articulo considerandæ
Tertia & quarta classis, eorum qui tradu-
ctionem peccati per semen parentum damnant
& reiciunt: ad tertiam classem eos refero, qui
cum *Anselmo, in lib. de conceptu Virginali. & S.
Thoma, in 1. secunda quest. 81. art. 1. & quest. 4.
de malo, art. 1.* dicunt ad translationem peccati
nihil aliud requiri, nisi ut homo per veram ge-
nerationem ab Adamo descendat. Hoc enim
ipso quod aliquis in lumbis Adæ fuit cum is
præceptum in Paradiso transgrederetur, in illo
eius peccato communicavit. Hæc sententia re-
iicienda est, quia descensus noster ab Adamo
per naturalem generationem est quidem causa
cur nos rei sumus peccati ab Adamo commissi;
non verò potest esse causa nostræ cæcitatæ, ig-
norantiæ, & propensionis ad malum; & proinde
hæc opinio in eo peccat, quod secundum eam
explicari possit transductio primæ partis peccati
originalis, non verò secundæ & tertiæ partis.

2 Ad quartam classem eos refero, qui nobis-
cum consentiunt in explicanda translatione pri-

mæ & secundæ partis peccati originalis, dissentiant verò in explicanda translatione tertiæ partis, dicentes eam propagari & traduci à parentibus ad liberos, non per se, sed per secundam partem; h. e. per carentiam originalis iustitiæ, cum quâ necessario connexa & conjuncta est: si quis igitur eos roget; unde nam sit quòd infans recens natus, sit reus peccati ab Adamo commissi? Respondebunt, quia est filius Adami, h. e. quia ab eo per naturalem generationem descendit. Item si roget, unde sit quòd infans iste originali iustitiâ caret? Respondebunt; quia parentes ejus non poterant illi iustitiam communicare, ipsi enim eâ carebant. Denique si roget; unde sit quòd infans iste ad malum pronus & propensus sit? Respondebunt, quia originali iustitiâ caret; quicumque enim originali iustitiâ caret, is necessario ad malum propensus est: & proinde propensio ad malum propagari videtur per concomitantiam quandam, qua comitatur & consequitur carentiam originalis iustitiæ.

3 Doctissimus & nunquam satis laudatus *Petrus Molineus*, hanc sententiam egregiè explicat, & defendit, in *Anat. Arminianismi*, cap. 10. & ibidem rationem reddit, cur propensio voluntatis & appetitus sensitivi ad objecta illicita, quæ sensibus jucunda sunt, necessario consequatur carentiâ originalis iustitiæ. Quia autem insigne illud opus *Molinei* in omnium manibus non

non est; ego per aliquot fundamenta seu assertiones proponam summam eorum, quæ ab illo sub finem *cap. 10.* proposita sunt, idque in eorum gratiam qui nondum *Molineum* legerunt.

4 Prima assertio: *Intellectus hominis originali iustitiâ destituti, & nondum per verbi prædicationem vocati, neq; cognoscit, neq; cognoscere potest, durante eo statu, bona spiritualia & supernaturalia.* Hæc assertio probatione non eget, nam ut docet *Bellarminus lib. 6. de grâtiâ & libero arbitrio, cap. 1.* convenit inter omnes Theologos, sive sint Pontificii, sive Evangelici, ista mysteria fidei sine divinâ revelatione cognosci non posse.

5 Secunda assert. *Voluntas hominis originali iustitiâ destituti, & nondum vocati per verbi prædicationem, ad ea sola bona propensa est, quæ iste homo cognita habet, h. e. ad bona temporalia & terrena.* Cujus rei ratio est, quia appetitio voluntatis præsupponit cognitionem intellectus; ideoque voluntas nihil potest appetere, nisi quod ratio cognoscit.

6 Tertia assert. *Voluntas talium hominum propensa est ad bona naturalia & terrena, tanquã ad præcipua bona, & maximè expetibilia:* idque quia tales homines non cognoscunt bonum illud quod revera est perfectissimum; & ob id alia bona, quasi essent perfectissima, summo amore prosequuntur.

7 Quarta assert. *Quamvis appetitio bonorum temporalium per se mala non sit, ex accidente tamen fit mala, quatenus ista bona appetuntur tanquam precipua & maximè expetibilia; & proinde propensio ad ea sit appetenda, verè appellari potest propensio ad malum.* Hinc patet, propensionem ad malum necessariò consequi & comitari illam luminis supernaturalis carentiam, quæ est in omnibus qui ab Adamo descendunt per veram generationem.

8 Hanc sententiam quondam amplexus sum: nunc verò eam rejicere cogor, idque propter graves & efficaces rationes, quæ afferri possunt in contrarium. Primò enim, concupiscentia seu propensio ad malum est quid reale & positivum, ut docet ipse *Molinæus cap. 8. istius operis*: Ergo habet realem & positivam causam: ratio sequelæ est, quia privatio, aut non Ens, qualis est carentia justitiæ, non potest producere aliquid Ens reale; nam Ens reale ad suam productionem requirit realem influxum & operationem alicujus causæ: at non Ens, sicut non habet reale esse, ita non potest habere realem operationem. Dicit aliquis; cæcitas, quæ est privatio, potest esse causa lapsus, & privatio luminis potest esse causa aberrationis à viâ; lapsus autem & aberratio à viâ sunt entia realia. Resp. lapsus & aberratio à viâ duo includunt, videlicet positivam entitatem talium motuum, & superad-

ditam

ditam inconvenientiam, seu defectum: inconvenientia illa, quæ est privativum quid, privativam causam habere potest; at positiva entitas istorum motuum est à positivâ causâ; nam positiva entitas lapsus est partim ab internâ gravitate corporis, partim ab externo offendiculo: ite positiva entitas aberrationis est à locomotivâ facultate, tanquam à causa.

9 Secundò, ex hac sententia sequitur, veram causam vitiosæ illius propensionis & inclinationis, quæ est in voluntate, esse cæcitatem & ignorantiam mentis: at hoc est falsum, & quotidianæ experientiæ contrarium: idque primò, quia multi impii seu non renati, per naturales demōstrationes evidenter sciunt *Deum* esse summum bonum, & poinde summo amore prosequendum; & nihilominus in voluntate habent propensionem ad prosequendum bona temporalia & terrena summo amore, posthabito supremo & perfectissimo bono: Ergo causa illius propensionis non est ignorantia mentis. Secundò, multi impii nōrunt quid sit honestum, quid inhonestum; & tamen in voluntate habent propensionem ad ea agenda, quæ inhonesta sunt & naturali rationi contraria: Ergo ignorantia non est causa illius propensionis.

10 Tertiò, concupiscentia seu propensio ad malum, non solum est pronitas ad nimium amorem rerum terrenarum, orta ex ignorantia rerū celestium

cœlestium & supernaturalium (ut statuit hæc sententia;) sed etiam est pronitas quædam ad contemnenda & negligenda bona illa cœlestia, quæ nobis patefacta & revelata sunt, h.e. quorū cognitionem ex verbi auditu acquisivimus; item est propensio ad ea agenda, quorum turpitudinem ex D E I verbo cognitam & perspectam habemus. Vnde *Paulus* de seipso conqueritur *cap. 7. Rom: vers. 22. & 23. Delector* (inquit) *lege D E I, quod ad interiorem hominem; sed video aliam legem in membris meis rebellantem legi mentis meæ, & captivum reddentem me legi peccati, quæ est in membris meis.*

II Quartò, si concupiscentia carnis nihil aliud sit nisi propensio ad inordinatum amorem rerum terrenarum, orta ex ignorantia rerum cœlestium, ingens lequetur absurdum, videlicet concupiscentiam non esse in renatis, qui rerum cœlestium cognitione imbuti sunt: illi enim qui certò sciunt cœlestia & supernaturalia illa dona infinitis gradibus excellere & præferenda esse terrenis & temporalibus bonis, non possunt ex ignorantia rerum cœlestium inordinato amore prosequi bona terrena & caduca.

ART.

A R T. XII.

Ostenditur, eos qui animarum creationem impugnant, multum inter se dissentire; & confutantur tres primæ eorum sententia de origine animæ.

STatueram apud me, in hac Exercitatione contra eos solummodò disputare, qui putant animas humanas ex materiæ potentia educi. Verùm quia videbam multos, eosque doctissimos viros, animarum translationem tueri, & nihilominus ferò damnare & rejicere dogma illud de educatione animæ rationalis ex potentiâ materiæ, ideo operæ pretium me facturum sentiebam, si proponerem, & sigillatim confutarem omnes sententias, quas memini me legisse aut audivisse de translatione animarum.

1 Prima sententia est *Jacobi Martini*, qui in *lib. 3. Miscellanearum questionum, disput. 7.* dicit animam filii esse ab anima patris per traducem, modo tamen imperscrutabili & nobis incognito. Hic modus recedendi à communi sententia facilis est, sed inhonestus, & si quid iudico, tanti viri acumine indignus: verùm ne illi, qui his latebris se occultant, securè delitescant, contra eos utar unico argumento, sed nisi
me

me animus fallit, valido & perspicuo : illud autem sic proponi potest; *Pater neq₃ producit animam filii ex aliqua re præexistente, neq₃ producit eam ex nullâ re præexistente, hoc enim est creare.* Ergo nullo modo eam producit. Consequentia hujus argumenti à nullo negari potest, quia nititur communi illo principio, *de qualibet re verum est affirmare vel negare.* Antecedens probatur hac ratione; *Pater neq₃ producit animam filii ex materiâ corporea seminis, neq₃ ex spiritali substantiâ animæ suæ,* ut mox probabitur. Ergo non producit eam ex aliqua re præexistente item non creat eam, quia creare est solius Dei proprium, & proinde non producit eam ex nulla re præexistente.

3 Secunda sententia est eorum, qui dicunt animam educi ex potentia seminis; id est, volunt animam, primò cùm semen emittitur, non actum esse in semine, sed potentiâ duntaxat; quando verò semen nonnihil elaboratum est, & membra corporis quodammodo sunt delineata, tum demùm per *δυναμιν πλαστικὴν* in semine hærente animam è potentia seminis educi, excitari, & accendi, ita ut actu nunc vivere & corpus suum informare incipiat.

4 Hæc sententia à me suprâ confutata est & à Balthasare Meisnero, qui translationem animarum acerrimè propugnat, non immerito rejicitur, *sect. 3. Philosophiæ suæ, cap. 6. quæst. 1.* Argumentum

Argumenta ejus hæc sunt: 1. accidens, videlicet potentia *πλαστική*, non potest producere tam nobilem & excellentem substantiam. 2. *Δυάμις πλαστική* est animæ facultas: Ergo non est in semine ante adventum animæ. 3. formarum materialium proprium est educi è potentiâ materiæ; anima autem est forma spiritualis. Vide cate-
ta apud ipsum *Meisnerum*, loco citato.

4 Tertia sententia est eorum, qui asserunt parentem simul cum semine emittere suæ animæ particulam, & proinde semen primò cum emittitur esse actu animatum; hi igitur volunt animam filii esse ab anima patris, per ejus divisionem & quasi imminutionem. Hunc modum tuendi animarum traducem, non satis tutum judicat *Meisnerus*, & meritò; quia ex eo sequitur animam divisibilem, & proinde materialem & corruptibilem esse; quia item inde sequitur formam posse migrare de una materia in aliam, in-
nò de uno supposito in aliud; nam secundum hanc sententiam, verum est dicere totam animam filii fuisse quondam in corpore patris, & corpus ejus informasse.

5 Vnde Serenissimus noster Princeps I A-
COBVS BRITANNIAE REX, doctè
admodum & acutè colligebat, dum hic A N-
DREA POLI esset, animam filii esse ream
omnium peccatorum quæ à patre commissa sunt
ante ejus emissionem & transfusionem, nam a-
nima

nima filii ante transfusionem fuit in patre, & eo peccavit, anima autem qua peccavit, ipsa morietur, Ezechielis 18. vers. 4. & Jeremia 31. vers. 30.

ART. XIII.

*Refellitur quarta sententia, qua est
Balthasaris Meisneri.*

I **Q**uarta sententia, quam amplectitur Balthasar Meisnerus, in hoc convenit cum præcedente, quod statuatur animam non potentia seminis educi, sed à parente in prolem traduci, & unâ cum semine in matricem infundi; ac proinde semen quamprimùm emittitur esse actu animatum: differt tamen ab ea, quatenus asserit animam illam in semine existentem non fieri ex anima patris per decisionem & partitionem animæ paternæ, sed ab ea generari & produci de novo. Hanc sententiam explicat Meisnerus pag. 924. sic ait, *quamprimùm parens semen transfundit in uterum genetricis, tunc unum cum semine transmittit animam, non quidem suam aut suæ partem, sed suam similem: & p. sequente, Sicut lumen se multiplicat, h. e. aliud lumen immediatè producit in materiâ idonea, idq; (ut supra monuit) non per sui partitionem, nec per loci*

caloris

calem sui in alteram facem transmissione, sed per novi luminis accensionem; ita etiam animæ nostræ in semine ad generationem hominis disposito sese multiplicant, hoc est, aliam sibi in specie similem animam immediatè, non interveniente aliquo instrumento corporeo, producant.

2 Hæc sententia facillimè confutatur, nam ex ea manifestè sequitur animam filii creari ab anima patris; quod ingens absurdum & incommodum est: ut autem illud evidenter demonstretur, fundamenti loco tenendum est primò, creationem esse productionem ex nullo subiecto præexistente. Secundò tenendum est, quatuor modis aliquid dici fieri ex aliquo, 1. *Terminativè*, quomodo dicimus hominem fieri ex non homine, album ex non albo. 2. Fit aliquid ex aliquo *decisivè*, seu per decisionem & detractionem, quomodo dicimus exiguum clavum fieri ex ingenti massa ferri, & exiguum annulum ex ingenti massa auri. 3. Fit aliquid ex aliquo *subiectivè*, illud videlicet quod ex alicujus subiecti potentia educitur, quomodo dicimus omnes formas materiales fieri & educi ex potentia materiæ. 4. Fit aliquid ex aliquo *constitutivè*, quomodo dicimus omnia corpora naturalia fieri ex materia & forma.

3 His positis, sic probatur animam patris creare animam filii ex *Meisneri* sententia: Quod producit aliquid ex nihilo, illud creat: at anima patris

patris producit animam filii ex nihilo, ex *Meisneri* sententia: Ergo creat, & proinde infinitam virtutem habet; nam producere ex nihilo se creare, infinitam virtutem arguit: propositio major est perspicua, nam nititur definitione creationis: minor sic probatur; Si anima patris producit animam filii ex aliqua re præexistente, vel producit eam ex sua substantia, vel ex materia feminis, at nullo modo eam producit ex materia feminis, ut fatetur ipse *Meisnerus*; quod etiam probatur hac ratione, anima non fit ex materia feminis *terminativè*, h. e. materia feminis non est terminus à quo illius mutationis quâ anima producit, nam terminus à quo alicujus mutationis, adveniente termino ad quem, perit; materia feminis, adveniente animâ, non perit sed animam in se recipit. Secundò, anima non fit ex materia feminis *decisivè*, quia sic esset pars materiæ, quod nimis absurdum est. Tertiò, non fit ex materia feminis *subiectivè* seu *eductivè* sic enim esset forma materialis, ut ipse *Meisnerus* fatetur. Denique non fit ex ea *constitutivè* sic enim esset substantia corporea.

4 Nullo etiam modo producitur anima filii ex animâ patris; nam primò non producitur ex anima patris *terminativè*, quia terminus à quo perit producto termino ad quem; anima autem patris non perit productâ animâ filii. Secundò, non fit ex eâ *decisivè*, seu per divisionem & partitionem;

ditionem; ut ipse *Meisnerus* fateatur. Tertiò, non fit ex ea *subjectivè*, h. e. non educitur ex eius potentia, quia quod educitur ex alicujus subjecti potentia, illud in eo subjecto recipitur, & in eo existit: sed nemo dixerit animam filii existere in anima patris, tanquam in subjecto. Quarto, anima patris non est pars constitutiva animæ filii: ergo anima filij non fit ex eâ *constitutivè*.

5. Quod autem ad illam similitudinem à lumine petitam attinet: tenendum est, eam ineptam esse, & nullo modo pro eius sententia facere; nam lumen educitur de potentia materiæ, ut omnes fatentur: unde *Fonseca*, l. 5. *Metaph. cap. 2. quæst. 4. sect. 1.* Nemo (inquit) dubitat lumen educi de potentiâ aëris; & certè cùm faci lucenti admoveatur fax alia, manifestum est ex potentia materiæ istius facis admotæ, educi flammam & ipsius lucem. Quare secundum argumentum contra *Meisnerum* sit hoc: si anima filii eo modo producit ab anima patris, quo lumen à lumine; anima patris educit animam filii ex materiæ potentia: at posterius est absurdum, fatente *Meisnero*: Ergo & prius: probatur autem lumen educi ex potentia materiæ; quia illæ formæ educuntur ex potentia materiæ, quæ à materia pendent quoad *esse* & *fieri*, ut patet ex articulo 1. huius disputationis: at lumen est tale, quia neque potest *fieri*, neque *esse*, sine concursu passivo materiæ lumen recipientis. Valeat

eat igitur illa formarum multiplicatio, ab educatione earundem desumpta, nam est figmentum crassi alicuius cerebri, & nullâ ratione nititur.

6. Tertiò: si spiritualis substantia animæ quâ talis est, h. e. quâ spiritualis & rationalis est, habeat virtutem procreativam similium, sequetur facultatem procreatricem non esse propriam facultatem animæ vegetativæ, quod est contra omnium Philosophorum doctrinam: ratio est, quia facultates animæ vegetivæ non conveniunt animæ rationali, quâ talis est, sed quatenus est vegetativa: sed hæc facultas procreativa similium animarum absque educatione ex potentiâ materiæ, competit animæ rationali per se, & non quatenus est vegetativa.

7. Quartò: in generatione uterque Parens emittit semen, ut docent non solum Scholastici Theologi complures, *lib. 3. Sent. Dist. 4.* ut *Scotus, Bonaventura, Maior, Ockamus, Lichetus, Gabriel*; sed etiam Medici multis manifestis indiciis ab Anatomicâ experienciâ ductis convincunt, quæ hoc loco in medium afferre non possum: ea tamen scriptis mandârunt *Galenus lib. 2. de semine, cap. 4. Fernelius lib. 7. Thysiol. cap. 6. Levin. Lemn. lib. 1. cap. 6. de occultis natura miraculis. Vesalius lib. 5. de fabrica corporis, cap. 15. Laurentius Anat. lib. 8. quest. 5.* & multi alii. Hoc igitur posito, sic argumentor; Semen utriusque parentis vel est animatum, vel alterum,

alterum, videlicet semen matris est inanimatum: si utrumque est animatum, vel dicendum erit filium duas animas rationales habere, vel particulam animæ à patre & particulam animæ à matre conferri: prius est absurdum, quia tollit unitatem hominis, ipso *Meisnero* fatente; posterius etiam est absurdum, quia eo posito concidit animæ indivisibilitas, adeoque immaterialitas. Si semen matris sit inanimatum, h. e. si mater non conferat animam filio, tum per consequentiam ipsius *Meisneri*, pag. 908. mater non est mater totius filii, sed tantum corporis: item non gignit hominem, sed partem hominis. Hoc argumentum revera & in se non est validum, ut patet ex suprâ dictis, est tamen *ad hominem*, ut loquuntur; quia nititur ipsius *Meisneri* consequentiâ.

3. Quinto, si quis à *Meisnero* exquirat, quid fiat cum isto semine quod in uterum transmittitur, ex quo tamen homo non generatur; an & illud animatum sit. Negativè respondet. Causam si quæras: dicit id fieri, vel quia semen non erat per omnia aptè dispositum ad generationem; vel quia singularis est pœna à Deo, naturæ cursum miraculosè inhibente, inflicta: dico *miraculosè*; quia sicut miraculum esset, si faci lucenti fax alia, materiam idoneam & bene dispositam habens, admoveretur, & flammam non conciperet; sic etiam miraculum est, si vera sit

Meisneri sententia, cum à parente semen sufficienter dispositum emittitur sine anima; idque quia anima, per naturam, sui est multiplicativa in materiâ sufficienter disposita. Hæc responsio illius sententiæ, quam defendit *Meisnerus*, infirmitatem arguit: absolum enim & absurdum est, dicere toties verum & propriè dictum miraculum fieri, quoties pater semen sufficienter dispositum emittit, & illam emissionem animatio, & proinde generatio non consequitur.

9. Sextò, omne rationale est homo: at semen, si actu est animatum animâ rationali, actu est rationale: Ergo actu est homo, nam actu habet formam hominis: hinc autem varia sequuntur absurda: 1. patrem iu uterum genetricis non tantum semen, sed hominem transfundere. 2. hominem & semen hominis specie non differre. 3. veras esse has propositiones, *aliquod semen est homo*, & per conversionem, *aliquis homo est semen*. 4. generationem hominis fieri sine interitu seminis; forma enim seminis, i. e. anima, manet.

ART.

ART. XIV.

*Confutatur quinta sententia, quæ est Timothei
Brighti Cantabrigiensis.*

EXtremam manum huic disputationi admo-
vebam, cum acutissimas & politissimas ani-
madversiones *Timothei Brighti Cantabrigiensis*
in *Scribonii Phisicam*, evolvens, incidi in locum
eum, quo asserit animam patris procreare ani-
mā filii ex semine quodam spirituali, & incorpo-
reo. Verba eius hæc sunt: *Quibus respondemus;*
nec totum, nec partē animi parentum, traduci; ne-
q̃, accidens aliquod animi radimentum esse. Quid
ergo? Sanè substantiā quandam ab anima natam,
nec totam ipsam nec partem, tanquam animæ im-
mortale semen, prolis animæ futura principium:
& ut semen corporeum de parentū corporibus de-
oisum, nec corpus ipsū, nec corporis aliquod mem-
brum existit; ita anima, per semen animæ fœcun-
dum, non per animam, aut animæ partem aliquam
traducitur in prole: & paulò post, Ergò tenemus,
animam non integram & absolutam, parentibus
referendam acceptam, sed seminale quid, ab anima,
aquè atque à corpore exclusum, & tandem verbi
illius virtute (sc: fœcunditatis benedictione) in a-
nimam rationalem, & immortalem, proditurum.

2. Hanc sententiam clarissimi & doctissimi *Timothei* probare non potui; quia semen illud animæ vel est quid corporeum, vel est spiritualis substantia: si est quid corporeum, ex eo spiritualis substantia fieri non potest, ut ipse *Brightus* fateri videtur, cum opponit semen animæ corporeo semini: si est spiritualis substantia, vel est anima partialis, & incompleta; vel est substantia quædam specie & essentialiter distincta ab animâ: non est anima imperfecta, ut ipse *Brightus* fatetur, cum dicit animam traduci à parente in prolem, neque per animam, neque per partem animæ, sed per semen quoddam ab anima exclusum: at neque est substantia spiritualis specie & essentialiter distincta ab anima: ut patebit ex sequentibus rationibus.

3. Primò, si datur talis spiritualis substantia ab animâ distincta, dabitur aliquis spiritus creatus, qui neque est Angelus, neque anima humana: at postèrius repugnat doctrinæ omnium Philosophorum; Ergo & prius. Secundò, si illud semen spirituale verè ac realiter ab anima excluditur & emittitur, verè & realiter præexistebat in anima: realis enim emissio præsupponit reale inesse: at spiritus ille non potest realiter inesse animæ patris: Ergo neque realiter excludi, & emitti ab ea. Probatur assumptio: spiritus ille non potest inesse animæ patris ut pars in toto, fatente ipso *Timotheo*; neque ut accidens in
subjecto,

subje ctò, idque quia est substantia; substantiæ autem repugnat inesse subjecto; neque ut res in loco ambiente, aut in vale continente, talis enim modus continentia & circumscriptionis naturæ spirituali animæ repugnat.

4. Tertiò, semen illud spirituale vel fit ex tota anima patris, vel ex parte animæ patris, vel ex nihilo: non enim potest fieri ex matéria corporea, tum quia est spiritualis substantia, tum quia ipse *Brightus* testatur illud non ex corpore, sed ex anima natum esse: non fit ex tota anima patris, quia sic tota anima patris evanesceret, & in spirituale illud semen converteretur: neque ex parte animæ paternæ, quia sic anima patris esset divisibilis in partes, & pars ejus posset amitti & in aliam substantiam transmutari: hæc autem repugnant naturæ spiritualis substantiæ: denique anima patris non producit illud semen ex nihilo, quia sic diceretur creare illud semen, quod est absurdum.

5. Quartò: semen illud animæ vel est incorruptibile, & manet post generationem hominis, vel est corruptibile, & perit eo instanti quo anima producit. Si posterius dixeris; sequetur, semen illud non esse spiritualement substantiam, quia spiritualis substantia incorruptibilis est, & nullâ virtute creatâ aboleri potest. Si prius admiseris, sequetur, in homine genito duos esse spiritus seu spirituales substantias, vi-

licet animam filii, & semen ex quo illa anima orta est: accedit, quòd naturæ feminis repugnet post rei generationem manere, debet enim substantiali mutatione transmutari in rem ex semine ortam; ad talem autem transmutationem requiritur, ut res genita & corrupta in materia convenient, quod de semine & anima dici nequit.

6. Quintò: conversio illa feminis spiritualis in animam, vel est conversio accidentalis, qualis est conversio seu mutatio quâ homo malus convertitur & mutatur in bonum, & lapis albus in lapidem nigrum; vel est conversio substantialis, qualis fuit conversio uxoris *Loth* in statuam salis, aut conversio ligni in substantiam illius ignis cui approximatur: non est conversio accidentalis, quia inde sequetur, semen illud spirituale non differre specie & essentialiter, sed gradu perfectionis accidentalis, ab anima; hoc est, esse animam rationalem accidentali aliquâ ratione incompletam & imperfectam: hoc autem contradicit verbis ipsius *Timothei*, dicentis, semen illud non esse actu animam, sed animæ futuræ principium, & aliquando in animam proditurum. Idem etiam confutatur omnibus ijs rationibus, quibus probavimus contra *Meisnerum* animam patris per se & immediate non producere animam filij; item semen cum emittitur non est actu animatum animâ rationali.

7 Si eſt converſio ſubſtantialis, vel fit per totalem annihilationem rei converſæ, quomodo converti volunt Pontificii panem Eucharifticū in corpus & ſanguinem C H R I S T I, ut docet Conc. Trident. *ſeſſione 13. cap. 8. can. 2.* vel fit per abolitionem unius partis eſſentialis illam rem conſtituentis, quomodo lignum igni approximatum in ignem convertitur; nam non totaliter aboletur, ſed tantū ejus forma deſtruitur, remanente materiâ ſub forma ignis. Sed neutrū dici poteſt: nam primò converſio ſeminis in animam non eſt totalis annihilatio ſeminis, quia annihilatio ſubſtantię, præſertim ſpiritualis, à ſolo D E O fieri poteſt, ut docet D. *Thomas, parte 1. quaſt. 104. art. 4.* quia item annihilato ſemine oportet animam ex nihilo produci. Quare eū non pater, ſed D E U S valeat ſemen illud annihilare, & eo annihilato animam eodem inſtanti ex nihilo producere, non patri ſed D E O ſoli productio animæ aſcribenda eſt; quod ingens abſurdum eſt, ſi vera ſit ipſorum doctrina.

8 Secundò, converſio ſeminis in animam non poteſt fieri per abolitionem unius partis eſſentię, alterâ remanente: primò, quia inde ſequetur ſpiritualem ſubſtantiam ſeminis illius eſſe corruptibilem, & capaceſt tranſmutationis ſubſtantialis, non minùſ quàm corpora Phyſica: illa enim aboleri & deſtrui poſſunt naturaliter, quoad unam ſolam eſſentię partem, formam

formam videlicet: secundò, sequetur substantiam illam spirituales esse revera divisibilem in materiam & formam Physicam, aut in partes integrantes: nam de his solis partibus verum est quòd earum unâ destructâ altera remanere possit superstes, quoad actualem existentiam: siquidem partium Metaphysicarum, h. e. generis & differentię alia ratio est, nam nemo dixerit destructâ animalitate *Socratis* posse remanere ejus humanitatem quoad actualem existentiam aut contrà destructâ ejus humanitatem remanere ejus animalitatem. Tertiò, ubi datur transmutatio à contrario ad contrarium, ibi necesse est dari unam communem materiam quæ sit subiectum transmutationis: at hìc datur transmutatio à *non animâ* ad *animam*, eaq; substantialis. Ergo datur hìc materia constitutiva & semini & animæ: & confirmatur, quia illa pars superstes, ingrediens constitutionem animæ, necessario est materia; non enim potest habere rationem formæ Physicæ, neq; generis aut differentię, ut cuius manifestum est.

ART. XV.

Confutatas iam esse omnes sententias de traduce; item neminem ex isto numero posse tutius aut facilius explicare peccati propagationem, quàm nos, qui animarum creationem defendimus.

Q Vi putant animam esse ex traduce, & à DEO non creari & infundi, illi necesse habent asserere animam aut educi ex potentiâ feminis per concursum passivum materiæ, aut produci ab animâ patris, absq; concursu materiæ feminis: nam inter hæc duo nullum datur mediū. Prior sententia à me confutata est, *art. 3. & 12.* posteriorem modum loquendi in quatuor alios dispescere ac subdividere possumus: Si enim anima patris sine concursu materiæ feminis producit animam filii, vel producit eam ex tota sua substantia, vel ex parte suæ substantiæ, vel ex semine quodam spirituali, vel ex nihilo: Primum modum tuendi traducem nemo (quantum intelligo) amplectitur: nam ut benè monet *Bellarmin. lib. 4. de amiss. gratiæ, cap. 11.* si anima filii sit ex tota anima patris, vel parens deinceps caret animâ, quippe qui totam transfundit in

in filium; vel tota manet, & in patre & in filio: utrumque est evidenter falsum. Secundam sententiam confutavi *art. 12.* Tertiã *art. 13.* & Quartã *art. 14.* unde concludo, nullum posse excogitari modum tuendi, aut explicandi propagationem animarum, qui non sit in hac disquisitione confutatus.

2 Dicet aliquis, sententiam de traduce, quamvis multis difficultatibus Philosophicis sit exposita, in Theologia tamen esse tutiorem, quia magis expeditè & facilè explicat modum quo originalis corruptio à parentibus in liberos derivatur. Respondeo, eos qui hoc asserunt, gratis illud asserere: nemo enim ex isto numero potest commodiùs aut expeditiùs explicare peccati originalis propagationem, quàm nos qui animarum creationem defendimus: hoc autem manifestum erit, si *Traduciariorum* sententias sigillatim consideremus.

3 Primò igitur, illi qui dicunt *animam educi ex potentiâ materiæ seminis*, necesse habent nobiscum asserere, animam à femine, & sic à corporeo quodam, infici; ut rectè observavit *Meisnerus, sect. 3. cap. 4. quest. 1.* oportet enim eos dicere animam contrahere labem ab immundo semine, ex cujus potentiâ educitur.

4 Secundò, illi qui dicunt *parentem uxà cū semine emittere animæ particulam*, parùm commodè explicant peccati propagationem; quia

ex

ex ista sententia sequitur, filium non solum esse reum primi lapsus, sed etiam omnium peccatorum à proximis parentibus commissorum, ut probatum est *art. 12.*

5 Tertiò, illi qui afferunt animam patris producere animam filii ex semine spiritali; illi itē qui putant animam patris producere animam filii absque ullo concursu passivo, vel seminis materialis, vel seminis spiritalis, & proinde ex nihilo, non possunt dici commodè aut expeditè explicare peccati propagationem; quia excogitârunt modum quendam impossibilem propagationis, & principiis tum Philosophiæ tum Theologiæ contrarium, ut probatum est *art. 10. & 11.*

6 Syllogismus quo *Meisnerus* & reliqui *Traduciarii* utuntur, ad explicandam peccati originalis propagationem, ita se habet; *Quale est propagans vel traducens, tale est propagatum vel traductum: at animæ parentum quæ propagant, sunt infectæ peccato: Ergo & animæ filiorum.* Quia autem aliquis ex *Bellarmino* objicere potuit, ex hoc argumento sequi animam justificatam procreare animam justam in filio, *Meisnerus* argumentum suum cautiùs format, & sic ratiocinatur; *Qualis est anima parentum in sese, talem quoq; propagat animam: at in sese est peccatrix, licet hoc peccatum justo non imputetur: Ergo animam quoque peccatricē propagat.*

7 *Meisneri* ratio, etiam sic concepta & limitata

tata, parùm efficax est, & propositionis falsitate laborat; Si enim anima patris propagat & producit talem animam, qualis est ipsa in sese: necessario sequitur animam ornata[m] eruditione, & liberalium artium cognitione, talem animam in filio producere; nam ea in sese considerata, istis habitibus est ornata. Dicet aliquis: Quid si sic formetur ratio; *qualis est anima patris ex se & suâ naturâ, talem propagat animam; generatio enim est actio naturæ: at ex se & suâ naturâ est destituta habitibus artium & scientiarum; nam labore & industriâ acquiruntur, non verò naturaliter insunt isti habitus anima: Ergo talem propagat animam.* Respondeo, animam parentum non ratione naturæ suæ simpliciter considerata, esse destitutam habitibus scientiarum; absolutè enim loquendo, illi habitus sunt naturales (ut docent nostri contra Pontificios, dum loquuntur de originali iustitia:) sed ratione naturæ corruptæ & depravatæ. Generatio autem neque est actio naturæ corruptæ, neque per gratiam renovatæ; sed naturæ simpliciter & absolutè considerata; ideoque Physicè loquendo, & non considerando occultum DE I judicium in hoc negotio, ea sola possunt vi generationis propagari, quæ pertinent ad naturam hominis simpliciter & absolutè consideratam: labes autem peccati hoc modo se non habet; hoc est, non est homini naturalis absolutè loquendo.

FINIS.

EXERCITATIO TERTIA.

DE

*Fide , Scientia , &
Opinione:*

IN QVA

natura Fidei perspicuè ex-
plicatur,

&

Pontificiorum ac Arminianorum
errores de habitu fidei
deteguntur.

EXERCITATIO

TERTIA

DE

Philosophia, Scientia, &

Opinionibus

IN

universa Philosophia, Scientia, &

Opinionibus

ET

Philosophia, Scientia, &

Opinionibus

IN



CLARISSIMO,
 CONSULTISSIMO,
 SPECTATISSIMO,
 HONESTARVM VIRTU-
 TUM CULTURA, MULTO-
 que rerum usu præstantis-
 simo DOMINO,

DOMINO IOANNI SCOTT,
 A SCOTTISTARVET,

Equiti Aurato, Directori Cancellariæ Sere-
 nissimi & Potentissimi IACOBI
 primi, Dei gratia Britannia,
 Francia, & Hibernia
 REGIS;

Viro

Doctrina perpolita, Fidei spectata, Expe-
 rientia eximia;

L

Qui

Qui

Non solùm Collegium S. L E O N A R D I,
cujus dignissimus Alumnus est, novâ Pro-
fessione auxit, & ornavit; sed Literatis quoque
omnibus, Hospitii, Patrocinii, & Amicitiaë fo-
res libenti animo semper aperuit;

Hoc

*Exercitium Philosophicum, in grati animi de-
clarationem, & debita observantia tesseram,
officiosè inscribere & nuncupare
debit, voluit,*

Amplitudini ipsius

Humillimè deditus,

R. BARONIUS,

PHILOSOPHIÆ

PROFESSOR.

INDEX



INDEX ARTICULORUM

TERTIAE EXERCITATIONIS.

1. **D**E firmitate, certitudine, & evidentia assensuum mentis nostra.
2. Quomodo inter se differant, scire, credere, & opinari.
3. An fides semper sit *πιστις* & *ελεπομένη*.
4. An fides possit esse simul cum scientia de eadem propositione, & in eodem intellectu.
5. De fidei divisione in explicitam, & implicitam; & an inevidentia, quam fidei tribuimus, faciat pro ceca & implicita Pontificiorum fide.
6. De triplice lumine; videlicet naturæ, fidei seu gratiæ, & gloriæ.
7. An detur in viatoribus, lumen aliquod clarius fidei lumine.
8. In quo solvuntur tres quæstiones:

Prima est, *An fides bene distinguatur in intuitivam, & acquisitam?*

Secunda est, *An fides sit certior ipsis scientiis?*

Tertia est, *Quid sit propriè credere in Deum?*

9. *Refellitur Sententia Nicolai Grevinchovii, dicentis habitum fidei non esse infusum, sed acquisitum.*

10. *An fides actualis aut habitualis infantibus insit, aut inesse possit.*

11. *An in Dæmonibus sit fides.*

12. *An fides fuerit in anima Christi: Et, an sit in sanctis, qui jam in cælum translati, habent Dei cognitionem facialem, ut loquuntur Scholastici.*

13. *An rectè negent Remonstrantes, Adamum ante lapsum habuisse potentiam credendi in Christum.*

14. *An objectum fidei possit esse falsum.*

15. *Quomodo solvendum sit illud argumentum Remonstrantium: Quod unusquisque tenetur credere, illud est verum, &c.*

16. *An fides sit assensus discursivus: Et, an Pontificij utantur circulari discursu in stabilis-
endâ fide.*

17. *An notitia sit actus ab habitu fidei elicitus.*

18. *An fiducia sit actus fidei.*

19. *An fiducia sit actus intellectus, & quomodo differat ab assensu.*

20. *Vtrum objectum fidei salvifica sit remissio peccatorum jam impetrata; An verò sit remissio*

missio peccatorum impetranda & obtinenda: Vbi obiter solvitur præcipuum argumentum Bellarmini, contra objectum & naturam fidei justificantis.

21. *An & quatenus fides ad voluntatem pertineat.*

22. *Vtrum Charitas sit forma Fidei.*

23. *An Religio sit virtus Theologica à Fide distincta.*

24. *Ostenditur Theologiam Viatorum tribus modis accipi, & probatur Theologiam primo modo acceptam, non esse habitum à Fide re distinctum.*

25. *Probatur, contra Antonium Ruvium, Theologiam secundo modo acceptam, non esse scientiam, sed fidem divinam.*

26. *Probatur Theologiam tertio modo acceptam, hoc est, Theologiam Scholasticam esse habitum aggregatum ex Fide, & Philosophicis disciplinis.*

27. *Theologiam esse similem omnibus habitibus Aristotelicis, præcipuè verò prudentiæ.*

28. *Vtrum Theologia sit disciplina speculativa, an practica.*

29. *An Theologia Viatorum dici possit speculativa à speculatione, seu visione, qua futura est in Patria.*

30. *An vera & propriè dicta Theologia possit esse in homine impio, seu non renato.*



EXERCITATIO TERTIA.

*De Fide, Scientia, &
Opinione.*

ART. I.

*De firmitate, certitudine, & evidentia assen-
sum mentis nostra.*

CUM omnis habitus intellecti-
vus, pro fine proximo habeat
notitiam, sive assensum, quo
mens assentitur ijs præpositio-
nibus, quarum veritatem per-
cipit & cognoscit; operæ præ-
tium erit, nonnihil præfari de assensu mentis,
deque

deque ejus affectionibus, & speciebus, idque ut intelligatur diversitas actuum mentis nostræ.

2. Assensus mentis, est *judicium quo intellectus judicat propositionem aliquam esse veram*: mens enim assentitur huic propositioni, *homo est animal*, eam amplectendo & approbando, hoc est, judicando eam esse veram.

3. Tres sunt gradus perfectionis, quos in assensu mentis observârunt Philosophi, videlicet *firmitas, certitudo, & evidentia*: quibus opponuntur totidem gradus imperfectionis, videlicet *infirmitas seu vacillatio, incertitudo, & inevidentia*.

4. Assensus firmus, est *is qui est sine hesitatione, dubitatione, aut formidine partis oppositæ*. Infirmus verò, seu vacillans assensus, est *cùm mens ita assentitur huic vel illi propositioni, ut de eius veritate dubitet, aut saltem aliquo modo metuat ne isti propositioni assentiendo erret*.

5. Assensus certus, est *qui nititur certo aliquo aut solido fundamento, non verò levi aut fallaciatione*. Assensus incertus, est *qui contrario modo se habet*. Hic diligenter notandum est, ad certitudinem assensus requiri, *ut fundamentum quo mens nititur, dum assensum præbet, non solum sit in se certum, sed etiam ut assentienti tale videatur*: nisi enim ille sciat rationem, qua nititur, esse certam, ejus assensus nullo modo

erit certus & stabilis.

6. Denique assensus evidens, est *cum quis per se, hoc est, vi sui sensus aut rationis, absque alterius informatione & testificatione percipit eam propositionem, cui assentitur, esse veram: exempli gratiâ, cum video Socratem apud me stantem, assentior huic propositioni, Socrates stat: & assensus meus est evidens, idque quia non per alterius informationem aut testimonium, sed vi mei sensus, rem ita se habere percipio: item cum assentior huic propositioni, homo est animal, assensus est evidens, idque quia vi proprii intellectus, seu rationis, percipio homini inesse naturam sensitivam: adeoque quamvis nemo illud assereret, imò quamvis omnes contrarium assererent, istam propositionem veram esse judicarem.*

7. Contrà verò, inevidens est assensus, *cum quis assentitur propositioni, non quòd sensus aut solida ratio eam veram esse demonstret: sed vel quòd levis & inefficax ratio illud suadeat, (levis enim ratio non pellit mentis tenebras, atque adeo facit assensum obscurum & inevidentem) vel quòd alius testetur eam esse veram: sic qui vidit Petrum interfectum, & assensum præbet huic propositioni, Petrus est interfectus, ejus assensus est evidens: qui verò propter hujus narrationem & testimonium, assensum præbet isti propositioni, ejus assensus est inevidens,*
idque

idque quia neque sensu, neque ratione percipit eam esse veram.

8. Hi tres gradus perfectionis, qui in assensu cernuntur, ita se habent, ut secundus includat primum, eique aliquid superaddat: tertius verò includat & primum & secundum, illisque aliquid superaddat: nam ut assensus sit firmus, satis est quòd fundamentum, quo nititur ille assensus, assentienti certum & solidum videatur: quamvis enim revera non sit tale, si tamen assentienti tale esse videatur, is proculdubio firmiter & absque hæsitazione assentietur: sic hæretici firmiter assentiuntur suis erroribus; quamvis enim fundamenta quibus nituntur, non sint certa & solida, iis tamen (quæ eorum est cæcitas) efficacissima & validissima videntur.

9. At verò ut assensus sit certus, & planè ab errore alienus, non tantùm requiritur, ut fundamentum quo nititur, videatur assentienti certum, & solidum; sed etiam ut revera & in se tale sit; alioqui assensus noster erit erroneus, & falsus: quare quamvis hæreticis attribui patiamur firmitatem in iudicando, non tamen putamus ijs competere certitudinem iudicandi: certitudo enim & error simul consistere nequeunt.

10. Tandem verò, ut assensus sit evidens, non tantùm requiritur, ut eius fundamentum assentienti videatur certum & solidum, & etiam

am in se sit tale; sed etiam requiritur, ut illud fundamentum non sit alterius testimonium, vel narratio; sed vel sit sensus, vel solida aliqua ratio perspicuè demonstrans rem ita se habere.

II. Quemadmodum igitur assensus potest esse firmus, quamvis non sit certus, ut videre est in hæreticis, absque ullo timore aut formidine assensum præbentibus iis dogmatis, quæ Catholica Fidei aut bonis moribus repugnant; ita etiam assensus potest esse certus, quamvis non sit evidens: qui enim assentitur propositioni alicui propter DEI testimonium in sacrâ Scriptura propositum, eius assensus proculdubio est valde certus, quia nititur certissimo fundamento, videlicet DEI testimonio, non tamen est evidens, non enim ideo assentitur Theologus, quod aut sensu aut ratione percipiat rem ita se habere: sed quod Deus asserat, aut dicat rem ita se habere.

12. Ex his patet, hos tres gradus perfectionis, qui in assensu mentis cernuntur, ita se habere, ut primus latius pateat secundo, & secundus tertio; quemadmodum etiam in gradibus necessitatis, κατὰ παντός latius patet quam καὶ αὐτὸ, & καὶ αὐτὸ quam κατὰ μέρος τοῦ αὐτοῦ.

ART. II.

*Quomodo inter se differant, scire, credere
& opinari.*

1. **O**Mnis assensus mentis vel est actus sciendi, vel actus credendi, vel actus opinandi: quodcumque enim judicamus aliquid esse verum, vel certò scimus illud esse verum; vel credimus illud esse verum propter alterius testimonium; vel propter levem, & inefficacem rationem opinamur illud esse verum.

2. Actus sciendi, cum opponitur actibus credendi & opinandi, latè accipitur, pro quavis notitia actuali certa & evidente; quomodo accepta scientia non solum cernitur in disciplinis speculativeis, sed etiam in practicis: nam in Philosophia morali, quæ est disciplina practica, non opinamur, aut credimus, sed evidenter scimus actiones liberalitatis esse honestas, actiones vero vitiorum ei oppositorum esse inhonestas: in edificatoria arte non opinantur aut credunt, sed evidenter sciunt periti Architecti bases in ædificiis esse ad libellam collocandas, columnas esse ad perpendicularum erigendas, aliaque similia: nec solum circa universalia, sed etiam singularia versatur hæc notitia. Nam cum video *Pe-*

stantem, aut audio *Petrum* loquentem non opinor, aut credo, sed scio *Petrum* loqui & stare.

3. Huius divisionis sufficientia sic demonstratur: omnis assensus mentis vel nititur testimonio, vel ratione: si nititur testimonio, est fides actualis, seu actus credendi; si verò nititur ratione, vel nititur ratione certâ & solidâ, estque scientia; vel nititur ratione tantum probabilis, estque opinio.

4. Assensus nitens alterius testimonio, vel nititur testimonio *divino*, & à Scholasticis appellatur *fides divina*; vel nititur testimonio *humano*, & appellatur *fides humana*.

5. Hic obiter notare possumus Pontificiorum *ἀβελήαν*; qui nobiscum fatentur, eam eandem non divinam sed humanam esse, quæ præcipuè testimonio hominum nititur: & nihil minus audacissimè asseverant, assensum, quem præbemus articulis fidei & ipsi sacræ Scripturæ unde illi articuli colliguntur, niti testimonio *Ecclesiæ* (ut vocant) *representativæ*, h. e. Episcoporum & Pastorum in generali concilio congregatorum; item *Ecclesiæ* (ut ipsi loquuntur) *virtualis*, h. e. ipsius Pontificis Romani: atque ita aut fateri cogentur, omnem fidem *viatorum* humanam esse, penitus videlicet sublatâ fide *vinâ*, aut eorum Episcopos non homines sed DEOS indigitandos esse.

6. Pulchra institui potest comparatio inter scientiam, opinionem, & fidem divinam: scientia enim est assensus *firmus, certus, & evidens*; fides divina est assensus *firmus & certus, sed non evidens*; opinio denique etsi aliquando sit assensus *firmus*, h. e. sine hæsitatione, aut dubitatione, sæpè tamen *neque est firmus, neque certus, neque evidens*.

7. *Scientia* est assensus *firmus*, quia is qui scit propositionem aliquam esse veram, non dubitanter aut hæsitanter assentitur, sed firmiter: est assensus *certus*, quia is qui scit, nititur solido aliquo fundamento; alioqui non sciret, sed opinaretur: denique est *evidens*, quia sciens non ideo assentitur, quòd alius testetur eam propositionem esse veram, sed quòd ipse vi alicujus evidentis argumenti, percipiat rem ita se habere.

8. *Fides divina* est assensus *firmus*, quia illi qui in DEUM credunt, non hæsitant, aut dubitant de veritate historiæ sacræ, & promissionum divinarum: est assensus *certus*, quia nititur certissimo fundamento, videlicet DEI testimonio, qui est ipsa veritas: non tamen est evidens; is enim qui credit, non ideo assentitur, quòd sensu aut ratione percipiat rem ita se habere, sed quòd DEUS hoc testetur & asserat.

9. Hinc patet, quàm egregiè Apostolus, undecimo ad *Hebræos*, vers. primo, naturam fidei

fidei divinæ expreſſerit; cū enim dicit eam eſſe ὑπόστασις, indicat ejus *firmitatem & certitudinem*; cū verò dicit eam eſſe ἡδὲ ἐ βλεπόμεναι, ejus *inevidentiam & obſcuritatem anigmaticam* declarat.

10. *Opinio* aliquando poteſt eſſe aſſenſus *firmus*, (nonnunquam enim homines ita moventur levibus rationibus, ut eas pro validiſſimis argumentis habeant, ideoque abſque ulla hæſitatione aut formidine partis oppoſitæ aſſentiuntur;) nunquam verò eſt *certus aut evidens*: is enim qui opinatur, vel nititur levibus rationibus, vel hominum testimoniis, quæ nunquam pariunt nobis aut certitudinem aut evidentiam judicandi.

11. Dicet aliquis, hanc comparisonem *fidei, ſcientiæ, & opinionis*, quam iam attulimus, derogare de dignitate fidei; ex ea enim ſequitur, quamlibet ſcientiam eſſe perfectiorem aſſenſum fidei, quia viz: deest fidei evidentia, quæ tamen competit ſcientiæ. Reſpond. ſcientiam eſſe perfectiorem fide ſecundum quid, quia viz: eſt aſſenſus evidens; fidem verò eſſe perfectiorem qualibet ſcientiâ ſimpliciter & abſolutè; idque propter duas rationes, 1. enim fides verſatur circa nobiliſſimum obiectum; h. e. circa magnum illud myſterium pietatis, Deum in carne revelatum, juſtificatum in ſpiritu, conſpectum ab Angelis, & prædicatum Gentibus

ous. 2. fides nititur certissimo fundamento,
i. e. D E I ipsius testimonio, qui ipsa veritas
est, quique nec fallere nec falli potest.

A R T. III.

An fides semper sit ὥς ἔβλεπομένων.

DIctum est superiori articulo, fidem om-
nem, sive sit *divina*, sive *humana*, esse
sensum inevidentem; & ob id Apostolum 11.
1. *Hebraeos, vers. 1.* asserere fidem esse ὥς ἔβλεπομένων: idem etiam confirmari potest ex
Cor. cap. 13. vers. 12. ubi Apostolus asserit,
nos nunc videre per speculum, & in enigmate.
em ex doctrina ejusdem Apostoli, de *cessatio-*
& evacuatione fidei, quæ futura est in patriâ,
eo enim fides evacuari dicitur, & non perfici,
ut charitas, quia imperfectionem quandam,
mirum *obscuritatem & inevidentiam*, in sui ra-
tione & essentiâ involvit: quare *Augustinus*
illud *Johannis 14. vado parare vobis locum,*
regiè dicit, eat *DOMINUS*, ut paret locum;
& ut videatur; lateat, ut credatur. Similiter
ecet *Gregorius, Hom. 16. in Evang. & lib. 4.*
Matth. cap. 5. apparentia (inquit) non habent fi-
dem, sed agnitionem: & iterum: hoc veraciter
aitur credi, quod non valet videri.

2. Ut autem hoc planius evadat, afferam & solvam ea argumenta, quæ probant ea etiam quæ videntur vel sciuntur, sub fidei objecto comprehendi: quale imprimis est illud DOMINI ad Discipulos, *Iohan. 14. dixi vobis priusquam fiat, ut cum factum fuerit, credatis: hinc enim colligitur, fidem esse aliquando rerum per experientiam cognitarum, atque adeo visarum.*

3. Deinde *Iohan. 20. cum dixisset Thomas Apostolus: nisi videro, non credam; CHRISTUM videlicet redivivum; dixit ei DOMINUS jam credenti, quia vidisti me Thoma, credidisti.*

4. Tertiò: cæteri quoque Apostoli, & Virgo Maria, multique alij fideles, quod viderunt hoc crediderunt; CHRISTUM videlicet hominem, passum, mortuum, sepultum, à mortuis resurgentem, & in cœlos ascendentem, & alia multa quæ ipsis fidei articulis expressa sunt: unde *Iohan: 1. Epist. 1. ait, quod audivimus, quod vidimus oculis nostris, quod perspeximus, & manus nostræ contrectaverunt, de verbo vite annuntiamus vobis.*

5. Quartò: Philosophus aliquis sciens per Demonstrationem, unum DEUM esse omnium rerum principium & causam, potest ejusdem propositionis accipere fidem, manente prior cognitione; si videlicet è Pagano fiat Christianus: is ergo simul habebit fidem & scientiam
ejusqu

ejusque fides pro objecto habebit res evidenter scitas seu visas.

6. Ut hæc argumenta tollantur, primò ponam aliquot fundamenta, ex quibus horum argumentorum solutiones colligi possunt; deinde *Fonseca, Estii*, & aliorum pravam doctrinam de repugnantia *fidei & scientiæ* confutabo. Primum fundamentum sit hoc; Fides seu credere sæpenumero in Scriptura, & apud probatos *Authores* generaliter accipitur, pro eo quod est quovis modo assentiri & indicare aliquid verum esse: sic enim dicitur aliquis oculis suis credere, & apud Dialecticos qualecunque argumentum fidem facere dicitur.

7. Secundum fundamentum est: *S. Thomam*, aliosq; *Apostolos & fideles*, aliud vidisse, aliud credidisse: hominem enim viderunt, & DEUM crediderunt: h. e. aut ait *Augustinus*, Cernebant hominem viventem quem viderant morientem, & credebant DEUM in carne latentem; & alibi, apparuit inter homines homo, offerens HOMINEM videntibus, DEUM servans credentibus.

8. Tertium fundamentum: fides dicitur assensus inevidens: item dicitur esse *ἄπιστος & βλεπομένη*, non quòd ea quæ creduntur, omnino inevidētia sint, & nullo modo videātur; sed quòd quatenus creduntur, inevidētia sint, seu quòd non habeant evidentiam ab eo propter quod creduntur:

In hoc enim differt fides à scientiâ, quòd fundamentum quo nititur scientia, (h. e. *medium demonstrationis*) per evidentiam rei intellectum convincat, causas ejus aperiendo; fundamentum verò quo nititur fides (videlicet *Dei authoritas*) intellectum convincat, non per evidentiam rei cui assentimur, sed per certitudinem suam & infallibilitatem. Cùm igitur munus fidei, non sit efficere ut res obscuræ fiant perspicuæ, sed efficere ut intellectus cedat authoritati dicentis, & sic assentiatur; manifestum est ea quæ creduntur quatenus creduntur esse inevidentia, seu non habere evidentiam à fundamento suo propter quod creduntur: vide D. Pareum de *Iustificazione*, lib. 2. cap. 5. & D. Richardum Field, de *Eccl.* lib. 4. cap. 8. Cæterùm hoc non impedit, quo minùs ea quæ creduntur aliâ ratione evidentia sint, & ex se manifesta vel sensibus externis vel rationi: sicut enim una & eadem propositio, quatenus est conclusio demonstrationis judicatur esse necessaria, & non posse aliter se habere; quatenus verò est conclusio probabilis syllogismi, judicatur ab eodem homine contingens, & posse aliter se habere: ita etiam Articuli quidam fidei, quatenus ab Apostolis sensu percipiebantur, aut à nobis ratione manifestâ demonstrantur, evidentiam habent & claritatem; quatenus verò creduntur propter Dei testantis authoritatem, evidentiam illam

illam non habent, & ob id rectè dicuntur : *ἐλα-
μύμενα*.

ART. IV.

*An fides possit esse simul cum scientia de
eadem propositione, & in eodem
intellectu.*

1. **Q**uari solet de scientia & fide, *utrum u-
nus & idem homo possit simul credere &
scire eam propositionem cui assentitur esse veram;
an verò tanta sit repugnantia fidei & scientiæ,
ut simul in eodem intellectu existere nequeant.*
In hac controversia, tanta est opinionum varie-
tas, ut vix invenias duos celebres viros de ea
idem sentientes: primò enim Scotus, in 3.
Sent. Dist. 24. questione unicà dicit, *Neque a-
ctus, neque habitus fidei & scientiæ, posse simul
in eodem intellectu existere circa idem subje-
ctum.*

2. Secundò Durandus, quest. 1. prologi
Sent. & lib. 3. Sent. dist. 17. quest. 4. planè con-
trarium statuit, dicens *fidem & scientiam circa
eandem propositionem, & in eodem intellectu si-
mul existere posse, tam secundum actus, quàm se-
cundum habitus.* Tertiò, Petrus Fonseca, in lib.
6. Metaph. cap. 10. quest. 1. Sect. 5. asserit habi-

tus fidei & scientia posse existere in eodem intellectu, & de eodem subiecto, ita tamen ut actus ab iis productus non sit actus fidei, sed scientia quaedam, eaque supernaturalis, propter concursum fidei ad eum producendum. Quartò: Gulielmus Estius, Duacensis Theologus, in 3. Sent. dist. 24. Art. 3. tria asserit: 1. habitus fidei & scientia, posse simul existere in eodem intellectu, & de eodem obiecto. 2. utrumque habitum diversis temporibus posse suum actum exercere. 3. actum quem tum elicit habitus fidei, non esse fidem consideratam secundum totam amplitudinem sue significationis: hoc est, secundum omnes conditiones in ea requisitas, quia videlicet non est inevidens rei notitia.

3. Quinta sententia, eaque verissima, est acutissimi Doctoris Antonii Ruvio Rhodensis, in suo opusculo de habitibus, tractatu 3. quæst. 3. ubi etiam tria innuit: primò, hos habitus posse simul esse in eodem intellectu, & de eodem obiecto. 2. utrumque habitum diversis temporibus posse suum actum exercere, sed non eodem tempore. 3. actus ab illis habitibus, diversis temporibus elicitos, esse veros & propriè dictos istorum habituum actus, & per præsentiam habitus sciendi nihil derogari de proprietate actus credendi. Dico Ruvium hæc tantum innuere; quia expressè & directè ibi loquitur solummodo de scientia & opinione; eadem autem ratio est scientiæ

scientiæ & fidei, quoad possibilitatem & impossibilitatem coëxistendi, ut cuivis manifestum est.

4. Primò igitur probatur contra *Scotum*, habitus fidei & scientiæ posse simul esse in eodem subjecto, & circa idem objectum, idque hac ratione: Si quid impedit quo minùs hi habitus in eodem intellectu coëxistant, illud maxime est repugnantia actuum ad quos referuntur: Sed hoc non impedit: Ergo &c. probatur assumptio: Habitus nihil sunt aliud, nisi faciles & expeditæ potentiæ ad actus: sed non impossibile est, aliquem habere simul potentias ad repugnantes actus, quos potest diversis temporibus exercere, licèt simul non possit exercere utrumq;: nam simul habemus potentiam ad flendum, & potentiam ad ridendum: item potentiam ambulandi, & potentiam sedendi; quamvis harum potentiarum actus adeo repugnantes sint, ut non possint uni subjecto simul inesse. Secundò, potest aliquis, qui per fidem novit mundum à D E O fuisse creatum, postea per Demonstrationem acquirere scientiam de creatione Mundi, quâ productâ & acquisitâ non destruitur fides de illo articulo; sic enim non liceret homini Christiano, Metaphysicæ & Physicæ operam dare, ex quibus colliguntur Demonstrationes de creatione Mundi: non enim licet ea facere quæ fidem aut destruunt, aut imminuunt.

5. Secundo: probatur contra *Durandum*, non esse possibile, ut intellectus eodem tempore, id est, uno & eodem instanti eliciat, & inevidentem assensum fidei, & evidentem assensum scientiæ; quia sicut impossibile est, ut homo per sensum visus eandem rem eodem tempore *distinctè & confusè* videat & percipiat, ita etiam impossibile est, ut homo per intellectum, qui est animi oculus, eandem rem eodem instanti evidenter & inevidenter percipiat; ideoque impossibile est, ut simul habeat duos actus; unum evidentem, scientiæ; alterum inevidentem, fidei.

6. Tertiò: probatur contra *Fonsecam & Estium*, habitum fidei, quamvis in eodem intellectu coëxistentem habeat habitum scientiæ, posse elicere verum & propriè dictum actum fidei, idque secundum omnes conditiones in actu credendi requisitas: & proinde fidem & scientiam posse esse in eodem intellectu, & de eadem propositione, etiam quoad actus, sed diversis temporibus elicitos: ratio est hæc: potest aliquis fidelis, etiam post acquisitam scientiam de creatione mundi, ita apud se statuere; *Ego tam firmiter assentior huic propositioni, Deus creavit mundum, propter DEI testantis auctoritatem, ut quamvis per rationem aliquam non perciperem mundum esse à DEO creatum: igitur quamvis corrupta ratio contrarium dictitaret,*

ret, assentirer tamen isti propositioni sine ulla formidine aut metu.

7. Hoc iudicium mentis sine controversia provenit à sola fide, non à scientia & fide simul, estque verus & proprie dictus fidei actus; hoc est, non deest ei ulla conditio in actu credendi requisita: prius probatur contra *Fonsecam*; quia neque scientia, neque aliquis alius naturalis habitus potest aliquid tale dictitare. Posterius etiam probatur, tum contra *Fonsecam*, tum contra *Estiam*; quia assensus ille nititur solâ authoritate testantis: Ergo est inevidens: consequentiæ ratio est, quòd assensus ille sit inevidens, cujus fundamentum quo nititur non valet parere evidentiam, sed certitudinem tantum: at hic assensus est talis: nam authoritas testantis non convincit intellectum nostrum per evidentiam & claritatem rei, sed per suam certitudinem & irrefutabilitatem. Ratio propositionis majoris est hæc: talis est assensus, quale est medium & fundamentum quo nititur: Si enim medium sit certum, possitque intellectum nostrum certificare, & ut tale cognoscatur ab assentiente, noster assensus est certus: Si verò non ita se habet, est incertus: Ergo pari ratione, si medium valeat parere evidentiam intelligendi, assensus est evidens; si verò non valeat, est inevidens.

ART. V.

De fidei divisione in explicitam, & implicitam; & an inevidentia, quam fidei tribuimus, faciat pro ceca & implicita Pontificiorum fide.

1. **S**cholastici Theologi dividunt fidem in *explicitam & implicitam*, vel ut loquitur *Lombardus, lib: 3. Sent: Dist: 25. in distinctam, & velatam seu confusam*: hujus distinctionis explicationem legere possumus apud clarissimum *Tilenum, parte primâ Syntagmatis, Disp. 38. Thes. 23. & 24. item apud Durandum, lib: 3. Sent. dist. 25. quest. 1. S. Thomam, 2. 2a. q. 2. Art. 7. Gulielmum Estium, lib. 3. Sent. Dist. 25.* ex quibus authoribus descriptiones membrorum istius divisionis sic colligi possunt: fides explicita, est qua aliquid creditur secundum se, distinctè, & in particulari. Implicita verò, est qua aliquid creditur non in se, sed in alio, tanquam in universali; Exempli gratiâ, Christiani rudes & simplices (ut loquuntur) qui ea sola intelligunt, quæ ad salutem absolutè necessaria sunt, ut articulos fidei, decalogum, & cætera, cum ex animo profitentur se credere *S. Scripturam esse DEI verbum, & proinde fide dignam,*

nam, duplex habent suæ fidei objectum; unum generale, quod formaliter, explicitè, & per se credunt: alterum particulare, quod implicitè & ex consequenti credunt: objectum generale, quod explicitè credunt, est *Scripturam esse DEI verbum, & proinde fidem ei adhibendam esse*: objecta particularia, quæ implicitè in illo generali & ex consequenti credunt, sunt *historiæ & dogmata Scripturæ*, quorum cognitionem nondum assecuti sunt, ut *Noachum habuisse tres filios, Abrahamum duos, non ablatum esse sceptrum à Iuda ante adventum Messia*: qui enim credunt *Scripturam totam esse veram*, illi implicitè & ex consequenti credunt omnia esse vera quæ in *Scriptura continentur*, hoc est, habent fidem implicitam omnium *historiarum, dogmatum, & prædictionum Propheticarum*, quæ sunt in *sacræ Scripturæ volumine*, omnium (inquam) quorum particularem & distinctam notitiam non acquisiverunt.

2. Quæri hîc potest, an hæc divisio fidei in *explicitam & implicitam*, in Scholis Ecclesiarum reformatarum ferenda sit; Respond. duabus assertionibus: prior est hæc; prædicta distinctio fidei admitti potest, si sano modo concipiat: certum enim est non solum Laicos & simpliciores, sed etiam clarissimos & doctissimos Theologos quædam implicitè credere in isto generali quod *Scriptura sit D E I verbum, & proinde*

proinde fide dignissima; quædam (inquam) quorum distinctam intelligentiam nondum assecuti sunt: hoc enim patet ex quotidiano nostro in cognitione Scripturæ profectu, qui tamen non arguit Scripturæ ipsius obscuritatem (ut nungantur Pontificij) sed ingenij nostri imbecillitatem, & mysteriorum cœlestium, quæ in Scriptura passim traduntur, immensam opulentiam, quæ sensim angusto illi vasi mentis humanæ instillanda est, non autem tota simul infundi potest.

3. Secunda assertio est hæc: prædicta distinctio fidei Christianæ, si ita accipiatur ut à Pontificijs accipi solet, rejicienda est tanquam crassa, absurda, & naturæ fidei planè contraria: illi enim per *fidem implicitam* intelligunt eam fidem quâ Laici ignota & nondum intellecta fidei dogmata credunt implicitè in illo generali, *quòd vera sint omnia quæ Romana Ecclesia credit & pro veris amplectitur*; quæ quidem fides non est divina, sed humana; id est, non nititur DEI, sed hominum testimonio: non est *ὑπὸ πίστεως* aut *ἐλεγχος*, sed levis & fallax conjectura, quæ non DEI verbo, sed hominum Iudicio per se parùm firmo, atque adeo fragili admodum & ruinoso fundamento nititur.

4. Quæri etiam potest; an *inevidentia* quam non solum Theologi *Sententiarii*, sed etiam Orthodoxi Doctores fidei attribuunt, faciat

faciat pro cæcâ illâ & implicitâ Pontificiorum fide: generalis enim & confusus ille assensus, qui solo Ecclesiæ *Romanae* testimonio nititur (ut id quod res est dicam) maximè est inevidens. Respond. *inevidentiam* nihil pro eorum sententia facere: quia inevidentia illa non excludit omnem notitiam, sed eam solam quæ nititur medio scientifico; id est, sensu aut evidente ratione à naturâ rei petitâ. Secundò, quia certitudo, quæ est secunda fidei conditio, necessariò præsupponit firmam notitiam & persuasionem de doctrinâ, cui assentimur, quòd non sit hominis sed **DEI** verbum: talis autem notitia aut persuasio implicitæ Pontificiorum fidei velut è regione adversatur, ac proinde in eâ certitudo inveniri non potest.

ART. VI.

De triplici lumine, videlicet naturæ, fidei seu gratiæ, & gloriæ.

I. **I**N Theologia Scholastica variæ inveniuntur distinctiones petitæ ab istis tribus terminis, *naturâ, gratiâ, & gloriâ*. Prima est, quâ **DEI** Opt: Max: regnum distinguitur, in *regnum naturæ, regnum gratiæ, & regnum gloriæ*. Regnum naturæ, est naturale illud imperium, quod

quod DEVS habet in omnes res creatas, quas pro arbitrio regit & gubernat. Regnum gratiæ, est quo DEVS regnat in Ecclesiâ suâ in terris militante. Regnum gloriæ est, quo regnat in Ecclesiâ in cœlis triumphante.

2. Secunda distinctio, est quâ DEI localis præsentia distinguitur in *præsentiam naturalem*, seu essentialem, *gratiosam*, & *gloriosam*. Secundum præsentiam naturalem DEVS est ubique : per præsentiam gratiosam DEVS dicitur esse in iustis & sanctis hominibus, & vicissim illi habitaculum & Templum DEI dicuntur; & per præsentiam gloriosam Deus dicitur esse in cœlis, ubi gloriam suam & maiestatis splendorem beatis hominibus & Angelis manifestat.

3. Tertia divisio, est quâ opera DEI *ad extra* dividuntur in *opera naturæ*, *opera gratiæ*, & *opera gloriæ*. Opera naturæ, sunt rerum visibilium & invisibilium creatio, conservatio, & cum iisdem cooperatio in omnibus earum actionibus: *nam in eo vivimus, movemur, & sumus*. Opera gratiæ, sunt verbi incarnatio, humiliatio, exaltatio, triplex ejus officium, videlicet Regium, Propheticum, & Sacerdotale: item electorum per verbi prædicationem & Sacramentorum administrationem efficax vocatio, eorundemque regeneratio, & justificatio. Denique opera gloriæ, quæ *Polanus* appellat opera DEI
post

post hanc vitam, sunt adventus DOMINI ultimus, resuscitatio mortuorum, universalis mundi hujus elementaris abolitio, aut saltem mirabilis transmutatio per ignem conflagrationis, ut loquuntur: item judicii ultimi processus, executio, & gloriæ DEI in omnem æternitatem manifestatio.

4. Quarta distinctio, est quâ vita humana dividitur in *vitam naturæ*, seu naturalem; *vitam gratiæ*, & *vitam gloriæ*. Vita naturalis posita est in conjunctione animæ viventis cum corpore. Vita gratiæ posita est in viatorum in terris peregrinantium conjunctione cum DEO per fidem, spem, & charitatem. Vita gloriæ posita est in æternâ illâ & immutabili hominum glorificationum coniunctione cum DEO, per claræ eius visionem, & ardentem amorem seu charitatem.

5. Quinta divisio, est quâ consilium & decretum DEI de æternâ quorundam hominum salute, dividitur in prædestinationem ad gloriam, & prædestinationem ad gratiam: prior est de fine, posterior de mediis ad finem: prior est DEI decretum de dandâ gloria; posterior est eiusdem decretum de dandâ eâ gratiâ, quam Scholastici vocant *gratiam gratum facientem*.

Sexta distinctio, est quâ lumen intellectûs humani dividitur in *lumen naturæ*, *lumen gratiæ* seu fidei, & *lumen gloriæ*. Lumen naturæ, est quo

quo ea cognoscimus quæ solis naturæ viribus, sine auxilio DEI speciali, intelligi à nobis & diiudicari possunt: de huius luminis virtute, & quousque se extendat (DEO favente) in sequentibus disputationibus fusè disseram. Lumen fidei, est quo ea cognoscimus & intelligimus quæ DEVS in verbo suo nobis patefecit. Lumen gloriæ, est quo beati spiritus in cœlis clarè & perspicuè vident gloriosissimam DEI essentiam. Huic triplici lumini respondet triplex Theologia, videlicet Theologia naturalis seu Metaphysica, Theologia revelationis quæ etiam Theologia *viatorum* dicitur, & Theologia visionis seu Theologia *comprehensorum*.

7. Solam hanc ultimam distinctionem ex instituto hîc propono, idque ut manifestum sit *Scholasticos* cum fidei inevidentiam attribunt, non tribuere ei cæcitatem & ignorantiam; sed notitiam quandam, quæ licèt obscura sit si conferatur cum visione quæ est in *patria*, ab ipsis tamen Scholasticis lumen vocatur; reliquas verò distinctiones propono quasi per accidens, quia videlicet habent pulchram analogiam & proportionem ad hanc distinctionem luminis intellectualis.

8. Analogia seu proportio harum distinctionum sic concipi potest: homo quatenus vivit *vitam naturæ*, est civis *regni naturæ*; utitur *lumine naturæ*, & per illud percipit eam DEI præsentiam

præsentiam quæ vocatur *præsentia natura*, item *opera natura* quæ illam præsentiam consequuntur. Idem homo, quatenus vivit *vitam gratia*, est civis *regni gratia*, utitur *lumine gratia* seu fidei, & per illud percipit DE I *præsentiam gratiosam* in corde suo, & *opera gratia* quæ eam præsentiam consequuntur. Idem denique, quatenus vivit in cœlis *vitam gloria*, est civis *regni gloria*, utitur *lumine gloria*, ac per illud percipit DE I *præsentiam gloriosam*, item *opera gloria*, h. e. inenarrabilia effecta glorioſæ iſtius præſentiæ.

9. Obiter hîc notari poteſt, quòd ſicut olim DEVS inchoavit opus creationis à *lumine corporeo* & ſenſibili, ita etiam opera regenerationis & glorificationis noſtræ à *lumine ſpirituali* orditur: cùm enim DEVS efficaciter electos vocat ad ſalutem per ſpiritum ſanctum, primò eorum intellectum illuminat lumine fidei, & colluſtrat; ſecundò voluntatem emollit & ſanctificat. Similiter in opere glorificationis ordine naturæ præcedit illuminatio intellectûs noſtri, per lumen gloriæ, ad DE I eſſentiam clarè & perſpicuè videndam; deinde ſequitur voluntatis inflammatio & incenſio per ardorem charitatis. Ratio hujus ordinis eſt, quia cognitio præcedit amorem, atque adeo clara cognitio ſeu viſio præcedere debet ardentem & perfectum amorem.

10. Contrà verò *Draco ille Magnus*, qui meritò *Rektor tenebrarum* vocatur, dirum istud opus æternæ perditionis à tenebris orditur: cum enim (ut docet *D. Thomas*, 1.2. *quæst.* 77. *Art.* 8. & cum eo *Cajetanus*, *Durandus*, *Capreolus*, & *Estius*) non possit esse peccatum in voluntate sine prævio errore intellectûs, vafèr ille spiritus primò intellectui caliginem, & quasi noctem quandam offundit; deinde voluntatem à vero bono ad bonum apparens convertit, & sensim eam indurat.

A R T. VII.

*An detur in viatoribus lumen aliquod
clarius fidei lumine.*

1. **T**heologia dividi solet in Theologiam *Laicorum* & Theologiam *Doctorum*, quam *argumentativam* & *Scholasticam* vocant. Prior est nuda notitia credibilium (ut vocant) ad salutem necessariorum; posterior non est nuda notitia credibilium, sed est facultas quâ valemus articulos fidei explicare, defendere, & confirmare, aliosque de eorum veritate instruere.

2 Theologia *argumentativa* seu *Scholastica* duplici nomine Theologiam *Laicam* excedere

dere dicitur: primò quòd extendat se ad plura credibilia; plura enim intelligunt viri docti in spiritualibus, quàm Laici & simplices. Secundò quòd valeat explicare aliis ea quæ credenda sunt, eaque defendere, & confirmare contra Atheos, Iudæos, Mahumetanos, Ethnicos. Hæc Theologiæ distinctio præbuit nonnullis, de quibus loquitur *Durandus in prol. Sent. quæst. 2.* occasionem excogitandi lumen quoddam spirituale in viatoribus à lumine fidei diversum, eoque clarius & excellentius: cùm enim in omnibus fidelibus sit lumen fidei, fatendum est in Doctoribus & Pastoribus esse lumen quoddam clarius fide, cujus beneficio altiore habent (ut loquitur *Durandus*) cognitionem de credibilibus, quàm per fidem.

3 Prima ratio hujus sententiæ peti solet ab *Augustini* testimonio super illis verbis *Iohan. i. vers. 9. erat lux vera, &c.* ubi dicit, aliud esse lumen ad credendum, aliud ad intelligendum: item lucem increatam illuminare homines duplici lumine, parvulos quidem lumine fidei, quo nutriuntur ut lacte: Majores autem lumine sapientiæ, quo ut solido cibo vescuntur. Secunda ratio est hæc: necesse est propter bonum publicum Ecclesiæ, ut aliqui in eâ sint qui possunt fidem defendere, simplices instruere, & Ecclesiæ hostes confutare. Hoc autem non potest fieri per solum lumen fidei, seu per eam solam

N

cognitionem

cognitionem DE I quæ est omnibus fidelibus communis, sic enim quivis è fidelium cœtu possit ista munia obire: Ergo oportet in *Majoribus* esse aliquod lumen clarius fide, per quod habent de credibilibus altiore[m] quandam cognitionem.

4 Tertiò probant, quòd tale lumen non evacuet fidem, seu non ita repugnet fidei ut cum eo consistere nequeat; quia si tale lumen non posset stare cum fide, illud esset maximè propter oppositionem quæ videtur esse inter *Enigma* fidei, & *claritatem* illius luminis: sed illud non impedit; quia contraria, licèt non compatiuntur se in suis *excellentis*, tamen (ut dicunt) compatiuntur se in *Esse remisso* & diminuto, seu (ut alii loquuntur) in gradibus remissis: fidei autem obscuritas, quamvis intensis gradibus opponatur claritati beatificæ visionis, & ob id cum eâ consistere nequeat; non tamen sic, sed in esse remisso contrariatur huic lumini de quo loquimur: & ideo licèt lumen gloriæ evacuet fidem, hoc tamen lumen eam non evacuat aut abolet.

5 Hanc suam doctrinam declarant exemplo aëris, qui noctu est simpliciter tenebrosus, & meridie est simpliciter illuminatus, sed mane est partim illuminatus partim tenebrosus, nec tenebræ depelluntur totaliter ante horam meridianam: sic gloria quasi lumen meridianum totaliter expellit tenebras fidei: sed lumen hoc

Doctorem

Doctorum est quasi lumen auroræ, quod non depellit tenebras fidei, nec expellitur per lucem meridianam gloriæ, sed potius perficitur. Appello autem lumen gloriæ, lumen meridianum, quia cæcitas naturalis est quasi *densissima tenebra*, lux fidei est quasi *lux Lunaris*, lumen Scholasticum quasi *lux matutina*, & lumen gloriæ quasi *splendor lucis meridiane*.

6 Hæc est sententia quorundam Theologorum *Sententiariorum*, contra quam *Durandus* fusè disputat: Ego autem sine longiori disquisitione meam sententiam, de medio hoc lumine, duabus aut tribus assertionibus proponā: prima sit hæc; *lumen illud quod vocant medium inter lumen fidei & lumen gloriæ, quatenus extendit se ad plura credibilia quàm fides Laicorū, non est aliquid à fidei lumine distinctum*; sed est perfectior quidam gradus fidei, vel (ut alii loquuntur) extensio quædam fidei.

7 Secunda assert. *Lumen prædictum, quatenus est defensivum & explicativum articulorum fidei, non est vera & propriè dicta scientia*, ut bene probat *Durandus*: quia omnis scientia propriè dicta resolvitur in principia evidentia, & per se nota: at notitia *Pastorum & Doctorum*, quam habent de rebus spiritualibus, non potest resolvi in principia per se nota, sed tantum in principia naturaliter inevidentia, quæ Spiritus Sanctus nobis in verbo patefecit.

8 Tertia assert. *Lumen illud medium, non est species luminis intellectualis à tribus prædictis distincta, sed est complicatio quadam luminis naturæ & luminis fidei, h.e. Philosophiæ & Theologiæ: nam per Philosophiam Theologiæ applicatam, articulos fidei explicamus, defendimus, confirmamus contra adversarios, eosque confutamus.*

ART. VIII.

In quò solvuntur tres quæstiones.

Prima est, *An fides bene distinguatur in infusam, & acquisitam?*

Secunda est, *An fides sit certior ipsi scientiis?*

Tertia est, *Quid sit propriè credere in D E U M.*

I **B**ONAVENTURA, egregius inter pres *Magistri Sententiarum*, in lib. 3. *Dist. 23. Art. 2. quæst. 2.* asserit duo esse requisita ad habitum fidei: primò, ut intellectus instruat de credibilibus. Secundò, ut inclinetur & inflectatur ad assentiendum illis articulis, quæ credendi sunt: aliud enim est, *scire quid dicatur* in aliquo Scripturæ textu; aliud est, *scire verum esse id quod ibi dicitur*: Ethnicus enim, aut infidelis, scire potest quid dicatur in historiâ Mosâicâ aut Evangelicâ; at non potest scire verum esse illu

illud quod ibi dicitur , nisi intellectus ejus à DEO moveatur ad assentiendum. Quamvis igitur fides sit quid *acquisitum* quoad illam *informationem mentis de credibilibus* (est enim ex auditu, *Rom. 10.*) est tamen quid merè supernaturale, & *infusum*, si consideretur secundum illud quod in ea est præcipuum, h. e. *inclinationem mentis ad assentiendum*.

2 Cùm fides propriè dicta sit DEI donū, & non quid à nobis ipsis acquisitum, vix satis commoda videtur illa fidei distinctio in *infusam* & *acquisitam*; nisi vel dicamus, illam non esse divisionem fidei in duas diversas species, sed potius esse distinctionem unius & ejusdem fidei in duas ejus considerationes: nam pro diversa consideratione, fides est & quid acquisitum, & quid infusum, ut jam dictum est: vel dicamus fidem latè accipi pro quovis assensu, quo assentimur S. Scripturæ: talis enim assensus est duplex; quia quidam ei assentiuntur, moti humanâ persuasione, h. e. propter amorem & reverentiam quo prosequuntur dicentem, vel propter rationes & argumenta: & horum assensus à Bonaventura dicitur fides acquisita, latè videlicet accepto nomine fidei: alii verò assentiuntur, quia primæ veritati tanquam certissimo fundamento innituntur, & horum assensus est fides infusa, proprièq; appellatur fides.

3 Bonaventura comparans fidem & scientiam

rias Philosophicas quoad certitudinem, distinguit certitudinem in *certitudinem cognitionis* seu speculationis, & *certitudinem adhesionis*, dicitque fidem esse certio- rem scientiis certitudine adhesionis, quæ præcipuè respicit voluntatem; non verò certitudine speculationis, quæ ad intellectum pertinet: dicit eam esse certio- rem certitudine adhesionis, *quia fideles Christiani nec argumentis, nec tormentis, neq; blandi- mentis, adduci possunt & inclinari* (verba ipsius sunt) *ut veritatem quam credunt, vel ore tenus negent: quod nemo peritus alicujus scientia face- ret, si acerrimis tormentis cogeretur sententiam suam de conclusione aliqua Geometrica aut A- rithmetica retractare: stultus enim & ridiculus esset Geometra, qui pro sua sententia in contro- versis Geometricis mortem auderet subire, nisi in quantum fides dicat non esse mentiendum.*

4 Verùm quicquid dicat Bonaventura, fi- des est certior scientiis, tum certitudine cogni- tionis, tum certitudine adhesionis: idque quia certitudo cognitionis oritur ex certitudine fun- damenti, quo nititur intellectus noster cùm as- sentitur alicui propositioni: fundamentum au- tem quo nititur assensus fidei est DEI veritas & autoritas, quæ est longè certius fundamen- tum quàm humana aliqua ratio. Interim si im- proprie accipiatur certitudo cognitionis, pro firmitate assentiendi quæ opponitur hæsitationi

& dubitationi, non negandum est scientias esse fide certiores: scientia enim saepe tam firma est, ut excludat omnem dubitationem; quod non semper verum est de fide: quamvis enim non deficiat fons ille aquæ salientis in vitam æternā, non tamen putandum est virtutem hanc semper inoffenso tenore, extra omnem formidinis aleam stadium suum decurrere; sed potius perpetuam ei luctam cum diffidentia esse, ingenuè confitendum est.

5 Clarissimus **T I L E N U S** *Syntag. part. 2, Disp. 43. Thes. 5.* distinguit certitudinem in *evidentem*, & *non evidentem*: illam dicit esse eorum quæ vel rationis vel sensûs lumine videntur: cujusmodi sunt prima principia, & conclusiones evidenter ex illis deductæ, ac deinde ea quæ experienciâ magistrâ didicimus: istam vult esse eorum, quæ testis veracis affirmatione nituntur: unde fit ut quo major est autoritas testis, eo certior ac firmitior sit assensus credentis: hinc colligit ea quæ divino testimonio, cujus summa est autoritas, nituntur, summam quoque gignere certitudinem, ac respectu hujus causæ quæ nec fallere nec falli potest, longe certiora esse ea quæ credimus, quàm quæ rationis humanæ ductu aut lumine scimus.

6 Tertia quæstio in titulo proposita, est, quid sit *credere in D E V M*, & quo modo differat ab eo quod est *credere D E V M*, & *credere D E O*.

P. Lombardus, Lib. 3. Sent. Dist. 23. hæc explicans, sic ait; Credere D E O, est credere vera esse quæ loquitur: credere D E V M, est credere quod ipse sit D E U S: & credere in D E U M, est credendo amare, credendo in eum ire, credendo ei adherere, & membris eius incorporari. Hanc distinctionem Magistri probare non possum, quia ex ea sequitur, credere in D E V M esse actum & charitatis & fidei, quod est absurdum, cum diversorum habituum diversi sint actus.

7 Quare dicendum videtur, *credere in D E U M* in hoc differre ab eo quod est *credere D E O*, quod *credere D E O* sit fidem ei adhibere, quatenus simpliciter aliquid narrat: credere verò in D E V M, sit fidem ei adhibere quatenus aliquid promittit, seu assentiri ejus promissionibus, idq; cum triplici hac persuasione; Primò, quod non similet, aut hypocriticè agat, ut solent homines, sed quod révera velit beneficium illud in te conferre. Secundò, quod etiam possit præstare id quod pollicitus est, imò quod ita possit ut à nullâ validiori potentiâ impediri queat. Tertiò, quod consilium mutare nesciat, adeoque quod revera daturus sit id quod pollicitus est. Unde patet, quamvis fidem adhibeamus homini aliquid promittenti, nos non posse dici *credere in hominem*, nullam enim ex his tribus persuasionibus de homine habere possumus.

ART. IX.

Refellitur Sententia Nicolai Grevinchovii, dicentis habitum fidei non esse infusum, sed acquisitum.

CVILIELMUS AMESIUS, in sua rescriptione contracta ad responsum Nicolai Grevinchovii, cap. 10. probat contra eum aliosque Remonstrantes, habitum fidei esse à DEO infusum, & non à nobis ipsis per crebros & frequentes actus credendi acquisitum: *Grevinchovius* enim, licet ultrò fateatur fidem actualem seu actus credendi non à natura, sed à speciali DEI gratia provenire, negat tamen causam talium actuum esse fidem habitualem, seu habitum fidei à DEO infusum: sed contrà asserit per crebros fidei actus à speciali DEI gratia provenientes, tandem in nobis produci fidem habitualem; quemadmodum per crebros actus justitiæ & liberalitatis in nobis producuntur justitiæ & liberalitatis habitus.

2 Hæc sententia Nicolai, non solum est contraria doctrinæ Scholasticorum, & Modernorum Theologorum, tum Pontificiorum tum Evangelicorum, qui unanimi consensu virtutes Theologicas, habitus infusos vocant; sed etiam variis

variis iisque inevitabilibus incommodis est exposita.

3 Primò enim illi qui per verbi prædicationem, & internam S. Spiritûs efficaciam recèn conversi & renati sunt, vel habent solum actum fidei, vel & habitum & actum: si posterius est verum, habetur propositum: si prius, sequetur totum illud per quod renatus à non renato differt, ad actus, adeoque ad evanidum quid & instabile esse referendum: actiones enim nostræ non sunt permanentes, sed citò transeunt & evanescunt. Respondet *Grevinchovius*, illud per quod renatus à non renato differt, non totum, sed maximâ sui parte ad actus esse referendum: quæ quidem responsio quatenus asserit totum illud per quod renatus à non renato differt, ad actum non esse referendum, manifestè ipsius doctrinam destruit: si enim renatus aliquâ aliâ ratione à non renato differt, necesse est ut in eo sit bonus aliquis habitus, vel completus vel inchoatus eadem etiam responsio, quatenus maximam partem illius discriminis in actibus collocat, absurda est: quia cum vetus homo constet habitibus permanentibus, cur non etiam & novus quia item inde sequetur, statum gratiæ esse ad modum instabilem, & infinitis mutationibus obnoxium.

4. Secundò dictum illud, *sine fide impossibile est placere DEO*, II. ad Hebræos, vers. 6. ve

6. vel intelligendum est de habitu, vel actu fidei: si de habitu, habetur propositum; inde enim apertè sequitur, neminem posse esse in statu gratiæ, qui habitu fidei caret, & per consequens omnes renatos, ubi semel conversi & in statu gratiæ sunt constituti, illo habitu esse præditos: si de actu credendi intelligendum sit, sequetur renatos cum dormiunt & actu non credunt, DEO displicere, & in statu gratiæ non esse.

5. Tertiò, sic argumentatur *Amesius*, si homines recens vocati & conversi, non sunt præditi habitu fidei, sed tantum actus habent, quomodo possent in gratiâ persistere vel unâ nocte, dum nihil agunt. Respondet *Nicolaus*, dormientes esse planè fide destitutos, & tamen persistere in gratia, h. e. dilectione DEI: Hanc responsionem non immeritò absurdam judicat *Amesius*: primò, quia nemo sine fide in gratia persistere potest, nam sine eâ impossibile est placere DEO. Secundò, fidelem unâ cum veste fidem exuere, *Nicolai* somnium est: multi enim viri pii dormientes exspirarunt: si fidem tum non habuerunt, de eorum salute actum est: plura vide apud *Amesium*, cap. 10. istius Tractatûs.

6. Pro sua sententia varia affert argumenta *Nicolaus*, quæ tamen nullius ponderis sunt. Prima objectio: per verbi prædicationem non infunditur

infunditur habitus fidei, sed tantum producit actus: Ergo actus præcedit habitum. Respondet per verbum, & spiritus operationem, tanquam per causas instrumentales, produci ipsum fidei habitum, quamvis infusio istius habitus soli Deo ascribenda sit: verbum enim producit istum habitum præparando, D E V S verò infundendo. Secunda ob. D E V S in verbo suo primo exigit à nobis fidei actum, non verò habitum. Respondet *Amesius*, primò exigi arborem bonam, postea fructus bonos. Tertia ob. si habitus fidei in nobis producit ante actum, nos prius sumus fideles quàm actu credamus, quod absurdum est. Respondet idem, nos esse fideles actu primo (ordine naturæ, non temporis) prius quàm actu secundo credamus; hoc est, habitum fidei à quo fideles denominamur, non tempore sed naturæ ordine, præcedere actum fidei quod nemini videri debet absurdum. Vide cetera in Tractatu *Amesii*, cap. 10.

A R T. X.

An fides actualis aut habitualis infantibus insit, aut inesse possit.

- I. **A**SSERTIO prima: Non est impossibile, absolute loquendo, fidem tum actualem, tum habitualement.

habitnalem infantibus inesse. De fide habituali res est manifesta: nam infantes, in statu integritatis, nati fuissent habitibus originalis iustitiæ ornati, ut docent non solum *Sextentarii, Lib. 2. Sent. Dist. 20.* verum etiam *Evangelici Theologi*, cum differunt de primo hominis statu, quem *integritatis* vocant: unde patet manifestè, habitus fidei, spei, & charitatis, etiam nunc ijs inesse posse: quia quicquid olim possibile fuit, etiam nunc esse potest, modò respiciamus potentiam **DEI** absolutam.

2. Fidem etiam actualem, seu actum credendi, ijs posse inesse, facile probatur exemplo *Ioannis Baptiste*, qui *Lucæ 1. versu 24.* dicitur exultasse in utero matris, *ἐν ἀγαλλιάσει*, in gaudio: Ergo cognovit **DOMINI** sui præsentiam, & proinde infans potest actu intelligere: si autem infans potest actu intelligere, seu uti ratione; potest actu credere: fateor quidem hoc factum esse singulare, & proinde neminem ex eo posse colligere generalem hanc conclusionem, quòd videlicet fides actualis omnibus electis infantibus insit: veruntamen evidenter probat, **DEUM** arcanam & mirificam suam vim, in infantibus posse exerere, fide actuali eos donando, quamvis ordinariè nihil tale fiat.

3. Assertio secunda: *Non est probabile, infantes habere fidem actualem, seu actum credendi.*

di. Hæc assertio non contradicit præcedenti quia ibi docetur quid possit fieri, hîc verò quid actu & ordinariè fiat. Probatur igitur hæc assertio: primò, quia Scriptura, *Deut. Cap. 1. Vers. 39. & Iona Cap. 4. Vers. 11.* testatur, infante non cognoscere discrimen boni & mali; & proinde actuali intelligentiâ & cognitione carere. Fides autem actualis sine actuali cognitione esse non potest. Secundò: si fides actualis est in infantibus, ea vel oritur ex auditu verbi, vel ex internâ revelatione immediatè à solo DEO factâ. Prius admitti non potest; quia si verbum DEI intelligerent, attentè & reverenter audirent: cujus contrarium fieri videmus. At neque posterius, quia modus ille patefactionis est extraordinarius & rarissimus: Fides enim est ex auditu, *Rom. 10.* si autem omnes electi infantes haberent fidem actualem ex sola DEI revelatione ortam, modus ille jam esset ordinarius. Tertiò: sententia illa, quæ ascribit fidem actualem infantibus, non solum displicet *Nazianzeno, Augustino, & Scholasticis*, sed etiam *Calvino, Beza, Junio, Tileno, Parco*, aliisque omnibus Orthodoxis Theologis, solo *Luther* excepto, qui multis in locis eam sententiam profitetur.

4. Assertio tertia: *Omni probabilitate caret & manifestam contradictionem implicat ea sententia, quæ tribuit infantibus motus sanctos in intellectu*

Intellectus & voluntatis, sine actuali cognitione: motus (inquam) similes motibus seu actibus fidei & charitatis, sed ab iis verè diversos. Dico eam implicare contradictionem, quia motus seu operationes intellectus & voluntatis, non possunt esse sine cognitione: quid enim aliud est motus intellectus, quàm *intellectio*, seu actus intelligendi & cognoscendi? Nam intellectus non potest aliter moveri, & operari, quàm intelligendo; sicut nec oculus, nisi videndo; & auris auditus, nisi audiendo. Similiter omnis motus aut actus voluntatis, est *volitio*: omnis autem volitio præsupponit objecti cognitionem actualem; quia *ignoti nulla cupido est*. Hæc sententia tribui solet Theologis congregatis in Concilio Wittenbergensi, anno 1536. item Martino Chemnitio, qui in 2. parte examinis Concilii Tridentini, ad canonem 13. Sessionis 7. profitetur se amplecti eam sententiam de regeneratione infantum baptizatorum, quæ explicata est in formulâ concordie inter Theologos Saxonia & superioris Germania, anno 1536.

5. Quarta asserit. *Qui dicunt fidem inesse infantibus actu primo, non secundo; item iis inesse semen, germen, aut radicem fidei: illi necesse habent confiteri, primò se per semen fidei non intelligere D E I verbum: quia videlicet infantes illud non audiunt & intelligunt. Secundò se non intelligere*

intelligere aliquid à fide diversum, sed habitum fidei saltem incompletum, & inchoatum: quod quidem apertè profitetur clarissimus Iunius, in Thesium suarum opusculo, Dissut. 51. Thes. 8. Prima ratio est, quia sicut conditio requisita in fœdere operum, est actionū nostrarū perfectio ita etiam conditio requisita in fœdere gratiæ est fides in IESUM CHRISTUM DOMINUM nostrum: Ergo necesse est hanc conditionem omnibus fœderatis inesse: Infantes autem fidelium sunt fœderati, id est, ad fœdus & ad Ecclesiam pertinent, ut docent nostri Theologi contra *Anabaptistas*: Ergo necesse est fidem aliquam iis inesse, hoc est, vel actualem vel habitualem: nemo enim est fœderatus, nisi is in quo invenitur conditio requisita in fœdere. At si nomen illud fidei, si sit aliquid diversum à fide non est conditio requisita in fœdere gratiæ, nisi fortè quis dicere velit, DEUM aliud fœdus gratiæ pepigisse cum Infantibus, aliud cum adultis si enim diversa sit conditio requisita in fœdere ipsa fœdera sunt substantialiter diversa: substantia enim seu essentia fœderis posita est in conditionibus, quas ille stipulatur qui fœdus facit.

6 Præterea peccatum originis in baptismo tollitur *quoad reatum*, ut docent tum Pontificij, tum Evangelici Theologi; & proinde Infantes electi cum baptizantur, justificantur: nam justificat

justificatio posita est in peccati remissione, per quam ejus reatus tollitur: si autem justificantur, aliquam fidem habent, hoc est, vel habituales vel actuales; solâ enim fide justificamur.

7. Quinta assertio: *Sententia prædicta, quæ attribuit Infantibus solum habitum fidei, eumque vel completum, vel inchoatum, omnibus reliquis præferenda videtur*; tum quia eam amplectuntur ferè omnes Orthodoxi Theologi; tum quia communis sententia omnium Theologorum, de sublatione peccati originalis *quoad reatum* in baptismo, hoc est, de justificatione Infantum baptizatorum, nobis necessitatem affert eam amplectendi.

8. Ut autem hoc manifestum fiat, teneantur hæc fundamenta: primo, *peccatum originale Infantum electorum in baptismo tollitur, quoad reatum*: h. e. iis remittitur, & proinde ipsi justificantur: nam iustificatio posita est *in remissione peccati, et imputatione justitiæ Christi*. Secundo: *non putandum est, Infantibus in baptismo remitti solum originale peccatum, & postea remitti iis actualia*, quia remissio peccati, seu justificatio non iteratur, sed ut docent Orthodoxi Theol. est *unus & individuus actus*, & semel tantum fit. Tertiò, *si in prima infantia electi justificantur, necessario etiam eâdem ætate vocantur*, nam vocatio ordine naturæ præcedit iustificationem, ut patet ex gradatione Paulina, Rom. 8. vers. 30.

quam meritò *catenam salutis* vocare possumus. Dicit aliquis: illa gradatio *Paulina*, intelligenda est de adultis, & non de Infantibus, nam adulti priùs vocantur, quàm iustificantur: Infantes verò priùs iustificantur, & postea cùm verbum audiunt & intelligunt, vocantur. Sed videant illi qui hoc obijciunt nobis, an probabile sit, *ordinarie & plerumque, in procuranda electorum salute, ordinem & progressum in gradatione Paulina propositum, violari*: si enim omnes, qui in orbe Christiano nascuntur, atque adeo primâ ætate baptizantur, primò iustificantur, & post aliquot annos vocantur, manifestè sequetur, *ordinariè & plerumq; violari illum ordinē.*

9. His positis sic argumentor: Electi Infantes vocantur: Ergo habent fidei habitum, saltem incompletum. Ratio sequelæ est, quia nulla vocatio efficax est, sine renovatione intellectûs & voluntatis; nulla autem renovatio harum potentiarum animi esse potest, sine infusione bonorum habituum: si autem infunditur ullus habitus, fides infunditur; tum quia mens Infantis, non minùs est capax fidei, quàm aliorum habituum; tum quia nullus alius habitus est tam necessarius ad Infantis iustificationem: nam sine eo impossibile est Deo placere: præterea (ut docet clariss. *Trelcatius*) ipsa forma & essentia internæ vocationis (quæ sola in Infantibus esse potest) posita est in illuminatione & in
for-

formatione mentis, per fidem in CHRISTUM. Vnde D. Pareus in Comment. suo, in 8. ad Rom. vers. 30. de vocatione loquens, appellat eam, *vocationem ad fidem in CHRISTUM*. Et Ambrosius dicit, *vocare nihil esse aliud, quàm compungere ad fidem*.

10. Clarissimus Beza, quamvis in Conf. Cap: 4. Art: 48. fidei semen & germen Infantibus tribuat, tamen in aliis Libris manifestè asserit, electos Infantes in baptismo, non suâ, sed *piorum parentum fide interveniente, iustificari*: nam in Quest: part: 2. Resp: ad Quest: 123. asserit, *electis Infantibus conferri inscriptionem in fœdus, & peccati peccantis remissionem, & proinde iustificationem, interveniente fide piorum parentum*. Idem etiam docet Resp: ad Acta Colloquii Mompelgartensis, Tract: de Baptismo, ubi asserit *Infantibus propriâ fide destitutis, sic tribui fidem alienam, ut tamen pro sua, in illis ex DEI pacto censeatur*: item, *Infantes sicut alieno simul & suo peccato peccatores sunt, sic alienâ simul & suâ fide iustificari*; suâ (inquam) per *imputationem*: eandem ferè sententiam explicat & defendit doctiss: Cassander, lib: de Bapt: Infantum, explic: prop: 3. item multi Patres, viz: Iustinus, Ambrosius, Augustinus, Bernardus, & alii.

11. Hanc sententiam libenter amplecter, ad vitandas difficiles illas quæstiones, de fi-

de parvulorum, quæ hoc nostro sæculo agitari solent; nisi perciperem eam aliis longè gravioribus difficultatibus esse expositam. Primò enim, si Infantes iustificati in baptismo, omni fide sunt destituti, nondum efficaciter sunt vocati; & sic iustificatio, ordinariè, h. e. respectu omnium qui in Ecclesia visibili nascuntur, vocationem præcedet. Ratio connexionis est, quia nulla vocatio efficax esse potest, sine mentis renovatione per fidei habitum, ut suprà ostensum est: Infantes autem, ex hac sententiâ, nullam fidem habent: probatur autem vocationem non posse sequi iustificationem, sed necessariò eam præcedere; quia vocatio est mutatio & translatio hominis de statu miserix & corruptionis, ad statum gratix: illi autem qui iustificati sunt, non possunt mutari & transferri à statu miserix ad statum gratix, quia iam in statu gratix, non verò in statu miserix sunt: unde Propheta, *Psal: 32 vers. 1. Beatos illos prædicat quorum peccata remissa sunt*: Ergo nemo post iustificationem potest vocari ad gratiam & salutem.

12. Secundò, ex hac sententiâ sequi videtur, ordinarium modum iustificandi, esse per alienam fidem, ac proinde ordinariè & plerumque causam tum *meritoriam* tum *instrumentalem* nostræ iustificationis, non in nobis existere, sed esse externam & imputatam: nam ex hac sententiâ, omnes electi, qui in visibili Ecclesia nascuntur

nascuntur, seu in orbe Christiano, primâ ætate iustificantur, viz: in baptismo, non suâ, sed piorum parentum fide interveniente, quicquid autem verum est de iustificatione eorum qui in Ecclesia nascuntur, illud verum est de iustificatione ordinariâ, seu de ordinario modo iustificandi.

13. Tertiò, hæc imputatio alienæ fidei doctiss. viris displicet, imò ipse *Beza* Respons: ad quæst: 126. part: 2. eam quodammodo damnat. Verba eius hæc sunt: *Nequaquam tamen dixerim quempiam alienâ fide servari: ne quis hoc perinde accipiat, ac si dicerem parentum fidem Infantibus imputari, quasi alienâ fide credentibus, quod quidem non minùs falsum & absurdum fuerit, quàm si dixerim quempiam posse alienâ animâ vivere, aut alterius sapientiâ sapere.*

A R T. XI.

An in Dæmonibus sit fides?

1. **B**ONaventura in 3. Sent. Dist. 23. quæst. 3. suam sententiam proponit de fide Dæmonum, his verbis: *habent (inquit) aliquam notitiâ de articulis, & credibilibus, quæ quidem dici potest fides, sive credulitas, propter hoc, quòd non est in iis visio aperta: & illa quidem cognitio,*
O 3 pariunt

partim fuit iis indita in creatione, partim verò ex acquisitione. A prima enim creatione suâ habuerunt cognitionem aliquam de articulis pertinentibus ad Trinitatem, quæ etsi non meretur dici fides, imò potius cognitio contemplationis, propter obscuritatem *Ænigmatis*; peccato tamen superveniente, & *Ænigmatē* subsequente, illa cognitio meruit dici fides, cū sit cognitio *Ænigmatica* de his quæ spectant ad divina, Quantum autem ad articulos spectantes ad humanitatem, est in iis cognitio acquisita per multa miracula & experimenta, & quasi extorta necessitate quâdam. Dum enim vident *Dæmones* apertè, eos qui in *CHRISTUM* credunt, non posse damnari; manifestâ ratione coguntur credere, fidem credentium in *CHRISTUM* veram esse; & per hoc, ex consequente credunt omnia esse vera, quæ credunt Christiani, & ex hoc etiam perterrentur: propter quod dicit *Iacobus*, *quòd credunt, & contremiscunt.* Hæc *Bonaventura*.

2. Ex his verbis patet, *Bonaventuram* non tribuere *Dæmonibus* fidem historicam propriè dictam, hoc est, assensum historicum nitentem *DEI* auctoritate; sed potius assensum historicum experimentalem, h. e. nitentem experimentis & miraculis: notitia autem experimentalis, non tam ad fidem, quàm ad scientiam pertinet: eandem sententiam profitetur *Estius*,
Lib.

Lib: 3. Sent. Dist. 23. verba eius hæc sunt.

3. *Est (inquit) ad veram seu Christianam fidem necessaria quædam voluntatis propensio, quâ intellectus ducatur ad assentiendum eius verbis, in cuius autoritate animus credentis acquiescit. Habet enim hoc proprium, actus fidei, ut ex quadam humilireverentiâ erga Deum, intellectus cedat ejus autoritati, suscipiatque firmiter atque obedienter ea quæ dicuntur, etiamsi ratione minùs ea perspiciat. Si quis ergo, vel solâ naturalis ingenij sagacitate, vel argumentorum aut rationum pondere, vel sensûs aut etiam signorum tantùm evidentiâ convictus, assentiatur iis quæ sunt divinitùs revelata, non pertinebit ille assensus ad fidem Christianam. Cùm igitur Dæmones subtilitate suæ naturæ, & perspicacitate ingenij, videant dogmata religionis nostræ non repugnare veritati sibi naturaliter cognita, videantque eadem confirmari miraculis, naturæ facultatem, ipsis probè perspectam, excedentibus, experiantur denique virtute Christianæ doctrinæ plurimos è suo regno & potestate eripi, atque his similibusque adducti & convicti, cogantur fateri verissimam esse religionis Christianæ doctrinam: cùm nulla sit in ijs alioqui erga veritatem divinam spontanea voluntatis submissio atque obediëntia; non potest illorum de rebus divinis assensus, propriè fides appellari, sed certa quædam cognitio, per experientiam, & rerum vel signorum evi-*

dentiam extorta.

4. Doctissimus Pareus contrariam sententiam amplectitur: nam *parte 2. explic. Catech. quest. 21.* historicam fidem propriè dictam Dæmonibus tribuit, eamque sic describit: *Historica fides, est agnoscere & statuere quòd verum sit: omne D E I verbum, &c. Idque propter ipsius D E I auctoritatem, & asseverationem, de quâ nobis constat.*

5. Merito igitur hîc quæri potest de assensu Dæmonum: *utrum nitatur D E I auctoritate: an verò tantum sit notitia experimentalis, per signorum evidentiam extorta.* Hujus quæstionis determinationem tribus assertionibus proponam.

6. Prima assertio sit hæc: *Dæmonum notitia, est vera & propriè dicta fides historica:* hoc est, nititur etiam D E I auctoritate, & non tantum experimentis, aut miraculis: ratio hujus assertionis est, quia illi persuasissimum habent. D E V M non posse mentiri, aut falsum dicere, ideoque necessario assentiuntur toti verbo divino, propter ipsius D E I auctoritatem.

7. Secunda assertio: *Fides historica electorum, hoc est, notitia sacra Scripturæ, quam electi habent, quatuor modis differt à fide Historica Dæmonum:* primò, quòd fides historica electorum, habeat adjunctam fiduciam & applicationem

tem gratuita remissionis peccatorum, fides verò Dæmonum adjunctam habeat contrariam persuasionem; hoc est, applicationem iustitiæ indicativæ. Secundò, quòd illorum fides, ut postea patebit, oriatur ex piâ inclinatione & reverentiâ voluntatis, ducentis intellectum aptivum in obsequium seu obedientiam CHRISTI; horum verò fides coniunctam habeat voluntatis rebellionem, quâ cuperent falsum esse id quod verum fateri coguntur. Tertiò, quòd electi veritatem, cui assentiuntur, amant; Dæmones verò eam odio prosequantur. Quartò, quòd illorum assensus adiunctum habeat gaudium, & delectationem: hi verò non ne dolore & horrore assentiantur.

8. Tertia assertio: *DEUS Opt: Max: hanc fidem historicam, Dæmonum intellectui in primâ creatione indidit, eamq; post Dæmonum apsum non sustulit aut abolevit, sed conservavit, non quidem ut hoc pacto eos ornaret & bearet; sed contra ut miseriam ipsorum augeret: iustitiæ enim, potentiæ, & iustitiæ divinæ consideratio, damnatis illis spiritibus ineffabilem horrorem & pavorem incutit.*

9. Quarta assert. *Fides Dæmonum, ante ipsorum lapsum, fuit splendida & insignis virtus, nunc verò mali & vitiosi habitûs rationem habet; non per se, sed per accidens (ut benè notat Pareus) quia videlicet coniunctam habet rebellionem*

rebellionem voluntatis, & immane odium, quo veritatem cognitam prosequuntur.

A R T. XII.

An fides fuerit in anima CHRISTI? & an sit in Sanctis, qui jam in cælum translati, habent DEÛ cognitionem facialem, ut loquuntur Scholastici.

AD primam quæstionem, in titulo propositam, sic respondetur: Quamvis in CHRISTO, durante statu humiliationis, fuerat eximia Charitas, qua & DEUM diligebat propter se, & humanum genus propter DEUM, habitus tamen fidei, & spei, in eo nunquam fuerunt; quia fidei obiectum est DEUS *quatenus obscure & in enigmate cognoscitur*: spei verò obiectum est etiam DEUS, *quatenus nondum habetur, sed expectatur*: CHRISTUS autem à primo instanti suæ conceptionis, fuit non solum viator, sed etiam comprehensor, & clarè vidit DEUM, resque divinas, quæ sunt obiectum fidei & spei.

2. Ob. prim. Omnes virtutes fuerunt in anima CHRISTI: at fides est virtus: item in CHRISTO fuit plenitudo omnis gratiæ. Respond. illud intelligendum esse de illis virtutibus

bus & donis, quæ eius statui non repugnant, fides autem & spes imperfectionem quandam important, contrariam isti perfectioni quam CHRISTUS ab initio habuit: non autem mirum videri debet, quod istas virtutes CHRISTO non tribuamus, nam virtus poenitentiae, propter adiunctum malum CHRISTO non potest tribui. Ob. 2. Si CHRISTVS caruit fide, eius actiones fuerunt peccata, quicquid enim non fit ex fide est peccatum, *Rom. 14. vers. ult.* Respond. fidem ibi accipi pro firma persuasione & notitiâ, quâ certò scimus, ea quæ agimus esse honesta & bona, h. e. voluntati divinæ conformia, & consentanea: fides autem sic accepta, CHRISTO tribui & debet, & potest: nam perfectam obedientiam legi divinæ præstitit.

3. Obiici etiam solent Scripturæ testimonia, quæ spem & fiduciam CHRISTO attribuant, ut *Mat. 27.* de CHRISTO dicitur, *speravit aut confidit in DOMINO; eripiat eum:* vel, ut habetur *Psal. 22. devolvit se ad IEHOVAM: libere eum.* Item 2. *Heb. ero confidens in eum.* Resp. 1. ex *Augustino*, multa dici in *Psalms* de persona CHRISTI, non respectu sui, sed respectu membrorum eius, cum quibus unum corpus constituit. 2. non est negandum, fuisse spem in CHRISTO, respectu eorum quæ nondum adeptus erat, ut resurrectionis,

resurrectionis, glorificationis sui Nominis, & similium. Sed ea spes, quia DEVM ipsum ut principale obiectum non spectabat, sed alia quædam bona, vera quidem spes erat, non tamen fuit actus principalis virtutis huius Theologicæ, de qua hic differitur: fides autem ei nullo modo inesse potuit, quia plena rerum cognitio, qua omnia in VERBO clarè videbat, fidem omnino tollit.

4. Ad poster. quæst. in titulo propositam, unanimi consensu Respondent *Sententiarii*, fidem in beatis non posse inveniri, quia viz: DEVM in ænigmate non cognoscunt, sed facie ad faciem: at longè probabiliùs *Amandus Polanus*, *Synt: Theol: Lib. 9. Cap: 6. Quæst. 4. de subiecto fidei*, dicit fidem aliter se habere in iis, quæ ad essentiam beatitudinis cœlestis pertinent, aliter in adiunctis ipsius. *Essentiam* (inquit) *beatitudinis, hinc fide credimus, in calo visione evacuatur fides: adiuncta verò quadam eius, & hinc & illic creduntur nempe quia visioni beata minimè adversantur* Et infrà dicit, ea quæ à beatis creduntur, partim esse præterita, ut sunt omnia quæ CHRISTVS fecit nostrâ causâ; partim futura, ut sunt secundus CHRISTI adventus, resurrectio carnis, iudicium extremum, & Ecclesiæ perfectio.

5. Quia autem obiicere potuit aliquis, fi
der

dem per visionem evacuari, seu fidem non posse illic esse, ubi est visio. Respondet *Polanus*, ubi est fides, ibi non esse visionem eius rei cuius est fides, hoc est, fidem & visionem beatorum non versari circa idem obiectum: eorum enim fides versatur circa præterita, & futura DE I opera; at visio versatur circa DE VM ipsum, & CHRISTVM incarnatum: unde patet fidem in *Patriâ* non evacuari quoad secundarium ejus obiectum, licet evacuetur quoad principale & primarium ejus obiectum, hoc est, DE VM.

6. Dicit aliquis *Polanum* gratiâ hoc asserere, & nullam suæ assertionis rationem adferre: Respond. hanc sententiam posse validissimâ ratione confirmari: vel enim dicendum est, notitiam, quam habent beati de præteritis & futuris, niti autoritate DE I, in Scriptura testantis ea aliquando fuisse aut fore; vel est dicendum, eos ista contemplari & intueri in VERBO, hoc est, secundâ personâ Trinitatis, tanquam in speculo: posterius admitti non potest, est enim *Pontificiorum* figmentum, in Ecclesiam inductum ad stabiliendam mortuorum invocationem. Ergo dicendum est prius, videlicet eorum notitiam de præteritis & futuris, niti DE I autoritate, & proinde veram & propriè dictam fidem esse.

ART. XIII.

An rectè negent Remonstrantes, Adamum ante lapsum habuisse potentiam credendi in CHRISTUM.

1. **T**heologi Orthodoxi, *Arminianis* querentibus, quo jure obedientia fidei à peccatoribus exigatur, quibus *DEVS* non vult dare vires credendi in *CHRISTVM*: Respondere solent, *DEUM* in prima creatione *Adamo* dedisse fidei habitum, quo posset assentiri omni *DEI* verbo, & proinde Evangelio, si illud fuisset ei prænunciatum: hunc autem habitum, dicunt in *Adamo* esse à nobis amissum; ideóque cum justitia non requirat, ut *DEVS* nobis continuo reddat, quæ culpâ nostrâ amittimus, ad æquitatem divinam in obsequio fidei exigendo demonstrandam, sufficere quòd non postulet nisi quod nobis aliquando dederit.

2. Hanc sententiam Orthodoxorum damnant & rejiciunt *Armin.* in *Apol. adversus art. resþ ad art. 19. Johannes Arnoldus*, in defensione sententia *D. Jacobi Arminii*, adversus ejusdem considerationem à *Daniele Tileno* editam, *Cap. 14.* Item Theologi Remonstrantes citati & vocati ad Venerandam *Synodum Dordrechtanam*,

canam, in defensione sententiæ suæ, circa quartum articulum *de gratia operatione*: verùm hi authores monent, non hic disputari simpliciter, an *Adamus* in *DEVM* potuerit credere; sed an potuerit in *CHRISTVM* credere: illud enim libenter concedunt, hoc pertinaciter negant.

3. Hanc quæstionem, non immeritò pernaghi esse momenti, & proinde diligentèr considerandam judicat insigne illud lumen & ornamentum Ecclesiæ Gallicæ, *Petrus Molinæus* in *Anat. Armin. cap. 11*. Vt igitur rectò ordine in eâ explicandâ progrediamur, primò proponam & explicabo nostram sententiam de fide *Adami*. Secundò, eam rationibus confirmabo. Tertio, respondebo ad argumenta *Reponstrantium*.

4. Sententiam Orthodoxorum, de fide priorum parentum ante lapsum, assertionibus aliquot proponam, & explicabo. Prima assertio: *Adamus ante lapsum non solum habuit Ethicas virtutes, sed etiam Theologicas, hoc est, fidem, spem, & charitatem*; his enim carere non potuit, usque manifestâ fælicitatis jactura, ut rectè monet Magnus ille *Tilenus*, *Synt. part. Diss. 33*. Secunda assertio: *Adamus per illum habitum fidei, actu intelligebat ea sola, quæ ei erant patefacta, at per eundem intelligere potuit ea omnia quæ nos intelligimus, modo*

dò illi patefacta fuissent, Tertia assertio: potentia credendi in *CHRISTVM*, quam Adam ante lapsum tribuimus, non fuit naturalis, sed habitualis, hoc est, non fuit ipsa naturalis facultas intelligendi, ut autumat *Arminius*, sed fuit habitus supernaturalis à DEO infusus. Quarta assertio: Illa potentia credendi in *CHRISTVM*, non potuit exire in actum, durante eo statu: quia videlicet ejus actus repugnat isti statui. Quinta assertio: Non tamen ideo cum *Arminio* dicendum est, potentiam illam fuisse improprie dictam, & generalissimâ notione sumptam, nam nemo dixerit potentiam videndi Solem, quam is habet qui est in tenebroso carcere, esse improprie dictam potentiam, quia in actum educi non potest durante eo statu; est enim vera & proprie dicta naturalis facultas. Item nemo negaverit, Adamum ante lapsum habuisse proprie dictam facultatem, & potentiam legendi & intelligendi historiam *Mosaicam*, quamvis ea potentia durante eo statu in actum educi non potuit.

5. Hæc sententia sic explicata, facile probari & confirmari potest: primò enim sic argumentatur *Tilenus*, in *Consideratione Declarationis Arminianæ*: Adamus ante lapsum nec mentis cæcitate, nec cordis obduratione laboravit, quæ internæ causæ sunt impotentiae credendi; sed mentem habuit lucidam, & affectus composi-

tos: Ergo si Evangelium tum ei fuisset prænunciatum, potuit mente illius veritatem videre, & corde ejus bonitatem amplecti. Secundo, *Adamus* habuit potentiam credendi omni DEI verbo, seu tunc revelato, seu post revelando; item omni promissioni DEI, seu datæ, seu dandæ, in quo genere certa doctrina Evangelii etiã continetur, Resp. *Ioh. Arn: Corv. Adamum* non habuisse potentiam credendi omni DEI verbo, seu tunc revelato, seu post revelando, sed tantum habuisse potentiam credendi verbo legis revelato, & datæ promissioni legali; & addit *Tilenum* nullâ ratione posse probare contrarium: sed (siquid iudico) validum & nervosum est *Tileni* argumentum, nec difficile est probare illud quod ab eo asseritur, videlicet *Adamum* habuisse potentiam credendi omni DEI verbo, sive revelato, sive revelando: idque quia *Adamus* ante lapsum potuit ea omnia præstare, quæ lex, in eius corde scripta, exigebat: at ea exigebat promptitudinem ad credendum omni DEI verbo, sive revelato, sive revelando: Ergo potuit etiam credere illi verbo, quod nondum revelatum erat.

6. Ad hanc instantiam duobus modis respondere possunt *Remonstrantes*: primò enim dicent *Adamum* habuisse potentiam credendi omni DEI verbo, etiam revelando, modo ejus excellentia & mysterium non excedat

munus illud lumen quo *Adamus* ornatus fuit: Evangelicæ autem promissiones excedere videntur lumen illud fidei, primorum parentum. Sed suprâ sublatum est hoc effugium: dictum enim est *Adamum* neque mentis cæcitate, neque cordis obduratione laborasse, quæ causæ sunt impotentiae credendi. Præterea sicut is, qui novit omnem triangulum habere tres angulos æquales duobus rectis, inducto quolibet particulari triangulo, virtute illius generalis cognitionis statim iudicat illum habere tres angulos æquales duobus rectis: sic etiam *Adamus*, qui persuasissimum habebat, omne *DEI* verbum esse fide dignum, & proinde credendum, virtute huius generalis persuasionis facile potuit assentiri cuilibet verbo *DEI*, sive legali sive Evangelico.

7. - Secundò respondere possunt, per reversionem nostri argumenti, ad hunc modum: *Adamus* non tenebatur credere Evangelio: Ergo non habuit vires hoc præstandi: hæc argumentatio valdè infirma est. Primò enim consequentia facillimè negatur, & negationis nostræ ratio manifesta adferri potest. Nam *Adamus* non tenebatur tum legere, intelligere, & credere historiam *Mosaicam*, attamen vires habuit hæc præstandi. Secundò, antecedens illius Enthymematis, aliquo sensu falsum est, & proinde vitiosum: nam lex menti *Adami* indita, quamvis

quāvis non actu & expresse, tamē virtute & implicitē præcipiebat fidei obedientiā in CHRISTVM, quia videlicet iubebat *Adamum* credere omni DEI verbo. Hac distinctione utitur clariss: *Molineus*, *Anat. Arm. Cap. 11.* sed ad difficultatem exhaustiendam, ei alia addenda videtur, nam eorum quæ implicitē præcipiuntur iure naturæ, seu lege morali, alia absolute præcipiuntur, alia hypotheticè; exempli gratiā, primum præceptum Decalogi expresse prohibet cultum Idolorum, & cultum veri DEI præcipit implicitē, sed absolute: quintum præceptum expresse præcipit officia inferiorum erga superiores, implicitē verò etiam præcipit officia horum erga illos; hoc est, latenter jubet nos liberos alere, instituere, tueri, iisque in futurum prospicere, sed hypotheticè seu ex hypothesi; hoc est, modò liberos habeamus. Sic *Adamus* virtute primi præcepti exigentis obsequium fidei, tenebatur credere Evangelio, sed ex hypothesi, hoc est, si Evangelium ipsi annunciatum fuisset. Hinc patet, quomodo distinguendum sit antecedens argumenti istius: vide *Molin:* loco prædicto.

8. Tertia ratio, seu probatio nostræ sententiæ fit hæc: Qui negant *Adamum* habuisse potentiam credendi in CHRISTVM, vel hoc negant, quòd tum non darentur promissiones Evangelicæ, vel quòd absolute non potuerint

rint dari durante eo statu: sed neutra ratio sufficit. Nam *Adamus* ante lapsum habuit potentiam (ut jam dictum est) legendi, & intelligendi historiam *Mosaicam*, quamvis ea historia durante illo statu nec fuit, nec esse potuit in rerum natura; habuit etiam tum potentiam, tum habitum miserendi & succurrendi egenis, ut fatetur ipse *Arnoldus*, quamvis tum neque fuit, neque esse potuit, durante illo statu, miseria aut egestas.

9. Pro suâ sententiâ sic argumentatur *Arnoldus*: Quòd in primo statu non fuit necessarium, quod fuit inutile, quod cum veritate præstari non potuit, quod primo fœderi repugnat, & ad secundum fœdus pertinet, ad illud *Adamus* non accepit potentiam in primo statu: sed obedientia fidei in CHRISTVM est talis: Ergo, &c. Resp. negando majorem, nam succurrere egenis, item legere, intelligere, & credere historiam *Mosaicam*, in primo statu neque fuerunt utilia, neque necessaria, neque tum præstare poterant, imo repugnabant isti statui: attamen fatente ipso *Arnoldo*, homo ad hæc præstanda vires habuit. Instabit *Arnold.* ergo hæc potentia fuit frustranea. Resp. negando sequelam: potentia enim illa credendi in CHRISTVM reverâ fuit habitus credendi, & assentiendi omni verbo DEI: hic autem habitus, etsi durante illo statu in illum particularem actum exire

non potuit, in alios tamen actus isti statui convenientes educi poterat.

10. Ob. 2. Quod non præcipitur lege, sed Evangelio, ad illud præstandum non sunt datae homini vires in primo statu, at fides in CHRISTVM non præscribitur lege, sed Evangelio. Resp: fidem in CHRISTVM aliter præcipi lege, aliter Evangelio: lege enim præcipitur, sed *implicite & hypotheticè*; Evangelio verò præcipitur *expresse & absolute*: item lege præcipitur tanquam *opus bonum*, Evangelio verò præcipitur tanquam *instrumentum applicativum* meriti CHRISTI. Ob. 3. Qui non accepit vires, quibus si laberetur possit resurgere, ille non accepit vires Evangelio credendi si illud annunciaretur, sed *Adamus* non accepit tales vires: ergo. Respondet *Molineus*, *Adamum* accepisse vires quibus à peccato resurgere potuit, si eas non perdidisset ipso ejus lapsu. Certum autem est, *Adamum* suo lapsu amisisse omnes habitus virtutum, quibus ante ornatus fuit. Et proinde etiam amisisse vires resurgendi.

ART. XIV.

An objectum fidei possit esse falsum.

1. **N**on desunt, qui asserant objectum fidei posse esse falsum, & sæpenumero ea laudabiliter credi, ac pro veris haberi, quæ revera falsa sunt: exempli gratiâ, dicunt nobis statuendum esse, *DEUM velle à nobis id fieri quod nobis præcipit, itemque velle à nobis omitti quod nos facere vetat. Et tamen* (inquiunt) *ille interim sæpè diversum vult: hæc sententia nimis absurda est, & doctorum virorum patrociniò indigna: primò enim lex divina nusquam jubet nos errare: Ergo nusquam jubet nos fidem adhibere falsis, & proinde non tenemur credere falsa. Ratio consequentiæ est, quia credere falsa, seu falsa pro veris habere, est errare. Probatur antecedens: Lex divina nihil præcipit aut mandat, quod est contrarium naturæ divinæ: at error seu falsus assensus repugnat, & contrariatur naturæ DEI, qui ipsa veritas est.*

2. Secundò, ea sola credenda sunt, quæ DEUS in verbo suo testatur esse vera: at DEUS in verbo suo non testatur falsa esse vera: Ergo falsa non sunt credenda: ratio propositionis est, quia fides est assensus nitens DEI testimonio.

Assumptio

Assumptio satis manifesta est, & à nullo negari potest.

3. Tertiò, si per veram & voluntati Divinæ conformem fidem falsis assentimur; *fides divina* aliquando est *error*: at absurdum est posterius: Ergo & prius. Probatur propositio, quia assentiri falsis, eaque pro veris amplecti, est errare. Assumptio manifesta est, quia *fides Divina* & *error* sunt habitus non solum essentialiter distincti, sed repugnantes & contrarii, & proinde horum alter alteri attribui non potest: vide *Tilenum parte primâ Syntag: disp. 38.*

4. Ob. Statuendum est nobis & credendum, Deum velle id à nobis fieri, quod nobis præcipit; & tamen ille interim sæpè diversum vult: Ergo quædam falsa sunt credenda. Probatur antecedens: Præceptum D E I est signum voluntatis divinæ, ideo enim appellatur *voluntas signi*, & *voluntas revelata*: quare cùm omne signum conforme sit signato, nobis statuendum est D E U M reverâ ea velle, quæ nobis præcipit; attamen ille reverâ non vult ea fieri: si enim vellet ea fieri, necessariò evenirent. Ut hæc difficultas tollatur, tenendum est, *Præceptum D E I* appellari *signum voluntatis*, non quòd significet *absolutam voluntatem procurandi aut efficiendi*, ut res præcepta fiat; sed quòd indicet (ut loquitur Suarez. Lib. 3. de D E O, Cap. 8.) *voluntatem præcipiendi, & obligandi homi-*

nes ad ea facienda, simul cum affectu simplicis approbationis: duo igitur indicat seu significat omne præceptum DEI: primò, voluntatem obligandi homines ad ea facienda, qua præcipit; secundò, voluntatem approbantem seu approbativam, quâ approbat & amat bonos illos actus, quos à nobis exigit: voluntas autem decretiva, seu absoluta & efficax, nequaquam indicatur seu manifestatur per mandata legis divinæ; & proinde non tenemur credere DEUM velle ea, à nobis fieri voluntate efficaci, quæ nobis in verbo præcipit.

5. Secundò tenendum est, ea omnia qua DEUS vult voluntate decretivâ seu efficaci, necessario evenire; ea verò qua vult voluntate simplicis approbationis, sæpius non evenire: vult enim omnes homines obedire legi suæ, voluntate simplicis approbationis, attamen hoc non evenit ut experientia docet. His positis; ad argumentum propositum respondetur, distinguendo utramque partem antecedentis: Prima ejus pars sic distingui potest: statuendum est nobis DEUM velle ea omnia à nobis fieri, qua præcipit, velle (inquam) voluntate approbativâ; non verò decretivâ & efficaci: pars etiam secundâ eodem modo distinguenda est: DEUS enim ea qua præcipit, non semper vult fieri voluntate decretivâ; semper tamen vult ea fieri voluntate approbativâ. Quare cum nobis tantum statuendum

um sit, D E U M velle ea quæ præcipit voluntate simplicis approbationis, quod procul dubio semper verum est, manifestum est nunquam incumbere nobis necessitatem credendi illa, seu falsa pro veris amplectandi.

ART. XV.

Quomodo solvendum sit illud argumentum Remonstrantium:

Quod unusquisque tenetur credere, illud est verum, &c.

REMONSTRANTES in Colloquio *Hagiensi*, & in defensione sententiæ suæ, exhibitâ Ord. Gener. D. Delegatis, ad Synodum *Dordrechtanam*, hoc argumento demonstrare conantur vniuersalitatem mortis & meriti *CHRISTI*,

Quod omnes & singuli tenentur credere, illud est verum.

At omnes, etiam reprobi, tenentur credere, CHRISTVM pro iis esse mortuum: Ergo verum est CHRISTVM pro illis esse mortuum. Ad hoc argumentum tribus modis respondere solent Theologi Contra Remonstrantes: primo, *negando maiorem*; secundo, *distinguendo minorem*; tertio, *simpliciter negando minorem.*

Primus

Primus modus respondendi non satis tutus videtur: quia si negetur maior, sequetur *DEVM* illud sanctissimum & veracissimum ea reprobis credenda præcipere, quæ falsa sunt: quod superiori articulo confutatum est.

2. Secundum modum respondendi sequuntur *Belgici Ecclesiastæ*, in *Coll. Hagienfi*; item *Molin.* in *Anat. Armin. Cap. 29*: hi enim dicunt, fidem in *CHRISTVM* præscribi omnibus hominibus, non *absolutè*, sed *sub conditione pœnitentiæ, & conversionis*; hoc est si convertantur, & sic *CHRISTI* beneficium fidei animo amplectantur: ut videre est in summa Evangelicorum Præceptorum, *Marc. 1. v. 15. convertimini, & credite Evangelio*. Ex hac igitur sententia, reprobi *absolutè* loquendo non tenentur credere, *CHRISTVM* pro iis esse mortuum; sed (ut dictum est) præsuppositâ conditione conversionis: quamdiu enim in malitia suâ pergunt, *DEVS* vult ut credant iram *DEI* super illos manere, *Iohan. tertio, ver. trigésimo sexto*.

3. Hujus responsionis veritas duabus rationibus efficaciter probatur: primò ea sola credenda sunt, quæ *DEVS* in suo verbo testatur esse vera, at *DEVS* in S. Scriptura nusquam testatur *CHRISTVM* esse mortuum pro peccatoribus, siue convertantur, siue non convertantur. Ergo illud non est credendum. Secundò, si peccatore

atores in malitiâ suâ pergentes, tenentur credere *CHRISTVM* pro iis esse mortuum, tenentur etiam credere se esse electos, & eternæ beatitudinis participes futuros: at falsum est posterius, ergo & prius. Ratio propositionis est, quia *CHRISTVS* mortuus est pro iis electis, ut patet ex iis *S. Scripturæ* locis, quæ testantur *CHRISTVM* mortuum esse pro ovibus suis, pro Ecclesia sua, pro iis quos *Pater ipsi dedit*, pro filiis *DEI*, pro populo suo, &c. Probatur etiam assumptio, quia peccatores in malitiâ suâ pergentes tenentur credere *iram DEI super eos manere*, & proinde non tenentur credere se esse electos ad vitam æternam.

4. Tertium modum respondendi sequitur venerabilis ille senex *Iohannes Piscator*, *S. Litterarum Professor* in illustri Scholâ *Herbornensi*: is enim in Responsione Apologetica ad *Paraceuen Conradî Vorstii*, cap. 7. absolutè negat, ne probos teneri in *CHRISTVM* credere, i. e. credere *CHRISTVM* pro iis esse mortuum, tantum enim (inquit) tenentur credere *Euangelio*, seu doctrinæ *Euangelii*, quæ citra controversiam verissima est. Hæc responsio, quamvis postea displicuit ipsi *Piscatori*, in Responsione ad amicam Duplicationem *Conradî Vorstii*, reverâ tamen magnam probabilitatē habet, ut patet ex hac ratione, Quod neque absolutè, neque sub conditione verum est, illud neque absolutè

absolutè, neque sub conditione credendum est: At CHRISTVM missum esse in mundum, ut pro IUDÆA proditorè mortem oppeteret, neque absolutè, neque sub conditione verum est: Ergo IUDÆAS nullo modo tenebatur hoc credere neque potuit illud ei proponi credendum.

5. Cæterum quia præcedens sententia ple-
risque Orthodoxis Theologis magis arridet, e-
go ex istius sententiæ fundamentis solvam duo
præcipue argumenta, quæ afferri possunt in con-
trarium: prius est hoc, *Præcepta ea quæ DEUS*
vult omnibus & singulis proponi, omnes & sin-
gulos obligant & astringunt obediendi necessita-
te: At CREDE IN CHRISTVM, est
tale præceptum: Ergo, &c. Resp. præcepta
DEI duplicia sunt, videlicet *absoluta, & con-*
ditionalia. Absoluta præcepta omnes, sive electos
sive reprobos, absolutè obligant ad obedienti-
am. Conditionalia præcepta omnes etiam ob-
ligant, sive sint electi, sive reprobi, sed sub cer-
ta conditione. Tale est præceptum illud de
quo hic sermo est, illud enim obligat etiam re-
probos, sed sub conditione conversionis, seu
resipiscentiæ: h. e. si agnoscant peccata sua, &
percipiant in se dolorem de iis conceptum
quem scripturæ nunc *lacerationem cordis*, nun-
quid vocant: solis enim illis qui hæc in se
sentiunt præcipit vox Evangelii, ut credant
reconciliationē & peccatorum remissionem et

est sibi impetratam per mortem CHRISTI.

6. Instabit aliquis Primò, *illud præceptum crede in Christum*) frustra proponitur reprobis, in quibus ne quidem potest inveniri conditio illa requisita, viz conversio. Resp. hoc præceptum non ob eundem finem proponitur fidelibus, & infidelibus: nam pœnitentibus & fidelibus proponitur hæc consolatio, propter ipsorum salutem; impœnitentibus verò & infidelibus, quales sunt reprobi, monstratur via quâ ipsis est concedendum, ut recipiant fructus mortis Christi, nimirum quòd debent converti & conversione præsuppositâ in Christum credere. Instant. Secunda: *omne bonum opus absolutè et absq; conditione, omnibus præcipitur a DEO: at credere in Christum est bonus actus seu bonum opus* : Ergo. Resp. Primò ad propositionem, negando: nam (ut dictum est in articulo 13.) in ipso Decalogo multa bona opera præcipiuntur hypotheticè, seu sub conditione. Secundo Respond. distinguendo: nam persuasio de reconciliatione, & peccatorum remissione impetratam per mortem Christi, infidelibus est bonus & salutaris actus, ab habitu fidei elicitus: at in reprobis qui in malitiâ pergunt ad finem vitæ est perniciosus error & fanatica arrogantia.

7. Posterius argumentum est hoc: *Reprobi propter suam infidelitatem condemnabuntur,*
h. e.

h. e. quia in Christum non crediderunt : Ergo tenentur in Christum credere. Respondent *Contra Remonstrantes in Col. Hag.* peccatores impœnitentes non ideo peccare, quod non credant *Christum* pro impœnitentibus & infidelibus peccatoribus, qui tales sunt & manent, mortuum esse, (nam si illud crederet, mendacio crederent,) & proinde eos propter illam infidelitatis speciem non condemnari: sed potius quia noluerunt converti, & secundum doctrinam s. Evangelii in *Christum* credere.

8. Ut hæc responsio intelligatur, tenendum est illam infidelitatis speciem, de quâ hîc quæstio est, h. e. defectum illius persuasionis, quam vocant *fiduciam specialis misericordie*, duoduo modis considerari posse: vel enim consideratur *per se & seorsim*: vel quatenus *provenit ex defectu conversionis & resipiscentie*, quam diximus esse conditionem præcedaneam & prærequisitam ad fidem in CHRISTVM: priori modo considerata, non est causa meritoria condēnationis, quia videlicet illi absolute non tenentur credere CHRISTVM pro iis esse mortuum: at posteriori modo recte dici potest mereri condemnationem: quamvis enim absolute non tenentur in CHRISTVM credere, tenentur tamen ex præscripto Evangelii *converti, & præsuppositâ conversione credere*, & sibi applicare illas promissiones Evangelicas

elicas.

9. Instant. *Illa infidelitas de qua hic est questio, est peccatum: opponitur enim virtuti, id est, fidei, & proinde est vitium; si autem est peccatum, malè negatur eam per se esse causam meritariam condemnationis.* Resp. distinguendo infidelitatem, in *privativam & negativam*: infidelitas privativa est, cum ea non credimus, quæ credere tenemur: hæc enim infidelitas adjunctum habet *obligationem ad credendum*: exempli gratiâ, Hæretici alique hostes Ecclesiæ infideles sunt infidelitate privativâ, quia ea non credunt, quæ credere tenentur: hoc est, quia non redunt ea, quæ Deus in verbo suo testatur esse vera: infidelitas negativa est mera carentia dei, *sine obligatione ad credendum*: Exempli gratiâ, illi quibus nunquam annunciatum est Evangelium, sunt infideles infidelitate hac negativâ, quia non tenentur credere ea quæ nunquam audiverunt: unde Christus, Ioh. 15. 22. dicit, *Si non venissem & loquutus iis fuissem, peccatum non haberent*: quia viz. non tenerentur hæc credere quæ nunc tenentur credere.

10. ut hæc proposito applicem, assero *infidelitatem privativam esse peccatum, seu vitium, quia privativè opponitur virtuti, h. e. fidei: infidelitatem verò negativam non esse peccatum, quia contradictoriè tantum opponitur virtuti: neque enim si dixerit ea omnia quæ contradictoriè*
virtuti

virtuti opponuntur habere rationem vitii: idem etiam probatur ex dicto *Christi, si is non loquutus fuisset, non haberent peccatum*, viz infidelitas huius *privativa*, quâ non credunt Evangelio, quod per me est iis annunciatum atque adeo quod credere tenentur: unde *Augustinus* locum eum exponens, *tract. 89. in Ioan.* testatur eos ad quos Evangelii prædication non pervenit excusari a peccato infidelitatis, damnandos autem propter alia peccata quorum excusationem non habent, utpote in legem naturæ commissa.

II. Reproborum igitur infidelitas, quâ non credunt ea quæ sacra Scriptura vera esse testatur, *de potentia DEI, de iustitia eiusdem, & irâ aduersus peccatum, de sanctorum beatitudine, de aternâ miseriâ reproborum, de rerum terrenarum vilitate, &c.* Hæc (inquam) infidelitas est *privativa*, est que peccatum propriè dictum quia videlicet non credunt ea quæ credere tenentur. At infidelitas eorundem quâ non credunt Christum *pro iis esse mortuum*, est infidelitas *negativa*; hoc est, mera carentia fidei, sine obligatione ad credendum; nam (ut supra dictum est) quamdiu in malitia sua pergunt, tenentur potius credere *iram Dei super illos manere*: hæc igitur infidelitas *per se & seorsim* spectata non est peccatum: licet quatenus ea *provenit ex defectu conversionis & resipiscentie*, verè & propriè

propriè sit peccatum.

ART. XVI.

An fides sit assensus discursivus? Et an Pontificii utantur circulari discursu in stabiliendâ fide.

1. **A**SSENSUS dividi solet in *simpli-*
cem, quem *Noëticum* vocant; & *Dia-*
noëticum seu *discursivum*. Simplex assensus est;
 quo intellectus noster assentitur propositionibus
 suâ luce clavis, & manifestis: quales sunt hæ,
Omne totum est majus suâ parte: De qualibet
re verum est affirmare vel negare: harum enim
 propositionum veritas primo quasi intuitu intel-
 lectui innotescit, per terminorum apprehensi-
 onem, & non per externum aliquod medium e-
 as notificans. Assensus discursivus est, cum in-
 tellectus assentitur propositionibus, non propter
 insitam earum evidentiam, sed propter certitu-
 dinem, evidentiam, & probabilitatem medii quo
 intellectus movetur ad assentiendum.

2. Ad questionem igitur in titulo proposi-
 tam Respondetur, fidei assensum non simpli-
 cem, sed discursivum esse: quia nimirum pro-
 positiones illæ quibus per fidem assentimur,
 non sunt suâ luce claræ aut manifestæ, neq; iis
 assentimur

assentimur propter insitam earum evidentiam, sed propter authoritatem DE I, in S. Scripturâ testantis eas esse veras.

3. Discursus fidei hoc syllogismo non incommodè exprimitur,

Quicquid DEUS dicit, est verum:

At DEUS ea omnia dixit et dictavit, quæ in Scriptis Prophetis & Apostolicis extant: Ergo ea omnia sunt vera.

Hujus Syllog. propositio major evidenter probatur ex principiis naturâ notis, h. e. ex fundamentis Metaphysicis, quibus DE I veritas & veracitas demonstrantur; adeo ut nullus sit Philosophus Ethnicus, qui eam negare audeat; si quis autem tam absurdus & demens sit, ut hanc manifestam veritatem neget, flagris excipiendus est; nec Philosophi verba, sed carnificis verbera meretur.

4. Propositio minor Syllogismi prædicti naturali ratione probari non potest, & proinde ejus veritatem aliis fundamentis niti oportet. Hic Pontificii & Evangelici Theologi longè dissentiunt: illi enim fidem nostram, quâ credimus Scripta Prophetarum & Apostolorum esse DE I verbum, Ecclesiæ testimonio fulciendam & statuerendam putant: hi verò licet Ecclesiæ testimonium temerè non rejiciant, sed reverentè amplectantur, ab eo tamen solo veritatem istius propositionis minoris non suspendunt, sed e-

am deducunt partim ex internis *κατ' ἐνέργειαν* ipsius Scripturæ, (hoc est, ex genere doctrinæ, quæ sapientissima, sanctissima, & ubique sibi consentanea est: ex qualitate stili, qui simplex quidem & humilis est, sed purus, in affectatus, & divina Maiestati conveniens: ex Sermonis ipsius operatione, mirificè enim afficit mentes hominum, & Divino quodam modo efficax est ad fidem & pietatem in animis hominum ingenerandam:) partim ex testimonio S. Spiritûs, intus in piorum cordibus sancientis & obsignantis diuinam Scripturæ veritatem, & authoritatem.

5. Processus ille, quo vtuntur Pontificii in probandâ Scripturæ authoritate, circularis est, & proinde non solum inutilis, sed etiam (ut loquitur *Tilenus*) fatuus, & sophisticæ ἀσολοσχίας foetus est: etenim interrogati, cur credant Scripturam esse *DEI* verbum? Respondent, se id eò credere, quòd Ecclesia quæ extra omnem errandiam aleam posita est, id testetur: rursus interrogati, quibus argumentis de illa Ecclesiæ ἀσφαλεία persuasi sint? Respondent se hoc eò credere, quòd Scriptura testetur Ecclesiam esse domum *DEI*, sponsam *CHRISTI*, firmamentum & columnam veritatis; atque ita à Scripturâ ad Ecclesiam, & ab Ecclesia ad Scripturam revoluti, circulum nobis obtrudunt.

6. *Stapletonus*, ut hunc progressum circularem vitet, dicit se ideo credere Ecclesiam à

S. Spiritu in omnem veritatem dirigi, quia *S. Spiritus* ejus intellectum efficaciter movet ad illud credendum. Sed hoc effugium facilè præcludi potest *Stapletono*: primò, quia internum *S. Spiritus* testimonium à verbo scripto sejungendum non est, neque (ut rectè monet *Tilenus*) vertiginosis Enthusiasmis est inhiandum: nam verbum est norma & regula, ad quam examinandæ sunt nostræ mētis persuasiones, ut sciamus nos à Spiritu veritatis & sapientiæ, non à Spiritu vertiginis & mendacii agitari: Ergo necesse est, ut ad *S. Scripturam* tandem revolvatur *Stapletonus*. Secundò, quia ad assensum fidei tria requiruntur, ut egregiè docet Doctissimus *Richardus Field, lib. 4. de Ecclesià Cap. 7*: Primò, lumen Divinæ intelligentiæ, quo apprehendimus & intelligimus ea quæ sunt *DE I*. Secundò, *S. Spiritus* qui illius illuminationis author est. Tertiò, argumentorum pondera quibus *Spiritus* intellectum nostrum movet ad assentiendum. Non igitur hîc quærimus ex *Stapletono*, quis author sit illius fidei, quâ creditur Ecclesiæ infallibilitas, neque quo lumine illa infallibilitas cognoscatur, sed quibus mediis aut argumentis *spiritus* intellectui suadeat, *Ecclesiam non posse errare*, h. e. utrū illud suadeat argumentis ex scripturâ, an verò aliunde desumptis.

7. Hic est ille scopulus, quem præternavigare non potest *Stapletonus*, nisi cum *Du-*
rando

rando Lib. 3. Sent. dist. 34. quæst. 3. confugiat ad rationes (ut vocant) humanas; hoc est, ad argumenta non ex Scripturâ, sed aliundè desumpta: & certè non desunt, qui hoc Durandi delirium interpolare, & quasi ab inferis revocare conantur: dicentes, fidem quâ creditur Ecclesiæ authoritas, niti ratione humanâ, quæ dictat ex apparentibus (Durandi verba sunt) quòd doctrina confirmata per tot signa, conservata à martyribus inter tot supplicia, sit vera: & proinde quòd cœtus hominum hanc doctrinam profitentium, sit vera Ecclesia CHRISTI. Sed hæc sententia facilè convellitur: primò, quia hæc ratio quamvis probare videatur hunc vel illum cœtum esse veram Ecclesiam, non tamen probat id quod illi asserunt; videlicet, Ecclesiam extra omnem errandi & fallendi aleam esse positam. Secundò, quia ratio illa non est certa & necessaria, sed probabilis; est enim ex apparentibus, fatente ipso Durando, ideoque non potest esse fundamentum fidei divinæ, quæ est assensus certus & firmus.

8. Quidam Pontificii, ut hæc incommoda & absurda evitent, confugiunt ad imperium voluntatis, quam dicunt sine ulla ratione aut argumento intellectum movere ad credendum illud dogma de infallibilitate Ecclesiæ. Hęc sententia non immeritò displicuit Pico Mirandula, Cardinali Cameracensi, & Durando; pri-

mò, quia fides est assensus nitens alterius testimonio: illa igitur fides qua creditur Ecclesiæ infallibilitas, vel nititur testimonio aliquo, vel non est fides. Secundò, nemo assentiri potest alicui propositioni dubiæ, nisi vel ratio, vel sensus, vel testimonium alicujus fide digni, doceat eam esse veram. Tertiò, intellectus non potest assentiri propositioni alicui, nisi ea appareat intellectui vera, at nudum imperium voluntatis non potest efficere, ut propositio dubia intellectui vera appareat: Ergo non potest efficere ut assentiatur, nisi adsit ratio aliqua aut testimonium.

9. Alii pontificii confitentur Scripturæ authoritatem stabiliri per Ecclesiæ infallibilitatem, & rursus Ecclesiæ infallibilitatem per scripturæ authoritatem probari, sed asserunt hunc progressum, non circulum, sed regressum esse: quia viz. *non est ab eodem ad idem eodem modo cognitum*: primò enim cum ex Ecclesiæ infallibilitate probatur scripturæ authoritas, fit progressus ab Ecclesiæ infallibilitate, tanquam ab aliqua notiore & evidentiore nobis, ad id quod nobis est ignotius: deinde cum ex Scripturæ authoritate probatur Ecclesiæ infallibilitas, fit progressus ab eo quod notius est naturâ & prius, ad id quod ignotius est & posterius naturæ ordine.

10. Hæc sententia non minùs absurda est quàm præcedentes: quia Ecclesia ejusque infallibilitas,

libilitas, quam ei affingunt Pontificii, non solum ordine essendi, sed etiam cognoscendi, ignotiores sunt DE I verbo, ut patet ex hac ratione.

Quod ex sola Scriptura cognosci potest, illud ordine cognoscendi, non est notius, sed ignotius ipsâ Scripturâ.

At Ecclesia ejusq, infallibilitas ex sola Scriptura cognosci potest.

Ergo, &c.

Maior manifesta est: probatur a sũptio; Ecclesia nihil aliud est, quàm cœtus hominum profitentium veram & sanam doctrinam de DEO, eiusque operibus: quis autem cœtus talis sit, non cognosci potest, nisi ex Scripturâ: nam ea sola doctrina vera est, quæ S. Scripturæ est consentanea. Quod ad Ecclesiæ infallibilitatem attinet, ea nobis innotescit vel ex ratione naturali, (quod nemo admiserit,) vel ex testimonio: rursus si ex testimonio, vel ex testimonio DEI, vel ex testimonio eorum hominum qui sunt extra Ecclesiam, vel ex testimonio ipsius Ecclesiæ: non ex testimonio ipsius Ecclesiæ, quia illud nullius ponderis est apud eos qui nondum persuasi sunt de Ecclesiæ autoritate: neque ex testimonio eorum qui extra Ecclesiam sunt, quia de Ecclesia illi testimonium perhibere non possunt: Ergo necesse est, ut innotescat ex testimonio DEI in verbo, & proinde Dei verbum etiam notius est ordine cognoscendi, quàm infallibilitas

bilitas illa quam affingunt Ecclesiæ.

11. *Becanus Tom. I. opuscul. 10. Thes. 19. pag: 393.* nostri argumenti vim declinaturus, dicit non committi circulum, si unum per alterum probetur apud eum qui alterum admittit, alterum negat: verbi gratiâ, (inquit) *Calvinista admittit Scripturam, negat Ecclesiæ infallibilitatem: rectè ergo convincam illum hoc modo: Scriptura quam tu admittis, dicit Ecclesiam esse infallibilem: Ergo revera infallibilis est: similiter, si quis Idiota admittat iudicium Ecclesiæ, & tamen nesciat in particulari Libros Machabæorum esse divinos: facile persuadebo illi sine circulo, si sic dicam; Ecclesia, cujus tu auctoritatem admittis, asseverat Libros Machabæorum esse divinos: Ergo non debes hac de re amplius dubitare. Hactenus Becanus.*

12. Hoc *Becani* effugium nullum est: quæram enim ex eo, reliquisque Pontificiis, unde divina Scripturæ auctoritas probari possit apud eum qui Scripturam universam impugnat, & per consequens Ecclesiam pro cœtu hominum absurdorum & delirantium habet: hæc enim duo coherent necessariò, nec divelli possunt: cum enim Scripturæ & veræ Ecclesiæ eadem sit doctrina, fieri nequit, ut quis veram Ecclesiam agnoscat, illique credat, qui universam Scripturam negat. Si dixerint canonicam auctoritatem sacri codicis per nullum aliud medium, quam

quàm per Ecclesiæ auctoritatem probari; ex-
cipiam primò, ignotum probari per æquè igno-
tum: nam is non minùs Ecclesiæ, quàm Scriptu-
ræ auctoritatem negat. Secundò, quæram quo
pacto Ecclesiæ auctoritas illi demonstrari pos-
sit? aut enim ex Scripturis, aut aliundè demon-
tranda est; non aliundè, quia Ecclesiæ auctori-
as solis Scripturis superstructa est, ut jam pro-
batum est: si ad Scripturam recurrendum est,
circularis erit progressus; nam Scriptura per
Ecclesiam, & rursus Ecclesia per Scripturam
demonstrabitur.

ART. XVII.

An notitia sit actus ab habitu fidei elicitus.

ROBERTUS BELLARMINUS,
Lib. I. de justificatione, Cap. 7. dicit,
dem non esse notitiam, sed assensum: item,
dem magis per ignorantiam, quàm per noti-
am definiendam esse. Evangelici verò hanc
Bellarmini sententiam tanquam absurdam &
ernitiolam rejiciunt, dicentes cum *Calvino*,
lib. 3. Instit. Cap. 2. *Non ignorantia nec sen-
sus nostri submissione, sed cognitione certâ &
exploratâ regnum cælorum adiri.* Interim mo-
ent, per notitiam quam fidei tribuunt, non in-
telligi

telligi ab iis scientiam conclusionum, acquisitionem per media demonstrationum, ex principiis per se notis: talis enim notitia pugnat cum inevidentia quam fidei tribuimus. monent etiam, se non tollere gradus in cognitione rerum sacrarum, cum fidem etiam *Laicorum* notitiam appellant: majorem enim in *docente*, quam in *discente*; in *Pastore*, quam in *Ove* notitiam requiri fatentur: sed notitiam illam opponunt *crassa ignorantia*, quam *implicite fidei*, & *cace obedientie* elogiis ornant Pontificii; scilicet ut asininum potius stuporem in Laicis foveant quam Christianam fidem.

2. Certitudo, quam omnes Theologi fide tribuunt, hunc errorem *Bellarmini* facile evertit, & destruit: ad eam enim triplex notitia requiritur: prima est, notitia quâ novimus *quis loquatur*; hoc est, quâ novimus, sermonem illum cui assentimur, esse DEI ipsius, & non hominum sermonem: nemo enim assentitur alicui propositioni propter alterius testimonium, nisi certò sciat cuius sit illud testimonium, & an qui testimonium perhibet sit fide dignus. Secunda notitia est, quâ novimus *quid loquatur*; hoc est, quâ rectè intelligimus DEI sermonem, & verum verborum sensum cognoscimus: nemo enim assentitur sermoni, quem non intelligit. Tertia est notitia quâ novimus *verè esse ea quæ loquitur*. Prima & secunda notitiæ sunt

nt *prærequisita antecedenter*, ut loquuntur, ad
sensum fidei: nam assensus fidei eas præsup-
ponit: Tertia cognitio non prærequisita, sed
requisita est *concomitanter*, ut vocant, ad assensum
fidei: nam *intrinsecè & essentialiter in ipso
Assentiendi includitur*.

3. Cum igitur ad fidei assensum triplex
probitia requiratur, ut iam probatum est: quis non
ridet *Bellarminum* absurdè contendere fidem
iustificantem non esse notitiam, sed simplicem
assensum & ignorantiam? quis non mirabitur,
quomodo tam ineptum dogma potuerit viro
docto in mentem venire? Certè hic error Ec-
clesiæ perniciosissimus fuit: hinc enim crassa
ignorantia & cæcitas totum *Papatum* occupa-
vit: hinc *humanae traditiones, errores, supersti-
tiones, & mendacia*, in Ecclesiam inuenta sunt:
hinc est quod Pontificij Doctores ridendam
illam *Carbonaris* fidem, tanquam spirituales
sapientiam, summopere collaudent.

4. Non statui hic respondere ad argumen-
tum *Bellarmini* ex Scripturis deprompta, (eorum
enim consideratio ad Theologos pertinet) sed
ad rationem ipsius à natura fidei petitam, cu-
jus hæc est summa; iudicium nitens alterius te-
stimonio & autoritate, non est notitia: sed fi-
des est tale iudicium: Ergo. Hujus syllogismi
major falsissima est, ut patet ex iis quæ jam di-
ctæ sunt, quamvis enim tale iudicium non sit
notitia

notitia evidens & scientialis, non tamen ob ignorantia potius quàm notitia vocari debet.

ART. XVIII.

An fiducia sit actus fidei.

1. **T**heologi Orthodoxi non eodem modo loquuntur de *fiducia* & *πληροφορία* Satorum in terris *militantium*: nam eorum alii appellant fiduciam *formam* & *specificum* *actum fidei*, alii verò eam fidei *effectum* & *consequens* vocant: quæ quidem loquendi diversitas oritur ex diverso modo accipiendi hoc vocabulum, ut cuius patebit, qui eorum verba diligentius consideraverit. Vt igitur clara & perspicua sit hæc disputatio, quatuor huius vocis significata enumerabo, & ostendam fiduciam primo modo acceptam, verum & propriè *actum fidei* justificantis *actum* esse.

2. Fiducia primo modo accipitur, *pro firma persuasione, seu pro certo & stabili iudicio intellectus, quo apud nos statuimus, & propter Dei testimonium in verbo suo credimus, DOMINUM nostrum IESUM CHRISTUM, precio suo sanguine nos redemisse, & DEUM Patrem propter ejus meritum omnia nostra peccata remisisse: eundem etiam propter illud CHR*

TI meritum, & sacrificium in cruce oblatum, liberaturum nos ab omnibus huius vite miseriis & calamitatibus, & tandem donaturum nos ineffabilis illius glorie aternitate. Secundò accipitur, pro interna acquiescentia in divina benevolentia & gratia, per quam toti ab illa penlemus, non aliunde auxilium & salutem expectantes. Tertiò, pro spiritali fortitudine & animositate, qua animi nervos & robur opponimus his malis & periculis, siue temporalibus, siue spiritualibus, cum quibus in hac lachrymarum valle conflictamur. Quartò, pro pace, tranquillitate, & quasi serenitate conscientie, seu securitate spirituali, qua (ut loquuntur Scholastici) quietem & servili timore importat.

3. Fiducia, primo modo accepta, respicit veritatem promissionum Evangelicarum, iisque assentitur. Fiducia, secundo modo accepta, respicit **D E I** promittentis bonitatem, illique unitur. Fiducia, tertio modo accepta, respicit pericula & miseriae huius vitae, iisque animosè se opponit. Fiducia, quarto modo accepta, respicit *Librum conscientie*, eumque cum gaudio legit.

4. Fiducia, primo modo accepta, est basis & fundamentum trium sequentium: quia enim firmâ persuasione, & certo iudicio mentis Evangelicas promissiones nobis ipsis applicamus, deo in **D E I** benevolentia & misericordia acquiescimus;

acquiescimus; ideo contra mundum, Satanam, & carnem nostram fortiter præliamur; ideo denique conscientiam tranquillam & serenam habemus.

5. His positis, ad primam quæstionem in titulo propositam Respondetur duabus assertionibus. Prima est hæc: *fiducia secundo, tertio, & quarto modo accepta, non est fidei actus; sed est effectum & consequens fidei.* Secunda assert: *fiducia primo modo accepta, est verus & proprius dictus salvifica fidei actus, imò est præcipuus & specificus eius actus:* nam fidem salvificam distinguunt à reliquis fidei generibus: prior assertio manifesta est, & probatione non eget: posterior hac ratione probatur:—

Persuasio firma, certa, & DEI testimonio niterens, de remissione peccatorum meorum & adeptione vite æternæ, est verus fidei actus.

At fiducia primo modo accepta, est talis persuasio;

Ergo est verus fidei actus.

Minor hujus Syllog. manifesta est: major etiam facile confirmatur; quia omnis persuasio niterens alterius testimonio, est fides: ut patet ex iis quæ dicta sunt in art. 2. hujus Exercitationis.

5. Respondebunt Pontificii, non dari firmam persuasionem de remissione peccatorum in fidelium mentibus: & proinde subjectam
istius

stius propositionis majoris esse merum figmentum, & non Ens: ratio ipsorum est, quia in verbo DE I nunquam reperitur salus annunciata mihi aut illi in particulari. Sed hæc Responsio trivialis & manifestè falsa est: primò enim ipse *Bellarminus Lib. 1. de iustificatione, Cap. 10.* attestat salutem in particulari annunciatam fuisse paucis quibusdam, ut *Paralytico*, cui dictum est *Mat. 9. confide fili, remittuntur tibi peccata tua: & Peccatrici*, de qua dictum est *Luc. 7. remittuntur ei peccata multa, quia dilexit multum: item Adultera, Joh. 8. Zachæo, Luc. 19. & Latroni, Luc. 23.* Horum igitur persuasio de remissione peccatorum fuit verus & propriè dictus fidei actus, quia viz: nitebatur DE I ipsius testimonio: at horum persuasio fuit fiducia primo modo accepta: Ergo fiducia primo modo accepta, est fidei actus.

7. Secundò: quamvis in verbo DE I non reperiat expresse salus annunciata mihi, & tibi, in particulari: ex verbo tamen evidenter deducitur DEVM mihi, tibi, singulisque credentibus remittere velle peccata, & dare vitam æternam. Syllogismus hujus deductionis sic formari potest:

Omnis qui credit in Filium, habet remissionem peccatorum, & vitam æternam: Joh.

3. Act. 13. & Rom. 3.

At ego credo in Filium:

Ergo

Ergo ego habeo remissionem peccatorum, & vitam aeternam.

Excipit Bellarminus maiorem istius Syllog: esse certissimam, quia in S. Scriptura reperitur: minorem verò non esse in verbo D E I, sed in opinione nostrâ, qua fallax est & coniecturalis. Respond. persuasionem nostram de veritate minoris, niti illis S. Scripturæ locis, in quibus vera fides à fide mortuâ distinguitur, & veræ fidei infallibilia signa & indicia proponuntur, & proinde non esse coniecturalem opinionem; sed firmam & certam notitiam, D E I ipsius testimonio in verbo suo statuminatam.

8. Instabit aliquis: *Fideles ex verbo D E I scire possunt, quæ sint signa & præsignata vera fidei: an verò ipsi ea signa habeant, non possunt scire certâ cognitione, sed tantum coniecturali.*

Resp. illud falsissimum esse: primò, quia inde sequeretur illa veræ fidei signa frustra proponi in sacra Scriptura: indicium enim rei frustrâ proponitur, si res ipsa per illud indicium innotescere non possit: hoc est, si indicium æquè obscurum sit, & dubium ac ipsa res per illud indicium notificanda. Secundò, quia hoc dogma insignem stuporem & ἀνασθησίαν fidelibus affingit: si quis enim oculis corporeis videret, & non certo sciret se videre; si quis item rerum Physicarum notitiam haberet, & non certo sciret, sed tantum coniceret se earum notitiam habere, i-

fatuum

fatuus & stupidus haberetur: pari ratione, si illi qui credunt in D E V M, non percipiunt & certò sciunt se credere, miserabili stupore laborant.

9. Tertiò: *Spiritus D E I testatur unà cum spiritu nostro nos esse filios D E I, & per consequens nos veram fidem habere, Rom. 8. 16.* Ex quo testimonio validissimum argumentum contra prædictam instantiam Pontificiorum sic formari potest:

Quicquid spiritus D E I testatur: illud verum est, & nos de ejus veritate persuasi esse possumus.

At spiritus D E I testatur unà cum spiritu nostro, nos esse filios D E I, & proinde veræ fidei indicia habere:

Ergo, &c.

Bellarminus, hujus argumenti vim declinaturus, dicit testimonium internum Spiritus D E I non gignere certitudinem nisi conjecturalem. Hæc responsio refutatione est indigna: est enī impia, & in D E V M contumeliosa, nam spiritum D E I fallacitatis & ambiguitatis arguit.

10. Quartò: Morales Philosophi loquentes de felicitate civili, damnant sententiam Plotini, qui asseruit hominem posse esse felicem, & non percipere se esse talem: Ergo Theologi Orthodoxi loquentes de spirituali felicitate Christianorum, (quæ in virtutum Theologica-

rum exercitio posita est) meritò damnant errorem *Bellarmini*, qui in Libro tertio de justificatione toties asserit, eos qui spirituali felicitate ornatī sunt, de sua felicitate certam persuasionem habere non posse.

II. *Picolhomineus*, civilis *Philosophie Gra.* 9. cap. 44. tribus rationibus *Plotini* errorem refellit, quæ si huic proposito applicentur, *Bellarmini* sententiam evertunt, & destruunt: verba ejus sunt hæc: primò, quia felicitas in actione est posita: actio autem non latet agentem: & præsertim quia actionis præstantia in præelectione est posita: præelectio autem prælegenti est conspicua. Insuper felicitatem comitatur gaudium: at non perfunditur gaudio, nec animo requiescit, qui non animadvertit se esse felicem. Præterea, in felicitate nihil diminutum inveniri debet: at maximè diminuta esset ejus viri conditio quæ esset felix, & non perciperet se esse felicem, ita enim lapis etiam possit esse felix.

ART. XIX.

An fiducia sit actus intellectus, & quomodo differat ab assensu.

I. **B**ELLARMINVS, *Lib. I. de Just.*
Cap. 6. probare conatur, fiduciam non
 esse actum fidei, argumento sumpto ab ejus
 subjecto; quia videlicet fides ad intellectum, fi-
 ducia verò ad voluntatem pertinet. Hæc ratio
 duplici nomine infirma est: primò, quia fides,
 licet subjectivè existat in solo intellectu, ut doc-
 cet *Tilenus, Synt. part. 2. Disp. 40. Thes. 16.*
 & 17. revera tamen ad voluntatem etiam per-
 tiner. Secundò, quia fiducia, quæ *Gracè* *πείθωσις*
 & *παραπομπή* dicitur, formaliter in solo intel-
 lectu existit: ut autem hoc intelligatur, propo-
 nam aliquot fundamenta, quæ meo judicio non
 exiguam utilitatem habent ad nostram sententi-
 am stabiliendam, & adversarii sententiam con-
 futandam.

Primum fundamentum: *fideles seu renati*
non uno, sed duobus actibus, meritum C H R I-
STI, & D E I misericordiam sibi applicant:
prior actus in intellectu existit, estque certa
persuasio, seu iudicium mentis D E I testimonio
nitens, quo apud nos statuimus, Salvatorem
 R 2 nostrum

nostrum *7* **ESUM CHRISTUM** pro nostris peccatis plenissimè satisfecisse, & per consequens non solum aliis, sed nobis quoque remissionem peccatorum, æternam justitiam & vitam donatam esse, idque gratiæ, ex **DEI** misericordiâ, propter unius **CHRISTI** meritum. Posterior actus *applicativus* gratiæ, in voluntate existit, est enim ardens amor quo voluntas gratiam, & favorem **DEI** amplectitur, seriò expetens perfectiorem istius gratiæ sensum in hac vitâ, & claram **DEI** visionem in vita futura.

3. Secundum fundamentum: *Vterque actus ad fiduciam requiritur*: nemo enim dici potest confidere, seu fiduciam habere de bono obtinendo, nisi & firmam habeat persuasionem in intellectu, & desiderium vel amorem istius boni in voluntate. Hoc egregiè explicat *Tilenus*, *Syn-tag: part: 2. Disp. 38. Thes. 18.* dicens, *objectum fidei salvifica esse veritatem divinam, non solum quâ aliquid narrat, sed cum primis quâ aliquid promittit: ubi non satis est assentiri narrationi, ut vera; sed necesse est rem oblatam amplecti, quod utique ad voluntatem pertinet.*

4. Tertium fundamentum: prior actus est ipsa essentia seu formalis ratio fiduciæ; posterior verò est tantum actus ei annexus, & concomitans: & proinde fiducia formaliter est in intellectu, licet annexum habeat desiderium voluntatis. Probatur hæc

hæc assert. primò, quia oppositum *fiduciæ*, videlicet *diffidentia*, est in intellectu: Ergo ipsa fiducia est in intellectu: ratio antecedentis est, quia diffidentia quâ aliquis dicitur diffidere sibi, aut suis rebus, non significat *odium aut aversionem voluntatis*, sed aut *dubitationem de viribus suis*, aut *persuasionem de imbecillitate suâ*, quæ proculdubio ad intellectum pertinent. Secundò, quia si fiducia formaliter esset *actus voluntatis*, nihil aliud esset quàm *desiderium aut amor* objecti: sed hoc est quotidianæ experientiae contrarium: multi enim ardenter *expetunt & desiderant* obiectum aliquod, qui non habent *fiduciam* de eo obtinendo.

5. Ob. prim. Si fiducia est *actus intellectus*, tota fides salvifica in intellectu existet. Respondeo cum *Tileno*, *disp. 40. part. 2.* totam fidem ratione *essentie suæ* esse in intellectu, tanquam in proprio subiecto, licet *ἐν ἐπὶ νουῶς* sit in voluntate, quatenus eam *movet & afficit*, sed de hac quaestione plura postea in *Art. 21.*

6. Ob. secund. Si fiducia est in intellectu, non differt ab assensu: at hoc repugnat doctrinæ omnium Orthodoxorum, qui hæc duo in fide distinguunt, *assensum & fiduciam*. Resp. fiduciam primo modo acceptam, & assensum differre, ut universale & particulare; fiduciam verò secundo, tertio, aut quarto modo acceptam, differre ab assensu, essentiali discrimine: sunt enim

diversi specie actus mentis. Dico fiduciam primo modo acceptam differre ab assensu, ut universale & particulare: quia assensus, quem Theologi secundum actum fidei appellant, est *generalis quidam actus, quo intellectus toti D E I verbo assentitur*: hoc est, tum Legi, tum Evangelio. Fiducia verò est *particularis quidam & applicativus assensus*, pro objecto habens primo *Evangelicas promissiones*, secundo *internum testimonium sancti spiritus*: nam per fiduciam & assentimur doctrinæ Evangelii, & testimonio Spiritus D E I, *unà testantis cum nostro spiritu, nos esse filios D E I*: atque ita nobis ipsis applicamus Evangelicas promissiones, certò statuentes & iudicantes nos esse filios D E I, & proinde illas promissiones non solum aliis credentibus, sed nobis etiam in particulari esse factas.

7. Ob. tert. *Per solam voluntatem amplectimur & applicamus nobis ipsis promissiones gratiæ: Ergo fiducia quæ est actus applicativus fidei ad solam voluntatem pertinet.* Resp. applicationem gratiæ fieri & per *actum intellectus*, & per *actum voluntatis* (ut dictum est suprà,) sed præcipuè per *actum intellectus*: magis enim applico promissionem gratiæ mihi ipsi *indicando & certò statuendo eam ad me pertinere*, quàm *expetendo & desiderando gratiam promissam.*

8. Ob. quart. *Nullus unquam Orthodoxus*
Theologus

Theologus dixit, fiduciam esse assensum, aut iudicium mentis: Ergo ista sententia non est ferenda. Respond. priuò, doctrinam de facultate, seu potentia animæ in quâ sita est fiducia, non esse dogma fidei: siue enim statuamus eam in intellectu siue in voluntate, parùm interest, modò reiecto Pontificiorum errore de incertitudine iustitiæ, dicamus eam esse verum fidei actum. Respond. secundò, Orthodoxos Theologos, cùm dicunt fiduciam esse in voluntate, loqui de fiducia secundo, tertio, aut quarto modo acceptâ. Respond. tertio, quosdam doctissimos Viros asserere, fiduciam esse quendam assensum, aut iudicium intellectûs: nam *Zanchius, Tom. 4. Libro primo, Capite decimo tertio,* dicit fiduciam & fidem salvificam idem esse; & definit fidem salvificam sic; *Fides iustificans, est firmus & indubitatus assensus, &c.* Item fiduciam sic definit; *Fiducia est certissima persuasio de veritate promissionum, &c.* Assensus autem & persuasio ad intellectum pertinent, ut cuius manifestum est. *POLANUS* etiam *Syntagmat. Theolog. Libro nono, Capite sexto,* dicit *πληροφορίαν* esse plenam & certam persuasionem dubitationis & disceptationis expertem, & cætera: & in secundo Libro partitionum Theologicarum dicit fidem specialem, seu salvificam, esse internum cultum *DEI* dum promissioni Evangelica assentimur.

9. Si quis autem pertinaciter hanc sententiam tanquam novam & prius inauditam damnet, quæram ex ipso, *ad quem actum fidei referendum putet illud applicativum iudicium intellectus, de quo hic loquimur*; utrum videlicet referat illud ad *notitiam*, ad *assensum*, an verò ad *fiduciam*. Non potest particulare hoc & applicativum iudicium referri ad notitiam præcedaneam, aut ad assensum generalem; nam istorum actuum objectum est *totum DEI verbum*: Ergo referri debet ad fiduciam, & per consequens fiducia ad intellectum pertinet, hoc enim iudicium est actus intellectus.

ART. XX.

Utrum objectum fidei salvificæ sit remissio peccatorum jam impetrata? An verò sit remissio peccatorum impetranda & obtinenda?
Vbi obiter solvitur præcipuum argumentum Bellarmini contra objectum & naturam fidei justificantis.

1. **A**ctus fidei salvificæ, qui est causa instrumentalis iustificationis, non videtur esse fiducia *venie aut remissionis peccatorum impetratæ*; sed fiducia *venie impetrandæ*. Primò, quia *causa instrumentalis iustificationis præcedit iustificationem*

ificationem, seu remissionem peccatorum: sed
 ducia veniæ seu remissionis impetratæ, eam
 equitur: alioqui enim falsa esse convincitur;
 uia credere sibi *remissa est peccata*, quæ non
 um *remissa*, sed per ipsum actum credendi sunt
 mittenda, est falsum & erroneum iudicium
 abere. Secundò, quia persuasio de *re aliquâ fa-*
ctâ, semper est naturâ posterior *ipsâ re factâ*, &
 roinde non potest esse causa instrumentalis ip-
 us rei factæ: ratio antecedentis est, quia omne
hjectum est naturâ prius suo actu: actus enim
 o obiecto dependet, illudque præsupponit: ra-
 io item consequentiæ est, quia id quod est natu-
 â posterius, non potest esse causa eius quod
 st naturâ prius, cum *omnis causa sit naturâ*
rior suo effecto. Has duas rationes affert *Bellar-*
minus, Libro primo de Iustificatione, Capite de-
imo, sed frustra: nam pro eius sententia nihil
 ciunt, ut mox patebit.

2. Tertia ratio sit hæc: Si quis quærat, *quid*
credendum peccatori, ut remissionem peccato-
um consequatur: non satis appositè responde-
 o, si dicam, illi credendum esse, *quòd eius pec-*
ata sint iam remissa: ridiculum enim est, dicere
 licui, *ut hoc fiat*, crede illud *factum esse*: quia
 ùm dico, crede hoc *factum esse*, ego indico illud
im esse factum: cum verò dico, *ut fiat*, indico
 lud *nondum esse factum*, sed esse possibile tan-
 ùm: Hæc autem simul consistere nequeunt.

3. Quarta

3. Quarta ratio sit hæc: Quicumque D E U M orat, ut ei peccata remittat, confidens in esse unum ex eorum numero pro quibus C H R I S T U S est mortuus, D E U M que exauditurum eius Preces propter C H R I S T V M, is proculdubio remissionem peccatorum consequetur: nulla igitur necessitas nos cogit, asserere actum fidei salvificæ, qui est causa instrumentalis iustificationis, esse *fiduciam veniæ impetratæ*.

4. Interim non sum adeò absurdus, ut putem, fideles non habere eiusmodi fiduciam veniæ impetratæ, per meritum C H R I S T I aut ut putem hanc fiduciam non esse fidei salvificæ actum: revera enim est actus fidei salvificæ sed naturâ posterior iustificatione, & quid eam consequens, ideoque non est ille actus fidei, qui est causa instrumentalis iustificationis nostræ.

5. De obiecto igitur fidei salvificæ hæc tenenda sunt: Primò tenendum est, *obiectum fiduciae, non solum esse remissionem peccatorum impetrandam & obtinendam, sed etiam eorundem remissionem iam impetratam*. Secundò, *fiduciam in hac duo tendere per duos distinctos actus, quorum alter præcedit iustificationem, ut eius causa instrumentalis; Alter eam sequitur, ut eius effectum & consequens*. Tertiò, *actum fiducialem qui iustificationem præcedit, ut eius causa, esse persuasionem de C H R I S T I satisfactione pro nobis in particulari, & de remissione peccatorum obtinenda*.

tenendâ, per & propter eius satisfactionem. Quartò, actum fiducialem, qui iustificationem quitur, esse persuasionem de remissione peccatorum iam impetratâ, & de nostra perseverantia in statu usque ad finem vitæ.

6. Hanc sententiam de obiecto fidei salvificæ amplexus sum, cum primùm Theologiæ peram dare cœpi: sed eam suspectam habui, ob novitatem suam; ideoque eam in perpetuas tenebras damnaveram: verùm hoc ipso anno, cum legerem doctissimas animadversiones & astigationes *Davidis Parei*, in 4. Tom. *Bellarmini*, idem plane apud illum reperi, *Lib. I. de iustificatione Cap. 10.* unde accidit ut tanti viri testimonio fretus & munitus, hanc sententiam vulgare non sim veritus.

7. Ex his patet, secundam rationem contra obiectum fidei salvificæ, à *Bellarmino* allatam *Lib. I. de iustificatione Cap. 10.* nullius esse roboris, aut ponderis: ille enim sic argumentatur: *fides iustificans præcedere debet iustificationem: sed fides specialis misericordiæ eam sequitur: Ergo fides specialis misericordiæ non est fides iustificans.* Respond. ad propositionem, fidem iustificantem præcedere iustificationem, sed non secundum omnes eius actus: quidam enim actus fidei iustificantis iustificationem sequuntur: ut dictum est. Similiter ad assumptionem Respond. idem specialis misericordiæ iustificatione posterioriorem

steriorem esse, sed non secundum omnes eius actus: persuasio enim de veniâ seu remissionem peccatorum impetrandâ, est actus illius fidei quam fiduciam specialis misericordia vocant: ea autem iustificationem præcedit, saltem ordine natura.

ART. XXI.

An & quatenus fides ad voluntatem pertineat.

I. **C**VILIELMUS ESTIUS, in Lib. 3. Sent. Dist. 23. dicit fidem partim intellectûs esse, partim voluntatis: intellectûs quidem tanquam subiecti & propria potentia: ipsum namque credere, seu assentiri, est actus cognitiva partis: voluntatis verò, quia ab ea dependet tanquam ab imperante, & consentiente principio: Cùm enim (inquit) humana menti proprium sit ratione discutere, & examinare sitne rebus propositis assentiendum an non: ea verò quæ ad religionem pertinent talia fere sint, quæ rationis examen non admittant, utpote iudicio humane sapientie ut plurimum improbabilia, ut docet Apost. I. ad Cor. Cap. I. vers. 18. profecto vel nunquam, vel rarò intellectus noster rebus huiusmodi acquiesceret, nisi voluntatis imperio & inclinatione

inclinatione in assensum duceretur. & ut A-
post. loquitur, 2. Cor. Cap. 10. in captivi-
tatem redigeretur, in obsequium seu obedi-
entiam CHRISTI. Necessaria est igitur in-
tellectui in credendo hæc benigna voluntatis in-
clinatio, tum ut ad eas rationes se convertat,
quæ fidem gignant, nutriantq̃, vel saltem osten-
tant id quod creditur non esse absurdum; tum
ut eas rejiciat, quæ assensum impedire, aut re-
pugnarari possunt; unde de Abrahamo dicitur, Rom.
9. quod non consideravit corpus suum emortu-
m, &c. est igitur assensus fidei ex consequenti
iam voluntatis actus, nimirum à voluntate im-
pugnatus, tum quoad eius initium, tum quoad eius
continuationem. Hactenus Estius.

2. Daniel Tilenus, Syntag. part. 2. Disp.
3. dicit salvificam fidem esse subjective in so-
ciété intellectu, ἐπεὶ συντικῶς verò seu effectivè perti-
nere ad voluntatē, quatenus eam movet & adfi-
nit: quemadmodum scientia qua bonum à malo
ternoscimus, subjective inest menti, voluntati
effective, cū imperat aut elicit actiones, quas
ratio dicitur. Hæc sententia differt ab opinione
alii, quia non refert fidem ad voluntatem ra-
tione originis suæ, sed ratione fructus quem
in directione fidei capit voluntas, nam illumi-
nationem fidei in mente sequitur renovatio & co-
lluctio voluntatis.

3. David Pareus, in L. 1. de Iustificacione,
Cap.

Cap. 6. dicit, *Fidem non solum effectivè, sed etiam subiectivè esse in voluntate, saltem quoad postremum eius actum, videlicet fiduciam quamvis enim notitia & assensus sint in solo intellectu, fiducia tamen ex ejus sententiâ formaliter est in voluntate, tanquam in subiecto.*

4. Propositâ jam sententiarum varietate meam mentem assertionibus aliquot proponam: prima sit hæc: *non est anxie litigandum de subiecto fidei: five enim dicamus eam esse in intellectu, five in voluntate, tanquam in subiecto, nihil detrimenti capiet nostra sententia quæ asserit fiduciam specialis misericordiæ esse fidei actum.* Dicit aliquis: *Bellarminus ex hoc colligit fiduciam non esse fidei actum, quod fiducia ad voluntatem, fides ad intellectum pertineat.* Respond. *Bellarminum asserere quidem, se nondum probasse fiduciam esse voluntatis actum, vide Art. 19.*

5. Secund. assert. *fides est in solo intellectu propriè, subiectivè, & respectu suæ essentia,* ut loquitur *Tilenus.* Ratio huius assertionis est quia non solum notitia, & assensus; sed etiam fiducia in intellectu existit: ut probatum est *Art. 19.* & per consequens tota fides est in intellectu.

6. Tert. assert. *quamvis fides in solo intellectu tanquam in subiecto existat, non est idem putandum fidei habitum esse speculativum, et*
quæ

quasi otiosum; tum quia eius finis est *περὶ χάριτος*, nam
per charitatem operatur, 5. *Gal. vers. 6.* tum
 quia ad voluntatem variis modis pertinet, licet
 inopriè & subiectivè in eâ non existat. Atque
 hoc est, quod fides in S. Scripturâ sæpè cordi
 tribuatur, ut *Rom. 10. vers. 9. & 10. Si tu
 credideris in corde tuo, &c. et, Corde creditur ad
 iustitiam &c.*

7. Quart: assert. *Fides ad voluntatem per-
 tinet*, primò ratione *originis*, secundò ratione
actûs annexi, tertio ratione *fructuum*, qui ex
 ea in voluntate nascuntur: pertinet ad eam ra-
 tione *originis*, quia intellectus noster piâ volun-
 tatis inclinatione, & imperio, ad assentiendum
 movetur, & in captivitatem redigitur: unde
 consensus fidei appellari solet actus imperatus à
 voluntate; item denominari solet voluntarius
 & liber actus; videlicet quia dependet à prin-
 cipio liberè agente, h. e. à voluntate: atque
 hoc est quod dixit *Augustinus*, *neminem crede-
 re nisi volentem*: pertinet etiam fides ad volun-
 tatem ratione *actûs annexi & concomitantis*:
 nam eo ipso instanti, quo fides in intellectu
 consentitur Evangelicis promissionibus, easque
 certo & stabili iudicio sibi applicat, voluntas
 ardenti amore gratiam & favorem Dei ample-
 titur: deniq; pertinet ad eam ratione *fructuum
 & operationum*, quia (ut dictum est) illuminatio-
 nem fidei in mente sequitur sanctificatio & e-
 mollio voluntatis.

ART. XXII.

Vtrum Charitas sit forma Fidei.

I. **D**VRANDUS, in *Lib. 2. Sent. Distinct*
 23. *Quest. 8.* de hac controversia in
 utramq; partem disserit: & primò probat *Cha-*
ritatem non esse formam fidei, duabus rationi-
 bus: prima ratio est; Quia forma & id cuius est
 forma, in eodem subiecto existunt, at *Fides* &
Charitas sunt in diversis subiectis, nam *Fides*
 est in intellectu, *Charitas* verò est in voluntate.
 Ergo *Charitas* non est forma *Fidei*. Secunda ra-
 tio est, quia *Charitas* neque est forma essentialis
Fidei, neque accidentalis: Ergo nullo modo est
 eius forma. Probat antecedens sic; *Fides* potest
 esse sine *Charitate*: Ergo *charitas* non est eius
 forma essentialis: item *Charitas* est nobilior &
 præstantior *Fide*: Ergo non est eius forma acci-
 dentalis.

2. Deinde probat *Charitatem* esse *Fidei*
 formam, quia illud *per quod aliquid vivit &*
operatur, est forma: at *Fides operatur per Chari-*
tatem, *Gal. 5. vers. 6.* vivit etiam per eam, quia
sine operibus charitatis fides est mortua, *Iac. 2.*
vers. 26. Ergo *Charitas* est forma *Fidei*.

3. Ut quæstionem hanc dissolvat Duran-

du, distinctione utitur, dicens Fidei habitū duobus modis posse considerari, videlicet secundum eius *esse naturæ*, hoc est, secundum eius essentiam; & secundum eius *esse meritorium*; hoc est, quatenus meretur vitam æternam: secundum priorem considerationem, dicit *Fidei* formam esse *Charitatem*, ut probant duo illa argumenta in prima assertionem proposita: at secundum posteriorem, putat *Charitatem* rectè appellari *Fidei* formam; idque quia actus Fidei non est meritorius, nisi quatenus imperatur à Charitate, sine quâ non habet rationem meriti.

4. Ex hac distinctione *Durandi* duo colligo: Primò, *Eos non rectè procedere contra Pontificios*, qui probant *Charitatem non esse formam Fidei*, argumentis sumptis aut ab essentiali divergentia *Fidei & Charitatis*, aut à prioritate originis, quâ *Fides Charitatem ordine naturæ præcedit*, aut ex eo quòd *Fides Charitatem dirigat*, & *Charitas Fidei obsequatur*, &c. ista enim argumenta non sunt *ad hominem*, ut loquuntur: nam nihil aliud probant quàm id quod Pontificij concedunt, viz. *Charitatem non esse formam Fidei quoad ejus esse naturæ*.

5. Secundò colligo, doctrinam *Durandi*, & aliorum Pontificiorum de forma Fidei rejiciendam & explodendam esse: quia viz. nititur absurdissimo & periculosissimo illo dogmate de meritis Fidei & bonorum operum: cujus falsitatem

evidentissimè demonstrant nostri Theologi in controversia de justificatione, idque quatuor præcipuè rationibus: primùm, quia opera illa, quâ bona, non sunt nostra; hoc est bonitas istorum actuum non nobis, sed DEO ascribenda est: Secundò, quia opera illa sunt debita. Tertiò, quia nihil ex illis accedit DEO. Quartò, quia nullam habent analogiam ad præmium, quod est vita æterna.

6. Argumentum Pontificiorum petiit ab operatione Fidei per Charitatem facillimè solvitur: nam agens principale, non solum operatur per formam, sed etiam per facultates suas, & per instrumenta sua: & proinde neganda est illa consequentia: *Fides operatur per Charitatem: Ergo Charitas est forma Fidei*: nec minùs inepta est illa altera consequentia: *Fides sine operibus Charitatis est mortua: Ergo Charitas est forma Fidei*: si enim illa illatio bona esset, sequeretur caput aut cor hominis, esse ejus formam, idque quia homo sine capite aut corde vivere non potest.

ART. XXIII.

*An Religio sit virtus Theologica à
Fide distincta.*

I. THOMAS AQUINAS *secundâ se-
cundâ, Quæstione 81. Art. 1. de Reli-
gione* differens, triplicem affert eius notationem, seu λόγον ὀνομαστος: Prima est, qua Religio à *Relegendo* dicitur, quòd illi qui sunt religiosi sapiùs ea retractent, & quasi *relegant*, quæ ad divinum cultum pertinent. Secunda est, quâ religio dicitur à *Reeligendo*, quòd DEVM *reeligere* debeamus, quem amiseramus negligentes. Tertia est, quâ religio derivatur à *Religando*, quòd ea nos *religet*, seu denuò conjungat DEO omnipotenti. *Sive autem* (inquit Thomas) *religio dicatur à frequenti relectione, sive ex iteratâ electione eius quod negligenter amissum est, sive à religatione*, religio propriè importat ordinem ad DEVM: ipse enim est cui principaliter alligari debemus, tanquam indeficienti principio; ad quem etiam nostra electio assiduè dirigi debet, sicut in ultimum finem; quem etiam negligenter peccando amittimus, & credendo ac fidem protestando recuperare debemus. Hæc D. THOMAS.

2. Religio à S. Thoma sic definitur, Religio
S 2 est,

est, quæ D E O debitum cultum offert: à Zanchio sic explicatur, Est virtus posita in vero veri D E I cultu tum externo, tum verò maxime interno: à Polano sic describitur, Religio est virtus animis nostris à D E O per Spiritum sanctum indita seu infusa, quâ religiosi & pii effecti, D E U M rectè agnoscimus & colimus; id est, ex ipsius voluntate in scriptis Prophetis & Apostolicis revelatâ: à Tilenio denique hac descriptione explicatur, Religio est Ceremoniarum & Rituum à D E O præscriptorum observatio. Hæc descriptio Tileni in hoc differt à præcedentibus, quòd non satis amplum obiectum religioni assignet: dicit enim eam versari circa ritus & ceremonias à D E O præscriptos: cùm tamen certum sit, religionem præcipuè versari circa cultum internum.

3. Bellarminus, Tom. 1. controvers. 5. controvers. generali, Lib. 2. Cap. 2. sic definit Religionem; Religio est status hominum, ad perfectionem Christianam tendentium, per paupertatis, continentia, & obedientia vota: sed hæc definitio valdè inepta est: nam ut dicit D. Thomas secundâ secundâ quæst. 81. Art. 2. Religio est virtus quædam seu habitus mentis, & proinde non rectè dicitur status hominum &c.

4. Ex tribus primis descriptionibus Religionis, patet eam esse rectam rationem colendi D E U M, seu habitum directivum earum actionum,

onum, quibus *DEUM* colimus & veneramur: cum enim natura nostra corrupta, prona sit ad concipiendum erroneas opiniones de *DEO*, & sectandum falsas rationes eum colendi: noster cultus *DEO* gratus & acceptus esse non potest, nisi præditi simus habitu aliquo directivo, cujus beneficio *DEUM* rectè agnoscamus, & colamus.

5. Quæri solet, utrum hic *directivus habitus* sit *virtus moralis*, an verò *Theologica*. *S. Thomas*, secundâ secundæ quæst. 81. Art. 5. dicit Religionem esse virtutem moralem, & ejus opinionem amplectitur *Daniel Tilenus* part. 1. Syntag. disp. 41. Thes. 9. Contrâ verò *Zanchius*, Tom. 4. Cap. 13, in explicatione Thes. 1. *Polanus Synt. Lib. 9. Cap. 1.* & alii, dicunt Religionem esse virtutem à *DEO* per Spiritum suum animis nostris inditam seu infusam, & proinde Theologicis virtutibus annumerandam: morales enim seu Ethicæ virtutes à Deo non infunduntur, sed crebrâ bonarum actionum iteratione acquiruntur.

6 Hujus quæstionis determinationem tribus assertionibus proponam; & deinde solvam duo præcipua argumenta, quæ afferri possunt in contrarium. Prima assertio sit hæc: *virtus illa cuius beneficio DEUM rectè agnoscimus, & colimus, non potest natura viribus acquiri; sed à DEO immediate infunditur: hoc autem probatur manifestè,*

festè, quia ut docet ipse *Tilenus in disp. 2. quæ est de origine S. Scripturæ*, lux naturæ non sufficit ad **D E U M** rectè cognoscendum, multo minus ad eum ritè colendum : & proinde opus est habitu quodam supernaturali, qui regulativus & directivus sit venerationis nostræ.

7 Secunda assertio; *Religio non est virtus à Fide re distincta*: nam Fidei competit definitio religionis, hoc autem sic ostenditur : Fides est habitus directivus & regulativus nostræ adorationis, quâ **D E U M** adoramus, & colimus : Ergo Fides est religio. Ratio antecedentis est quia per Fidem novimus quis cultus **D E O** gratus sit, & quomodo ille cultus **D E O** sit exhibendus.

8 Tert. assert. *Notitia voluntatis divina, quam ex verbo D E I habemus, duobus modis considerari potest : primò, quatenus est notitia, aut assensus nitens D E I testimonio in verbo suo : secundò, quatenus est notitia directiva, seu regulativa actionum nostrarum quibus D E U M colimus* : hæc notitia priori modo considerata appellatur fides, at quatenus posteriori modo consideratur, appellatur religio, & proinde fides non re, sed solâ ratione à religione differt.

9 Contra hanc sententiam objicitur primò; Religionem non esse virtutem Theologicam, quia Theologicæ virtutis objectum est ipse **D E V S**, at objectum religionis est cultus **D E I**, velut alii loquuntur, id quod **D E O** offertur;

fertur; videlicet *sacrificia, jejunia, preces*. Resp. virtutes Theologicas non tam ex objecto suo, quàm ex origine æstimandas esse: illæ enim virtutes dicendæ sunt infusæ, seu Theologicæ, quæ nostro labore & industriâ acquiri non possunt, sed à D E O immediatè infunduntur. Secundò Respond. Religionem quatenus est à parte rei eadem cum fide, pro objecto habere ipsum D E V M: nam fidei objectum, ut omnes fatentur est ipse D E V S.

10 Secund. ob. Religionem non esse virtutem supernaturalem, quia ex humanæ rationis dictamine ortum habet: nam *numen aliquo modo colendum esse* (inquit *Tilenus*) *omnium etiam effera-
tissimarum gentium consensu & more receptum est*. Resp. Religionem non esse generalem notitiam quâ novimus numen esse aliquo modo colendum, sed distinctam notitiam quâ novimus D E V M hoc particulari modo esse colendum; hoc est, hunc cultum & non alium esse D E O gratum, & acceptum: hæc autem notitia non potest ex humanæ rationis dictamine ortum habere, ut cuivis manifestum est.

A R T. XXIV.

Ostenditur Theologiam Viatorum tribus modis accipi: & probatur, Theologiam primo modo acceptam non esse habitum à Fide re distinctum.

I **M**agna est loquendi varietas, & mirabilia sunt sententiarum divergia in hac controversia de natura *Theologiæ Viatorum*. Primò enim. *S. Thomas*, & cum eo multii alii Theologi *Sententiarii* statuunt *Theologiam* esse scientiam; quibus etiam adstipulatur *Dudleius Fennerus*, in limine suæ *Theologiæ*. Secundò, *Durandus*, *Canus*, & *Andreas Vega*, asserunt *Theologiam* re non differre ab habitu fidei. Tertiò, *Keckermannus* dicit, eam esse prudentiam. Quartò, clarissimus *Junius*, in libello de vera *Theologia*, *Trelcarius* in proæmio *Theologicarum institutionum*, *Polanus Libro 1. Syntag. cap. 2. Tilenus* in *Systemate Oristico*, & *Sharpius* noster in cursu *Theologico*, affirmant eam esse sapientiam. Quintò, *Balthasar Meisnerus*, in *Philosophiæ suæ Sect. 2. c. 2. quæst. 1.* dicit, *Theologiam* per specialius & magis proprium genus definiri non posse quàm per habitum deo-
so. r.

2 Quamquam controversia hæc tractatur a Scholasticis in prologo primi Libri sententiarum, revera tamen magis est Philosophica quàm Theologica: Philosophorum enim est, habituum diversa genera considerare, & ex illa habituum classe cujuslibet particularis habitus genus depromere.

3 Ut igitur hæc controversia magis dilucide determinetur, tenendum est primò, *Theologiam tribus modis accipi*, ut rectè monet *Duandus in Prol. I. sent.* Primò enim accipitur *pro habitu quo assentimur toti sacre Scripture propter DEI auctoritatem.* Secundò, *pro habitu quo assentimur conclusionibus Theologicis ex sacra Scriptura deductis.* Tertiò, *pro habitu defensivo & explicativo articulorum fidei*, qui appellari solet *Theologia Doctorum*, seu *Theologia scholastica.*

4 Secundò tenendum est, *Omnem habitum mentis, vel esse habitum sciendi, vel habitum credendi, vel habitum opinandi.* Ratio hujus divisionis est, quia habituum varietas oritur ex diversitate actuum ad quos referuntur & ordinantur illi habitus: actus autem ad quos ordinantur omnes habitus intellectuales sunt tres; videlicet *actus credendi, actus sciendi, & actus opinandi*, & proinde tria sunt genera habituum mentis nostræ.

5 Tertiò tenendum est, *Habitu sciendi, quatenus*

quatenus opponitur habitibus credendi, & opinandi, sub se complecti illa 5. habituum genera, quæ ab Aristot. enumerantur 6^{to} Ethicorum. Latè enim hic accipitur habitus sciendi, pro quavis notitia habituali certâ & evidente, sive ea sit de rebus necessariis, & speculabilibus, sive sit de rebus contingentibus, & operabilibus. Talis autem notitia, non solùm cernitur in disciplinis speculativis, sed etiam in practicis. Nam illi, qui præditi sunt habitu *Prudentiæ*, seu *Philosophiæ moralis*, non opinantur, aut credunt, sed certò & evidenter sciunt, actiones liberalitatis esse honestas, & actiones vitiorum ei oppositorum esse turpes & inhonestas: illi item qui periti sunt alicujus artis, non opinantur, aut credunt, sed certò sciunt suâ arte facta esse hoc vel illo modo efficienda: eorum enim notitia est experimentalis, & proinde est certa & evidens: certa autem & evidens notitia non est opinio aut fides, sed scientia: ut patet ex ijs, quæ dicta sunt primo ARTICULO.

6. His positis, ad quæstionem in titulo propositam Respondetur quatuor Assertionibus: prima est hæc, *Nullus habituum Aristotelicorum, Theologia primo modo accepta genus esse potest*: primò, quia omnes isti habitus sunt habitus sciendi, ut jam dictum est: item omnes isti habitus sunt hominum solertiâ inventi, & exculti, seu ex principiis naturâ notis deducti.

Theologia

Theologia autem non est habitus sciendi, sed credendi, ut mox patebit: Item non est habitus hominum solertiâ inventus, sed *θεωστικός*: ejus enim principium non est humana ratio, sed divina revelatio.

7 Secundò: si specialiter percurramus omnes illos habitus, videbimus Theologiam sub eorum nullo contineri. Primò enim Theologia non est *ars*, quia non est habitus effectivus: non est prudentia, quia ea est virtus directiva actionum civilium: est enim *ἐξ ἡς θεωρεῖται τὰ ἀπορρήτα ἀγαθὰ*, Lib. 6. Ethicorum, cap. 5. at Theologia est virtus directiva actionum spiritualium. Non est intellectus, quia non versatur circa principia naturâ nota, & suâ luce clara. Non est scientia, tum quia non est habitus demonstrativus, tum quia in cognitione non acquiescit; sed iam ad operationem ordinat & dirigit, Non est eniq; sapientia, quia sapientia est scientia quædam: est enim *ὅτι οὐκ ἐστὶν ἐπιστήμη*: at Theologia, ut dictum est, non est scientia.

8 Secunda assertio est hæc: Theologia primo modo accepta, hoc est, accepta pro habitu, quo assentimur toti Scripturæ propter DEI authoritatem, nihil aliud est, nisi fides divina. Probatur hæc assertio: primò, quia fides est habitus assentiendi propter DEI authoritatem, at Theologia primo modo accepta, est talis habitus: Ergo est fides. Secundò, Theologus quâ Theologus non opinatur,

natur, quia ejus notitia est certa, opinio verò est incerta; *non scit propriè*, quia scientia est evidens notitia, Viatorum autem notitia Theologica non est evidens, sed ænigmatica: *Ergo Theologus, quâ talis, credit; & per consequens Theologia est fides.*

9 Tertia assertio: *Quamvis fides historica improborum, quâ Scriptura assentiuntur, aliquo modo dici possit Theologia, quia videlicet est notitia D E I, & rerum divinarum: sola tamen salvifica fides electorum, quâ & assentiuntur sacre scriptura; & assentiendo sibi applicant promissiones Evangelicas, Theologia nomen meretur:* Ratio hujus assertionis est, quia vera Theologia non est habitus *speculativus*, sed *practicus*, ut postea probabitur: impiorum autem Theologia, *inefficax est, & otiosa*, non verò *activa*. Quæret aliquis: *In quo posita sit illa deus, quæ est Theologia finis?* Respond. eam esse positam in gratitudine nostra erga DEVM, pro singulari illo redemptionis nostræ beneficio; hoc est, in agnitione, predicatione, & celebratione clementiæ D E I, qui sic dilexit mundum, ut filium suum unigenitum &c. Item, in celebratione sapientiæ, justitiæ, & omnipotentiae diviniæ. Hæc autem nemo præstare potest, nisi in corde suo habeat illam applicativam persuasionem & fiduciam de remissione peccatorum, de qua suprà locuti sumus; unde manifestè patet,

veram

veram & salutarem Theologiam rectè dici fidei salutificam.

IO Quarta assertio : Errat Balthasar Meiserus, qui dicit genus proximum Theologiae esse habitum θεολογικόν: est enim ejus genus remotum solummodò. Probatur hæc assertio manifestè: quia, ut jam declaratum est, vera Theologia in prima significatione, revera est habitus fidei salutificæ: genus autem proximum fidei salutificæ est fides divina in genere, prout completitur sub se fidem historicam, temporariam, miraculosam, & salutificam: genus verò ejus remotum est habitus θεολογικός, hoc est, à DEO infusus, qui sub se continet Fidem, Spem, & Charitatem.

ART. XXV.

Probatur, contra Antonium Ruvium, Theologiam secundo modo acceptam, non esse scientiam, sed fidem divinam.

Q Vidam Pontificii Theologi nobiscum asserunt, Theologiam acceptam pro habitu quo assentimur sacrae Scripturae, rectè dici fidem divinam; Theologiam verò acceptam pro habitibus conclusionum ex Scriptura deductarum, non fidem, sed scientiam appellant; quia proximè non

nō innititur authoritati, sed evidenti discursui: hanc sententiam optimè explicat, & defendit *Antonius Ruvius, in Logica Mexicana opusc. de habit. Tract. 3.*

2. His Theologis si objicias, *scientiam esse notitiam evidentem: habitum verò conclusionum Theologicarum esse notitiam inevidentem*, Respondebunt *evidentiam* esse de essentia scientiæ naturaliter acquisitæ, quam solam definivit *Aristoteles*; non verò competere scientiæ *supernaturali*, Theologiæ videlicet, quam ob defectum *evidentiæ* imperfectam esse scientiam fatentur.

3. Sed hæc Responsio non satisfacit, cum enim *scientia* generaliter accepta, cum *fide* conveniat, in *firmitate & certitudine*, & ab ea distinguatur per solam *evidentiam*: proculdubio dicendum est, habitum illum, cui deest *evidentia*, modò *certitudo & firmitas* ei conveniant, nō ad *scientiam*, sed ad *fidem* referendum esse: supra enim dictum est, fidem esse assensum *certum & inevidentem*: præterea si habitus conclusionum Theologicarum ex Scriptura deductarum est habitus *certus & inevidens*, est *ὑπόστασις τῆς ἐπιστάσεως*, & proinde est *fides divina*: at verum est prius fatente ipso *Ruvio*: Ergo etiam & postea.

4. Alii Respondent notitiam conclusionum Theologicarum, revera esse *evidentem*; hoc enim

enim posito, quòd vera sint ea omnia, quæ in S. Scripturâ continentur; evidenter & perspicuè equitur, conclusiones ex Scripturâ deductas esse veras: sed illi qui ita Respondent, non advertunt ad *evidentiam notitiæ* plus requiri, quàm ut conclusio cui assentimur, ex *præmissis* suis seu principiis *evidenter inferatur*: nam præ hoc etiam requiritur, ut *præmissæ, ex quibus inferuntur sint evidentes*; hoc est, ut sciantur, non verò credantur.

5. Probat^{ur} hæc assertio: Quia si notitia conclusionum ex S. Scriptura ductarum sit evidens, quia illæ conclusiones ex Scriptura *evidenter & perspicuè* colliguntur, pari ratione notitia conclusionum, *evidenter & perspicuè ductarum* ex præmissis probabilibus, de quibus *opinionem tantum* habemus, evidens dicenda est: at hoc est manifestè absurdum: nam notitia conclusionum ductarum ex præmissis probabilibus & opinabilibus, est *incerta*, & per consequens etiam *nevidens*.

6. Præterea sententiæ supradictæ falsitas ex eo patet, quòd credere non tantum sit *assentiri testimonio propter testantis auctoritatem*; e. assentiri alicui narrationi propter narrantis dignitatem, sed etiam *assentiri conclusioni ex testimonio deductæ propter illud testimonium*: qui enim assentitur alicui veritati ex testimonio deductæ, propter testimonium ex quo

quo deducitur, is non propriè dicitur scire, sed credere rem ita se habere : idque quia fundamentum, quo nititur scientia, non est testimonium, sed ratio. Quare actus credendi, non tantùm est assensus quem præbemus D E I testimonio in Scripturâ proposito, sed etiam quem præbemus conclusionibus ex eo testimonio deductis.

A R T. XXVI.

Probatur, Theologiam tertio modo acceptam, hoc est, Theologiam Scholasticam esse habitum aggregatum ex Fide, & Philosophicis disciplinis.

I. **E**X iis quæ dicta sunt in duobus præcedentibus Articulis, manifestè sequitur Theologiam esse habitum à D E O *infusum*, & non à nobis ipsis *acquisitum*: hoc autem videtur esse falsum, & quotidianæ experientiæ contrarium: videmus enim Theologiæ habitum in adolescentibus non produci immediatè à D E O, sed potius per ipsorum diligentiam & indefessum laborem acquiri. Ut hæc difficultas tollatur, tenendum est in *Theologia* primo & secundo modo acceptâ, duo esse consideranda. Prius est, *informatio seu instructio mentis de credibilibus*, ut loquuntur Scholastici: hoc est, notitia quâ novi-

mus

mus quænam dogmata in Scriptura credenda proponantur, & quænam dogmata ex Scripturâ per necessariam consequentiâ colligantur. Posterius est, *inclinatio mentis ad assentiendum illis credibilibus*, h. e. firma persuasio de veritate istorum dogmatum: prior illa notitia non est *infusa*, sed *acquisita* nostro labore & diligentia; videlicet legendo, & relegendo Libros Propheticos & Apostolicos: at posterior illa notitia seu persuasio, non est à nobis ipsis, sed à DEO, qui mentes nostras efficaciter movet, & inclinat ad assentiendum illis articulis.

2. At alia est ratio Theologiæ tertio modo acceptæ; viz: pro *habitu defensivo*, & *explicativo articulorum Fidei*: nam in ea sic acceptâ tria sunt consideranda: primò, *Informatio mentis de credibilibus*: secundò, *Assensus quem præbemus illis credibilibus, seu articulis fidei*: Tertiò, *Facilitas seu promptitudo explicandi, defendendi, & confirmandi illos articulos, contra Hæreticos & alios Ecclesiæ hostes*. Primus actus à nostro labore & industria dependet: secundus est à DEO solo, ut iam dictum est: at tertia illa eius pars nostro etiam labore & diligentia comparatur; nam diligenter legendo & considerando controversias Theologicas, acquirimus illam promptitudinem explicandi, & confirmandi nostram sententiam, & confutandi adversarium doctrinam.

T

3. Hinc

3. Hinc patet, Theologiam tertio modo acceptam, non esse unum simplicem habitum, sed aggregatum ex habitu fidei, seu Theologiæ, & Philosophicis disciplinis: illa enim facilitas explicandi articulos fidei, & de illis disputandi, quam *Theologia Scholastica* superaddit habitui fidei divinæ, nihil aliud est quàm *Philosophia Theologia applicata*.

4. Ut autem hoc manifestum fiat, tenendum est, omnes ferè Philosophiæ partes suum usum habere in explicatione, & defensione articulorum fidei: primò enim, beneficio *Logica* Doctores explicant articulos fidei distinctè & methodicè, debito ordine proponentes rerum Theologicarum causas, effecta, subjecta, adjuncta: item solventes adversariorum sophismata, & solidis rationibus cõfirmantes veram doctrinam.

5. Beneficio *Metaphysica* explicant multa DEI attributa, ut immensitatem, immutabilitatem, simplicitatem, æternitatem, &c. ejusdem etiam beneficio probant hæc attributa DEO verè attribui; & si quæ argumenta in contrarium afferantur, ea dissolvunt.

6. Beneficio *Physica* explicant facultatem animæ rationalis: idque ut manifestum sit in qua facultate animæ hæc vel illa virtus Theologica sedem habeat. Denique beneficio *Ethica* explicant virtutes morales, quæ in decalogo præcipiuntur; & vitia eis opposita, quæ ibidem vetantur.

ART. XXVII.

Theologiam esse similem omnibus habitibus Aristotelicis, præcipuè verbò Prudentia.

1. **N**ON defunt, qui afferunt Theologiam esse omnem habitum *eminenter*, sed non *formaliter*; id est, cujuscunque habitus quandam conditionem in S. Theologia excellenter expressam inveniri, quamvis sub nullo illorum habituum, tanquam sub genere, contineatur: primò enim, quatenus considerat **D E U M**, qui est *Suprema & generalissima causa*, est similis *sapientia*: secundo, quatenus vertatur circa *necessaria*, & ab arbitrio humano non pendentia, dici potest *Scientia*: tertio, quatenus considerat *prima & indemonstrabilia principia Fidei*, ex quibus conclusiones Theologicæ deducuntur, dici potest *Intellectus*: quarto, quatenus *Actus Christiani hominis dirigit*, *Prudentia* appellari potest: quintò, *Arti* similis est quatenus est *edificativa Ecclesiæ*: unde Apost. i. Cor. 3. dicit, *secundum gratiam quæ data est mihi, ut peritus Architectus fundamentum posui, alius autem superedificat.*

2. Si quis quærat, *an Theologia sit similior uni horum quinque habituum, quam reliquis*: Respondebo, eam esse *Prudentia Civili* simillimam: primò enim, ei accommodari potest *Pru-*

dentia definitio: nam sicut *Prudentia Civilis* est *habitus rectâ cum ratione activus*; i. e. *directivus actionum Civilium*: ita etiam *Theologia* est *habitus rectâ cum ratione activus*; i. e. *directivus actionum spiritualium*. Secundo, sicuti *Prudentia*, quæ est *principium directivum actionum civilium*, in intellectu existens, operatur per *virtutes morales* in voluntate existentes, quæ sunt *principia executiva bonarum actionum*, inclinantia & quasi impellentia voluntatem ad id eligendum quod intellectus judicat esse melius; ita etiam *Theologia*, quæ est *principium directivum bonarum actionum spiritualium*, in intellectu existens, operatur per *virtutes Theologicas* quæ sunt in voluntate, hoc est, per *Charitatem*, & ejus *Filias*. Hæ enim sunt *principia executiva actionum spiritualium*; hoc est, inclinantia voluntatem ad id eligendum, quod *Theologia* in intellectu existens indicat esse *conforme voluntati DEI in verbo revelata*: atque hinc est quod *Apost. Galat. 5. vers. 6.* dicat *Fidem operari per Charitatem*.

3. Tertia similitudo seu convenientia *Prudentia civilis*, & *Theologiæ*, in eo est posita, quod *utraque proponat sibi felicitatem practicam consequendam*: duplex enim est *felicitas practica*; videlicet, *Civilis & spiritualis*: illa posita est in *actione secundum optimam virtutem moralem*, hoc est, *justitiam universalem*; estque finis *Prudentia*

actia Civilis: hæc verò posita est in actione secundum virtutem Theologicam præstantissimam, videlicet Charitatem; estque finis Prudentia Religiosa, hoc est, Theologia: hæc autem actio nihil est aliud, nisi divina Majestatis adoratio, ex ferventi amore divine bonitatis proveniens, & conformis D E I voluntati in verbo patefacta.

4. Dicet aliquis: *Ultimus finis Theologiae, seu felicitas Theologica, quam in hac vita assequimur, non est posita in actionibus charitatis: videtur enim potius consistere, vel in actu fidei iustificantis, vel in ipsa iustificatione hominis.* Respond. D E I cultum & adorationem rectè appellari *ultimum finem* Theologiae, quem assequimur in hac vita; idque quia & fides & iustificatio ad eum, tanquam ad ulteriorem finem referuntur: ideo enim illuminatur mens nostra per fidem, ideo etiam remittuntur nobis nostra peccata, ut D E U M colamus, ejusque clementiam & bonitatem celebremus.

ART. XXVIII.

Utrum Theologia sit disciplina speculativa, an practica.

I. I N hac controversia variae sunt Philosophorum sententiae: primò enim, quidam dicunt Theologiam, nec Practicam, nec contemplati-

nam esse; sed altiorem practicis & contemplativis disciplinis, & proinde eam *affectivam* vocant; quia eius finis est *Dei* adoratio, proveniens ex *affectu* Charitatis: alii dicunt eam simpliciter esse *contemplativam* & *practicam*, sed magis *contemplativam*: alii putant eam & *contemplativam*, & *practicam* esse, sed magis *practicam*: alii denique dicunt eam simpliciter esse *practicam*, & non *contemplativam*.

2. Ut intelligatur & confirmetur hæc postrema sententia, quæ omnibus reliquis præferenda est, notandum est primò, eam *notitiam dici theoreticam* quæ in se ipsa acquiescit, & ad operationem non dirigitur, tanquam ad ulteriorem finem: eam verò dici *practicam* quæ ad operationem tanquam ad finem refertur. Secundo notandum est, *notitiam aliquam duobus modis ad operationem tanquam ad finem dirigi posse*; videlicet, vel *absolute* & *per se*, vel *secundum quid* & *per accidens*: illa notitia *per se* ad praxin dirigitur, quæ *secundum naturam illius discipline, ad quam pertinet, ad operationem refertur*: sic notitia rerum Ethicarum est practica, quia natura Ethicæ postulat, ut omnia quæ in ea tractantur, ad operationem & usum referantur: illa verò notitia *per accidens* ad operationem refertur, quæ non est practica secundum naturam illius discipline ad quam pertinet, sed ratione finis quem sibi proponit is qui eam notitiâ est præditus:

Sic

Sic notitia rerum Physicarum seu naturalium est practica *per accidens*, quando is qui eâ notitiâ præditus est, eam ad operationem aut usum dirigit & ordinat.

3 Tertiò notandum est, *eam notitiam, quæ per se & absolute est practica*, tribus modis ad praxin dirigi & ordinari. Primò, ea notitia *per se* ad praxin dirigitur, quæ est *regulativa & directiva alicujus operationis*: Exempli gratiâ, notitia quâ sciunt Architecti quomodo ponendum sit fundamentum domûs, quomodo erigendi sint parietes, &c. est practica, quia est regulativa & directiva ædificationis. Secund. ea notitia *per se* ad praxin dirigitur, quæ est *incitativa & impulsiva ad operationem*; talis est notitia, quâ sciunt prudentes viri quæ commoda sequantur actiones honestas virtutum, quæ verò incommoda sequantur actiones vitiorum; hæc enim notitia incitat & impellit hominem ad actiones honestas. Tertiò, ea etiam notitia *per se* ad praxin dirigitur, *quæ neq; est directiva operationis, neq; est impulsiva ad operationem*; sed secundum naturam illius discipline, ad quam pertinet, est *prærequisita ad meliùs operandam & agendum*. Exempli gratiâ, in arte Medicâ, quæ tota est disciplina practica, agitur de partibus humani corporis, de partium morbis, de morborum causis, signis, Symptomatis, &c. quæ quidem notitia non est speculativa, sed practica, quia videlicet

natura illius artis postulat ut in eâ cognitione non acquiescamus, sed eam ad operationem dirigamus, & in praxin redigamus.

4 Ex his patet, illos Philosophos imperfectionem & inadæquatam definitionem *practica cognitionis* afferre, qui dicunt, *eam solam notitiam esse practicam, quæ est de re operabili, estq; regulativa & directiva alicujus operationis*: inde enim sequetur, eam Medicinæ partem quæ considerat partes humani corporis, partium morbos, & morborum causas & signa, esse speculativam & non practicam: ista enim pars Medicinæ non est formaliter regulativa alicujus operationis, neq; est de rebus operabilibus, sed de rebus naturalibus: absurdum autem est, asserere illam Medicinæ partem esse speculativam; quia disciplina, aut pars aliqua disciplinæ, dicitur speculativa (ut rectè monet *Fonsæca, Lib. 6. Metaph. Cap. 1. Quæst. 5. Sect. 5.*) à *sine ultimo & præcipuo*: finis autem ultimus illius partis Medicinæ, non est morborum *cognitio* & *speculatio*, sed *curatio*, ut cuivis manifestum est. Dixi disciplinam, aut partem disciplinæ, dici speculativam à *sine ultimo & præcipuo*: quia alioqui omnes *virtutes intellectuales*, & proinde etiam ipsæ *artes* essent *speculative*: nam *finis proximus omnium intellectualium virtutum* est *cognitio aut consideratio intellectus*.

5 Ex his patet, totam *Theologiam* esse *practicam*

eticam, & nullam ejus partem esse *speculativam* primò enim, omnis notitia quam habemus de DEO & ejus operibus, ideo à S. Spiritu in cordibus nostris gignitur, ut DEUM rectè cognitum ritè colamus; hoc est, ad modum ab ipso in verbo præscriptum. Secundò, si respiciamus naturam ipsius Theologiæ, videbimus omnem notitiam Theologicam *per se & suâ naturâ* vel esse *regulativam* alicujus operationis, vel *incitativam & impulsivam* ad operationem: notitia enim qua novimus quomodo DEUM colere & proximum diligere debeamus, est *regulativa & directiva* actionum nostrarum erga DEUM & proximum: notitia verò quam habemus de natura & attributis DEI, incarnatione τῆς ἀογῆς, & aliis similibus, est *incitativa seu impulsiva* ad morem, timorem, reverentiam, & adorationem DEI Opt. Max. idq; secundum naturam hujus disciplinæ; nam DEVS ideo voluit nos scire ejus potentiam, ut eum timeamus, & revereamur; ideo voluit nos scire ejus bonitatem & misericordiam, ut eum amemus & celebremus.

ART. XXIX.

*An Theologia Viatorum dici possit speculativa à speculatione seu visione
que futura est in Patria.*

PETRUS FONSECA, Lib. 6. *Metaph. cap.*
1. quest. 5. sect. 7. dicit, Theologiam reve-
lationis

lationis, seu *Theologiam Viatorum*, verè dici *speculativam*, quia finis ejus est *visio* seu *cognitio D E I in Patria*. Idem etiam apertè docet *Balthas. Meisnerus*, in *Philosophiæ suæ Sect. 2. Cap. 2. Quæst. 1.* verba ejus hæc sunt; *Finis Theologiæ non est beatitudo practica, sed potius theoretica, consistens in contemplatione & fruitione D E I.*

2 Hæc sententia falsa est, & rejicienda: primò enim omnis *finis denominans aliquem habitum*, vel est *operatio quam ille habitus elicit*, (quomodo scientia dicitur *speculativa*, quòd eliciat actum speculandi, seu contemplandi:) vel est *operatio quam habitus ille dirigit & regulat*, ut loquuntur: (quomodo prudentia dicitur *activa*, & *ars effectiva*, non quòd eliciant actiones & effectiones externas, sed quòd sint earum principia regulativa, seu directiva:) at illa beatifica *D E I visio*, neq; est *actus elicitus* ab habitu *Theologiæ revelationis*, neq; ab eo *regulatur*: idq; quia *Theologia revelationis* evacuat in *Patria*, & ei succedit *Theologia visionis*: Ergo *Theologia revelationis* non potest dici *speculativa*, ab illa *speculatione* seu *visione* quæ est in *Patria*. Secundò, ex eâ sententiâ sequitur, *Theologiam Viatorum* posse dici habitum *DEI intuitivum*, seu *habitum visionis*: illa enim *speculatio* à qua denominatio sumitur, est *DEI visio*: at hoc est absurdum, quia sic *Theologia via-*
confunde-

confunderetur cum Theologia Patriæ, quæ sola
est DE intuitiva.

ART. XXX.

*An vera & propriè dicta Theologia possit esse
in homine impio, seu non renato.*

BALTHASAR MEISNERUS,
in Philosophiæ suæ Sect. 2. cap. 2. quest. I.
e hac controversia differens: primò asseverat
Theologiam dici habitum Θεολογίας, non quòd
omnes qui Theologiam docent, & sciunt, sint in
statu gratiæ, & à S. Spiritu specialiter illumina-
ti; sed partim ob principii, partim ob objecti
celestem & divinam rationem. Secundò illud
probat ex eo, quòd habitus Theologiæ cadat
etiam in subiectum non renatum, & hominem
inversa vitæ: sequeretur enim (inquit) aliàs
Theologia habitum perire, si quispiam Theologus
ortaliter peccaret; item illum redire, si pœnitentiam
ageret: qualis alternata habituum abitio &
editio est absurda; cum ἐξ ἑκείνου à διαθήσει hoc unico
distinguitur, quòd è subiecto tam facili non ce-
dat & moveatur.

2 Hinc tertio colligit, accuratè distinguen-
dum esse inter Θεολογίαν, & Θεοσίβειαν: aliud e-
st (inquit) est verus de DE O sensus, aliud pi-
us erga DEV M cultus: hic Θεοσίβειαν, ille γυνώσκον
notat: utrumq; divinum est, sed diverso respe-
ctu: γυνώσκον, quia DEI, & per DEV M, vel
cuius

eius verbum: quia à DEO, & cum DEO, h. e. cū gratiosa ejus in habitatione conjuncta est.

3 Contrariam sententiam profitetur Bartholomeus Keckermannus, Lib. 1. Syst. Theolog. cap. 1. dicit enim, Theologiam esse facultatem & peritiam hominibus electis à D E O infusam: unde patet, Theologiam, ex ejus sententiâ, in hominibus impiis & sceleratis inveniri non posse.

4 Hujus quæstionis determinationem duabus assertionibus proponam: prior est hæc; homines improbi & flagitiosi possunt habere exactam & accuratam rerum Theologicarum cognitionem; possunt item habere miram facilitatem, & promptitudinem discutiendi controversias Theologicas: hæc assertio evidens est, & quotidianâ experientiâ nititur.

5 Assert. secund. notitia rerum Theologicarum, quâ præditi sunt impii & non renati, non est Theologia propriè dicta, sed equivocè dicitur Theologia, quemadmodum homo pictus equivocè vocatur homo: sic notitia rerum moralium, quâ præditi sunt homines improbi & scelesti, equivocè dicitur Philosoph. moralis: illi enim revera non sunt præditi habitu Philosophiæ moralis: idque quia Philosophia moralis & Prudentia sunt unus & idem habitus realiter: Prudentia autem in hominem improbum non cadit, teste Arist. qui sæpe ait, Neminem qui non sit vir bonus, posse propriè prudentem appellari. Vide Jac. Martini

Martini primam disputationem Ethicam, q. 5. bi probat *Philosophiam moralem & Prudentiam* esse eundem habitum.

6 Posterior hæc assertio duabus rationibus efficaciter probatur: primò, *Theologia* est *virtus practica*, ut supra probatum est: at illa notitia controversiarum Theologicarum, qua præditi sunt impii, non est *virtus practica*: Ergo non est vera & propriè dicta *Theologia*. Probari assumptio: virtus practica, seu operativa, nihil est aliud nisi *facilitas & promptitudo agencie* qua *honestæ & bonæ sunt*: at habitus ille quo præditi sunt impii, non est *facilitas, inclinatio, aut propensio ad ea agenda quæ bona sunt*: illi nim talem facilitatem non habent: Ergo non est *virtus practica*, seu operativa.

7 Secundò, notitia *rerum moralium*, quæ præditi sunt homines improbi, non appellatur *Prudentia civilis*: idq; quia inefficax est, & otiosa: Ergo pari ratione, inefficax & inutilis notitia *rerum Theologicarum*, qua præditi sunt impii, non est *vera Theologia*, seu *Prudentia religiosa*. Ratio consequentiæ est hæc: *Theologia* non minùs est *habitus practicus naturæ suæ*, quàm *Prudentia civilis*; & proinde si notitia *rerum civilium*, quam habent improbi, est indigna nomine Prudentiæ, quia caret *inclinatione & propensione ad benè agendum civiliter*; pari ratione, notitia *rerum Theologicarum*, qua præditi sunt

sunt impii, est indigna nomine & titulo *Theologia*, seu *Prudentiæ religiosæ*; quia caret *inclinatione* & *propensione* ad benè agendum *spiritualiter*.

8 Ob. prim. *David*, & *Solomon*, cùm graviter peccarent, manebant *boni Theologi*, quamvis essent *mali Christiani*: Ergo, *vera Theologia* potest esse in homine impio. Respond. homines planè impios & pietate destitutos, neq; esse *bonos Christianos*, neque *bonos Theologos*, imò *verè* & *propriè* non esse *Theologos*: sicut enim homines mali & improbi, non sunt præditi vero habitu *moralis Philosophiæ*, seu *Prudentiæ civilis*; ita etiam impii, seu non renati, non sunt præditi vero habitu *Theologia*, seu *Prudentiæ religiosæ*: novi equidem eos, secundum communem loquendi consuetudinem, esse *bonos Philosophos morales*, & *bonos Theologos*, qui rerum *Theologicarum* & *Ethicarum* periti sunt; verùm ut aiunt, loquendum est cum vulgo, sentiendum cum sapientibus, qui docent *virtutes practicas*, quales sunt *Theologia*, & *Philosophia moralis*, non posse esse in hominibus flagitiosis & impiis.

9 Ad illud autem quod objicitur, de *Davide* & *Solomone*, Respond. eos cùm graviter peccarent, neque fuisse *bonos Theologos*, neq; *bonos Christianos*, quia videlicet ea facinora patrabant, quæ *Theologia* seu *Christianitas* damnat: fuisse

uisse tamen verè & propriè Theologos, & Christianos; quia videlicet veram fidem & pietatem totaliter non amiserant.

IO Ob. secund. si habitus Theologia non cadat in hominem impium & non renatum, sequetur Theologia habitum perire, si quispiam Theologus graviter peccet; redire verò si poenitentiam agat: illa autem alternata habituum abditio & reditio est absurda, quia tollit eorum stabilitatem & permanentiam, per quam à dispositionibus distinguuntur. Respond. negando connexionem propositionis: quamvis enim habitus veræ Theologiæ non possit esse in homine non renato, seu fide & pietate totaliter destituito, potest tamen esse, imò sæpè est, in fidelibus seu electis cum graviter peccant, licet tum non habeat tantam efficaciam, seu *irresistibilitatem*, quantam aliàs habet: quare illa alternata habituum abditio & reditio nõ nititur nostræ sententiæ fundamentis, sed absurdo Pontificiorum, Arminianorum, & ipsius Meisneri dogmate, de Apostasia Sanctorum: hoc enim posito, quòd is qui jam renatus est, possit statu gratiæ & regenerationis totaliter excidere, manifestè sequetur, habitum veræ Theologiæ, imò etiam habitus Spei & Charitatis esse obnoxios alternatæ illi abditioni & reditioni, de qua loquitur Meisner.

II Tertiò: dicet aliquis, si notitia rerum moralium, quæ est in homine improbo, non est Pruden-

Prudentia civilis: item, si notitia rerum Theologicarum, quæ est in homine non renato, non est vera Theologia, ad quos habitus referendæ sunt illæ notitiæ? Respond. peritiam improborum Theologorum esse habitum aggregatum ex fide merè historica, & Philosophicis disciplinis: Notitiam verò rerum moralium, quæ cernitur in hominibus flagitiosis, non constituere novam speciem habitûs à Prudentia distinctam, sed ad Prudentiam referendam esse, tanquam quid imperfectum & incompletum, ad id quod completum & perfectum est.

12 Concludo igitur hanc EXERCITATIONEM, de FIDE, hac Assertionem: *πιστις θεολογία, & θεοσέβεια, hoc est, Fides Salvifica, Religio, & vera Theologia, sunt a parte rei unus & idem habitus; hoc est, non differunt nisi ratione: rerum enim cœlestium notitia in renatis & fidelibus, quatenus nititur D & I testimonio, appellatur Fides: eadem, quatenus est regulativa & directiva cultûs divini, vocatur Religio: denique quatenus artificioso systemate comprehenditur & exprimitur, appellatur Theologia.*

FINIS.

Gloria Tibi Domine.

